

文忠集附拾遺

一





文 忠 集

附 拾 遺

(一)

顏 真 卿 撰

本館叢書集成初編所選聚珍版叢書收有此書
據四庫提要載正集十五卷補遺一卷外尙有年
譜一卷附錄一卷然現行武英殿聚珍本並無年
譜及附錄粵刻聚珍本於正集及補遺十六卷外
益以年譜及道光間黃本驥所採集詩文并逸詩
文待訪目統編爲拾遺四卷故據粵刻本排印

文忠集原序

魯公極忠不避難。臨難不違義。是其塵垢糠粃。猶祇飾而誦習之。將以勸事君。況其所自造之文乎。然魯公沒且三百年。未有祖述其書者。其在舊史。施之行事。蓋僅有存焉。而雜出傳記。流于簡牘。則百而一二。銘載功業。藏于山川。則十而一二。非好學不倦。周流天下。則不能徧知。而盡見。彼簡牘者。有盡。而山川者。有壞。不幸而不傳。則又至于千萬而一二。未可知也。吳興沈侯。哀魯公之忠。而又佳其文。懼久而有不傳。與雖傳而不廣也。于是採掇遺逸。輯而編之。得詩、賦、銘、記。凡若干篇。爲十五卷。學者可觀焉。蓋君子多見。則守之以約。沈侯好學聚書。聚書至三萬卷。若是多矣。然猶常汲汲如不足者。至其集魯公之文。使必傳于天下。必信于後世。可謂守之以約。而尚友者乎。予是以序其意。劉敞序。

文忠集目錄

卷八

奏議五首

卷二

表九首

卷三

表二首

卷四

碑四首

卷五

碑四首

卷六

碑三首

卷七

碑三首

卷八

碑二首

卷九

碑四首

卷十

墓碣墓誌二首

卷十一

書帖十首

題名五首

卷十二

序四首

卷十三

記七首

卷十四

祭文一首

贊一首

記四首

卷十五

詩二十五首

卷十六

補遺二十三首

文忠集唐顏真卿撰真卿事迹具唐書本傳其集見于藝文志者有與觀集十卷又廬集十卷臨川集十卷至北宋皆亡有吳興沈某者採掇遺佚編爲十五卷劉敞爲之序但沈稱侯而不著名字嘉祐中又有宋敏求編本亦十五卷見館閣書目江休復筆錄極稱其採錄之博至南宋時又多漫漶不完嘉定間留元剛守永嘉得敏求殘本十二卷失其三卷乃以所見真卿文別爲補遺併撰次年譜附之自爲後序而宋沈所編全書皆不存後人復分元剛之十二卷爲十五卷以當之迨明而流傳益罕今世所行本乃明萬歷中真卿裔孫允祚重刊脫漏舛錯盡失其舊獨此本爲錫山安國所刻雖已分十五卷然猶元剛原本也真卿大節炳著史冊而文章典博莊重稱其爲人集中廟享議等篇說禮尤爲精審特遺文在宋散佚已多故元剛所編亦不免缺略今去唐益遠而其文之見于石刻者尙間有可採謹詳加搜輯得太尉宋文貞公神道碑側記一首贈祕書少監顏君廟碑碑側記碑額陰記各一首奉使蔡州書一首竹山聯句詩一首皆有碑帖現存又政和公主碑殘文顏元

孫墓誌殘文二篇。見江氏筆錄。陶公粟里詩。見困學紀聞。今俱探出。增入補遺卷內。共爲十六卷。仍以劉敞序冠于簡首。又真卿碑帖。尙有殷夫人顏氏碑銘一首。尉遲迴廟碑銘一首。殘缺特甚。難以刊刻。至留元剛所錄禘祫議。其文旣與廟享議複見。而篇末時議者舉然云云。乃新唐書陳京傳敍事之辭。亦非真卿本文。又干祿字書序。乃顏元孫作。真卿特書之刻石。元剛遂以爲真卿文。亦爲舛誤。今並從刊削焉。元剛字茂潛。丞相留正之子。官終起居舍人云。

文忠集卷一

奏議

唐 顏真卿撰

請復七聖諡號狀

謹案禮記曰先王諡以尊名節以一惠故行出于己而名生于人使夫善者勸而惡者懼也而虞夏之質殷周之文至矣而禹湯文武之君咸以一字爲諡言文則不稱武言武則不稱文豈聖德所不優乎蓋羣臣稱其至者是以子不得議父臣不得議君天子崩則臣下制諡于南郊明受之于天也諸侯薨則太子赴告于天子明受之于君也至于周室卑大樸散諡始以兩字爲重人或以虛美爲榮漢承戰國餘烈參而用之君臣易名事歸至當少不以爲貶多不以爲褒雖美衆所歸可一言而盡矣魏晉以降蓋不足徵聖唐欽明憲章周漢爰初創業順攷古道高祖諡太武用漢制太宗諡曰文行周道也名正理順垂之無窮上元中政在宮壺亂名改作始建神堯文武大聖之號蓋非高宗之所獲已胤玄宗之末奸臣竊柄析言而亂舊法輕議以改鴻名遂廣累聖之諡有加至十一字者皇帝則悉有大聖之號皇后則皆有順聖之名使言之者惑于今行之者異于古非舊制也其後劍門下罪己之詔敍高祖已下累聖悉用舊諡則玄宗悔既往之失亦以明矣寶應中二聖山陵有司議諡事不師古變而行權去古質而尙浮華捨舊名

而廣新諡。謂一名不足以節惠。適十陪於古焉。而累聖諡名悉以字多者爲定。是廢高祖太宗之令。豈曰愛君。今制諡非古人皆知之。有司因循其事。而無敢言者。假使當今守之而不改。後人議之以爲非。然所失豈不大哉。何者。臣子之于君父。莫不欲廣其美稱。先王制禮。不敢過也。故至敬無文。至文尙質。質之數極于一。堯舜之美。足以彰矣。文之數極于二。孝文孝景之德。亦以明矣。質則近古。文則近今。此高祖太宗所以更用其法。後王所宜守之法也。非天下之至聖。其孰能定之。此天皇所以興聖主。而正鴻名。太宗所以待孝孫。而修廢典。微臣所以守經義。而崇聖朝。陛下宜奉天心。繼先太宗之志。使子孫蒙其法。而萬代守之。此天下之能事也。臣愚以爲高祖已下累聖諡號。悉宜取初諡爲定。謹案舊制。宜上高祖爲武皇帝。太宗爲文皇帝。高宗爲天皇大帝。中宗爲孝和皇帝。睿宗爲聖真皇帝。其二聖諡名字數太廣。有逾古制。臣愚請擇其美稱而正之。謹案諡法。秉德不回曰孝。照臨四方曰明。宜上玄宗爲孝明皇帝。又案諡法。聖善周聞曰宜。宜上肅宗爲孝宜皇帝。仍准漢魏及國朝故事。于尙書省議定。奏御。夫文敝則救之以質。至敬也。名惑而反之于正。至明也。祖作之而孫述之。至孝也。三者備矣。然後能立天下之大本。正天下之大名。建天下之大業。能事畢矣。伏惟皇帝陛下詳擇。

論元皇帝祧遷狀

王制。天子七廟。三昭三穆。與太祖之廟而七。又禮器云。有以多爲貴者。天子七廟。又伊尹曰。七世之廟。可以觀德。此經典之明證也。七廟之外。則曰去祧爲壇。去壇爲墀。故歷代儒者。制迭毀之禮。皆親盡宜毀。伏

以太宗文皇帝七代之祖高祖神堯皇帝國朝首祚萬葉所承太祖景皇帝受命于天始封于唐元本皆在不毀之典代祖元皇帝地非開統親在七廟之外代宗皇帝升祔有曰元皇帝神主禮合祧遷或議者以祖宗之名難于迭毀昔漢朝廷近古不敢以私滅公故前漢十二帝爲祖宗者四而已至後漢漸違經意子孫以推美爲先自光武以下皆有廟號則祖宗之名莫不建也安帝以讒害大臣廢太子及崩無上宗之奏後自建武以來無毀者因以陵號稱宗至桓帝失德尙有宗號故初平中左中郎蔡邕以和帝以下功德無殊而有過差不應爲宗及餘非宗者追尊三代皆奏毀之是知祖有功宗有德存至公之議非其人不居蓋三代立禮之本也自東漢已來則此道喪矣魏明帝自稱烈祖論者以爲逆自稱祖宗故近代此名悉爲廟號未有子孫踐祚而不祖宗先王者以此明之則不得獨據兩字而爲不祧遷之證假令傳祧百代豈可上存百代以爲孝乎請依三昭三穆之義永爲通典寶應二年升祔玄宗肅宗則獻祖懿祖已從迭毀伏以代宗睿文孝皇帝卒哭而祔則合上遷一室元皇帝代數已遠其神主準禮祧而禘祫之時然後饗祀

廟享議

議者或云獻祖懿祖親遠廟遷不當祫享宜永闕于西夾室又議者云二祖宜同祫享與太祖並列昭穆而空太祖東向之位又議者云二祖若祫同享卽太祖之位永不得正宜奉遷二祖神主祔藏于德明皇帝廟臣伏以三議俱未爲允且禮經殘缺旣無明據儒者能比方義類斟酌其中則可舉而行之蓋協于

正也。伏以太祖景皇帝以受命始封之功。處百代不遷之廟。配天崇享。是極尊嚴。且至禘祫之時。暫居昭穆之位。屈已伸孝。敬奉祖宗。緣齒族之禮。廣尊天之道。此實太祖明神烝烝之本意。亦所以化被天下。率循孝悌也。請依晉蔡謨等議。至五年十月祫享之日。奉獻祖神主居東面之位。懿祖太祖。息諸祖宗。遵左昭右穆之列。此有以彰國家重本尙順之明義。足爲萬代不易之令典也。又議者請奉遷二祖神主于德明皇帝廟。行祫祭之禮。夫祫合也。故公羊傳曰。大事者何祫也。若祫祭不陳于太廟。而享于德明廟。斯乃分食也。豈謂合食乎。名實相乖。尤失禮意。固不可行。

論百官論事疏

御史中丞李進等傳宰相語。稱奉進止。緣諸司官奏事頗多。朕不憚省覽。但所奏多挾私讒毀。自今論事者。諸司官皆須先白長官。長官白宰相。宰相定可否。然後奏聞者。臣自聞此語已來。朝野翬然。人心亦多衰退。何則。諸司長官皆達官也。言皆專達于天子也。郎官御史。陛下腹心耳目之臣也。故其出使天下。事無巨細得失。皆令訪察。回日奏聞。所以明四目。達四聰也。今陛下欲自屏耳目。使不聰明。則天下何述焉。詩云。營營青蠅。止于棘。讒言罔極。交亂四國。以其能變白爲黑。變黑爲白也。詩人深惡之。故曰。取彼讒人。投畀豺虎。豺虎不受。投畀有北。則夏之伯明。楚之無極。漢之江充。皆讒人也。孰不惡之。陛下惡之。深得君人之體矣。陛下何不深回聽察。其言虛誣者。則讒人也。因誅殛之。其言不虛者。則正人也。因獎勵之。陛下捨此不爲。使衆人皆謂陛下不能明察。倦于聽覽。以此爲辭。拒其諫諍。臣竊爲陛下痛惜之。臣聞太宗勸

于聽覽。庶政以理。故著司門式云。其有無門籍。人有急奏者。皆令監門司與仗家引對。不許關礙。所以防壅蔽也。并置立仗馬二疋。須有乘騎便往。所以平治天下。正用此道也。天寶已後。李林甫威權日盛。羣臣不先諮宰相。輒奏事者。仍託以他故中傷之。不敢明約百官。令先白宰相。又閣官袁思藝日宣詔至中書。玄宗動靜。必告林甫。先意奏請。玄宗驚喜若神。以此權柄恩寵日甚。道路以目。上意不下宣。下情不上達。所以漸致潼關之禍。皆權臣誤主。不遵太宗之法故也。陵夷至于今日。天下之弊。盡萃于聖躬。豈陛下招致之乎。蓋其所從來者漸矣。自艱難之初。百姓尙未彫敝。太平之理。立可便致。屬李輔國用權。宰相專政。遞相姑息。莫肯直言大開。三司不安。反側逆賊散落。將士北走。黨項合集。土賊至今爲患。僞將更相驚恐。因思明危懼。扇動卻反。又今相州敗散。東都陷沒。先帝由此憂勤。至于損壽。臣每思之。痛切心骨。今天下兵戈未戢。瘡痍未平。陛下豈得不日聞讜言。以廣視聽。而欲頓隔忠讜之路乎。臣竊聞陛下在陝州時。奏事者不限貴賤。務廣聞見。乃堯舜之事也。凡百臣庶。以爲太宗之理。可翹足而待也。臣又聞君子難進易退。由此言之。朝廷開不諱之路。猶恐不言。況懷厭怠。令宰相宣進止。使御史臺作條目。不令直進。從此人不敢奏事。則陛下聞見。只在三數人耳。天下之士。方鉗口結舌。陛下後見無人奏事。必謂朝廷無事可論。豈知懼不敢進。卽林甫國忠復起矣。凡百臣庶。以爲危殆之期。又翹足而至也。如今日之事。曠古未有。雖李林甫楊國忠猶不敢公然如此。今陛下不早覺悟。漸成孤立。後縱悔之。無及矣。臣實知忤大臣者。罪在不測。不忍孤負陛下。無任懇迫之至。

朝會有故去樂議

周禮大司樂職云。諸侯薨。令去樂。大臣死。令弛懸。鄭注云。去謂藏之。弛謂釋下也。是知哀輕者則釋。哀重者則藏。又案庾蔚之禮論云。晉元后秋崩。武帝咸寧元年。享萬國。不設樂。永嘉元年冬。惠帝三年。喪制未終。司徒左長史江統議。二年正會。不宜作樂。又章皇后哀限未終。后主已入廟。博士徐乾議曰。周景王有后嫡子之喪。既葬。除服。叔向猶議其晏。今不宜懸。宋書禮制云。晉武帝已來。國有大喪。廢樂三年。又案江都集禮說。晉博士孔恢。朝廷遇密懸而不作。恢以爲宜。都去懸。設樂爲作。不作則不宜懸。孟獻子禫懸而不樂。自是應作耳。故夫子曰。獻子加于人一等矣。非謂不應作而猶懸也。國喪尙近。謂金石不可陳于庭。又徐廣晉史曰。聞樂不怡。故申情于遇密。諒闈奪服。慮政事之荒廢。是故秉權通以變。常量輕重以降差。臣以周禮去樂之文。宋志終喪之證。徐廣之論。寧戚孔恢之設禫懸。理既可憑。事又故實。伏請三年未畢。都不設懸。如有齊衰喪及遇大臣薨歿。則量輕重。懸而不作。

文忠集卷二

表

皇帝卽位賀上皇表

臣某言。六月二十七日。伏承賊陷潼關。駕幸蜀郡。李光弼郭子儀等正圍博陵郡。收兵入土門。王師旣還。百姓震恐。憂惶危懼。若無所歸。臣不勝悲憤之深。遂遣脚力人張雲子問道上表。猶恐不達。又差招討判官信都郡武邑縣主簿李銑相繼行。銑及雲子前後並到靈武郡。奉皇帝七月十二日敕。伏承陛下命皇太子踐祚改元。皇帝上陛下尊號曰上皇。天帝臣及官吏僧道耆壽百姓等。蹈舞拊躍。其張雲子回。皇帝授臣工部尚書兼御史大夫。其李銑回。又授臣銀青光祿大夫。願以庸微。頻叨寵命。道路隔絕。辭讓無由。進退失圖。伏增惶懼。竊以逆賊安祿山。孤負聖恩。憑陵寓縣。禍盈惡稔。尙稽天誅。今皇帝撫軍蒼生。賈勇豐鎬。河洛指期可平。伏願陛下垂拱頤神。以覩廓清之慶。臣官守有限。不獲隨例闕庭。無任懇款悲戀之至。

批答

兇逆亂常。侵侮中夏。潼關失守。京國不寧。朕因涉岐梁。至于巴蜀。遂命皇帝肇登寶歷。爰靜妖氛。今官軍益振。回紇効款。卽擬南行。共爲翦滅。卿忠惟奉國。孝則保家。懷不二之心。乘難奪之操。皇帝累申寵

命兼以崇班宜有懋于深功且用光于重守。

讓憲部尚書表

臣某言臣聞無功受賞爲善不勸有罪不罰爲惡罔辨陛下剋復之期匪朝伊夕至如賞罰二柄事在必行苟或不明于何取則臣以愚懦叨守平原屬逆賊安祿山背叛聖恩擾犯河洛臣堂兄杲卿以常山太守首開土門臣與河北諸郡因之固守人臣本分夫有何功上皇授臣戶部侍郎兼知招討採訪等使已失人望緣賊未滅遂不敢辭又令李光弼郭子儀賀蘭進明等與臣計會同討兇逆三數月間河北向定屬潼關失守大駕西巡光弼等卻入土門諸郡危逼陛下御極又錄臣無功寵以非次常伯亞相一時猥集臣兄允南弟允臧等連榮臺省一男三姪皆授好官在臣一門叨幸斯極殞身碎首無以上報臣常使判官鉅鹿郡南和縣丞賈載姪男永王府典軍廣成及行官鄧昌珍楊神功裴法成等十餘人將綵物絹帛相繼渡海與劉正臣計會共和三蕃正臣等剋期南來行已有日屬逆賊史思明尹子奇等乘其未至悉力急攻諸郡無援相次陷沒皆由臣孱懦無謀致此顛沛誠合殉命危難死守孤城以爲歸罪闕庭愈于受擒賊手所以僂俛偷生過河緣劉正臣使楊神功將牒與臣索兵馬及盤瓶錦張帳令應接奚契丹等不與其勾當伏恐陛下貽憂又恩敕先超授吳郡司士鄭毓樂安郡太守令于江淮南兩道度僧道取錢與臣召募士馬令應接河北臣由此未獲卽赴行在遂至廣陵丹陽等郡各與採訪使計會竟不得兵馬卽累奉聖旨許臣入奏行至武當郡又奉恩命除臣憲部尚書兼令使者送告身與臣捧戴殊私不任

惶懼陛下縱含弘善貸不忍明刑在臣覲冒至深胡顏自處臣忝爲大臣繫國休戚損臣益國臣受其益損國益臣臣受其損若受任失守還朝屢遷示國無刑于臣大損非敢外飾實披至誠又臣名節雖微任位頗重爲政之體必在律人恩先逮下罰當從上今罪一人則萬人懼若怙于寵四海何瞻伏願陛下重貶臣一官以示天憲使天下知有必行之法則知有必賞之令寵榮過于尚書遠矣無任懇悃之至。

批答

卿才推翰苑望重朝廷昆弟成名俱效忠節頃蜂蠆縱毒郡邑多虞卿能審事宜捍禦兇盜雖平原不守而功效殊高自遠歸朝深副朕望允膺曳履之命無至免冠之請。

謝兼御史大夫表

臣某言伏奉今日制書以臣兼御史大夫本官如故恩榮累及成命曲臨捧戴殊私慙惶靡據臣屏微有素抗直無聞比守平原困于兇賊不能死節負義歸朝斧鉞之誅甘心待命崇高之位不次頻叨孟夏之中始操刑柄數旬之內兼總憲司撫已缺如負乘斯甚將何以明刑天下振舉朝綱臣聞秦漢之時凡有制詔皆下丞相御史府人到于今稱爲副相東方朔舉自古賢聖以次百官乃以孔丘爲御史大夫則知其官何可妄授況列曹尚書古之常伯如天之有斗豈易其人昨以表辭非敢矯舉恐煩天聽僂俛就班候隙請問方擬牢讓不圖榮寵又集微軀聖恩頻繁固令卽上陳請莫遂惶懼益深又臣竊見近日朝列之內或有身兼數官苟貪利權多致顛覆害政非一妨賢實多臣嘗忿之其忍自冒無任懇迫屏營之至。

謹詣閣門陳謝以聞。倘天聽聽卑，猶冀少回恩命，停臣一職，別授忠賢，則雖死猶生。期于畢力，臣某云云。

批答

卿德重才博，久而益彰，深竭忠貞，克著名節。乃今再造區夏，藉卿以振朝綱，曳履之榮，允膺其象，弄印之寵，無以易卿。既簡朕心，不至謙讓，所謝知。

謝馮翊太守表

臣某言，伏奉某月日恩制，除臣馮翊太守。以某日至郡上訖，受命祗懼，伏增戰越。臣自失守平原，萬里歸命，甘心斧鉞，用儆敗亡。陛下錄纖芥之誠，捨丘山之罪，超司秋典，再長憲臺。宗伯亞相，一時猥集，在臣叨幸，何以克堪。誓當粉骨碎身，少酬萬一，而力微任重，福過災生，涓塵莫効，咎愆仍積。上負聖明之恩，下慙魯衛之士，槃水加劍，未塞深尤。禦魅投荒，乃爲殊造。陛下識其眉目，矜其要領，待罪猶忝于左馭，黜官不離于本秩。感念恩德，淪于心髓，木石知變，況在微臣。伏惟陛下察其慙愚，收其後效。臣雖萬死，實荷所天。竊以此郡破亡，再陷兇逆，生靈塗炭，邑室空虛。殺傷者雖或蓋藏，逃亡者尙未歸復。謹當勵精悉力，宜諭皇明。旬月之間，望有所校。伏惟陛下減省聖慮，不以此郡爲憂。則臣之愚忠，生死萬足。其戶口實數，并利害切急者，伏望容臣括實，續狀奏聞。無任感戀之至。

批答

卿夙負名器，列在朝廷，委弄印之傳，兼曳履之寵，而乃事乖執法，情未滅私。朕念以舊勳，遂從寬宥。今

左輔之郡凋敝之餘宜加撫存以申來效所謝知

謝蒲州刺史表

臣某言。臣今月十一日伏奉五日恩制。除臣使持節蒲州諸軍事。蒲州刺史。充本州防禦使。臣緣同州先無佐官。蒲州書魚未到。遲迴累日。不敢赴上。中使張抱誠至。奉宣恩命。令臣與將軍趙瑱計會遊奕兵馬。昨以十八日至州上訖。祇承寵命。伏增感惕。臣竊以此州之地。堯舜所都。表裏山河。古稱天險。餘兇未殄。防禦是先。況扼秦晉之喉。撫幽并之背。既號股肱之郡。實資心膂之賢。伏惟光天文武大聖孝感皇帝陛下。道冠生人。恩涵墜履。方建非常之業。不遺易忘之臣。特委大邦。俾之集事。戴荷殊獎。無忘寢食。但臣愚鷲有素。智勇缺然。將以鎮遏艱虞。導揚德澤。拜命之日。以榮爲憂。惟君知臣。教其不及。勤恤人隱。動必以聞。陛下不以爲煩。則臣死而獲考矣。無任感戴屏營之至。

批答

卿簪紱之端。名節素重。出鎮藩翰。克效心勤。況自同及蒲。襟帶相接。宣風布化。實佇于卿。特委股肱。尤當勉勵。防虞恤隱。必應事宜。所謝知。

謝浙西節度使表

臣某言。伏奉六月九日恩制。以臣爲昇州刺史。充浙西節度使兼江寧軍使。聖德含弘。不遺簪履。捨其罪戾。假以麾幢。感戴恩榮。死生知報。臣以爲全吳舊國。分閩重權。煮東海以自資。塹西河而作固。九州天險。

之地。六代帝王之都。是以魏文興嗟。甘從南北之限。苻堅怙侈。爰喪百萬之師。豈不以形勝是先。腹心斯切。親賢重寄。鎮遏攸難。矧在庸微。寧堪及此。是以拜命之日。以榮爲憂。制書以今月四日至饒州。臣以今日發赴本道。取都統節度觀察使李峘處分訖。卽赴昇州。卽當繕修甲兵。撫循將士。觀察要害。以備不虞。假陛下英武之威。遵陛下平明之理。一心戮力。上答天慈。伏惟陛下察臣愚忠。則死且不朽。無任感戴屏營之至。

批答

卿學行有聞。謀猷克壯。屢經寒歲。不改松筠。且江寧古之帝都。實爲巨防。自非宿德。其可濫居。委卿忠誠。俾當連帥。宜弘籌略。爲朕緝綏。所謝知。

謝戶部侍郎表

臣某言。伏奉某月日恩命。以臣爲戶部侍郎。榮寵自天。感戴交集。臣聞地官之任。邦教是資。侍郎之職。非賢不授。況臣資性愚蒙。行能無取。頻以疎拙。獲罪朝廷。五年之間。三貶官次。先朝皇極。猶佐藩條。官階勳封。盡蒙黜削。待罪三年。分從遐棄。屬陛下以聰明睿哲。嗣聖登庸。恩宥廣覃。授臣利州刺史。詔書始下。纔涉旬朔。不遺易忘之臣。忽奉待詔之命。生死骨肉。受賜已深。對見之辰。又蒙假以章服。小臣懷惠。寤寐無寧。聖澤頻繁。叨戴斯授。循涯省分。盈量則多。粉骨糜軀。罔知攸答。無任感戴惶懼之至。

卿門傳儒行。代挹公才。忠義在躬。幹蠱從政。頃升八座。式昭水鏡之規。往鎮兩河。能鳴風雨之晦。比雖因事見貶。今則念舊錄功。然以地官務殷。惟才是屬。周行所舉。殊愜朕懷。所謝知。

謝吏部侍郎表

臣某言。伏奉某月日恩制。以臣爲吏部侍郎。又奉某月日恩制。加臣銀青光祿大夫。浹辰之間。殊澤滂至。恭承寵命。戴荷交馳。竊以國之所急。必在官人。銓綜之司。非賢弗授。伏揆虛薄。祇懼實深。常恐上塵則哲之明。下負竊位之責。未酬萬一。再沐恩私。寵命忽臨。舊階旋復。叨榮旣甚。有過何深。佩玉腰金。實懼在梁之刺。忘軀拜賜。惟懷粉骨之誠。施重力微。罔知攸措。無任荷戴屏營之至。

批答

卿鬱然詞宗。雅有朝望。高標勁節。歷霜霰而不渝。握鏡懸衡。鑒人倫而式敘。是用特加命數。光乃純臣。復銀青之舊階。鳴水蒼之雜珮。佇聞密啓。以定九流。舉其朝綱。僉曰惟允。所謝知。

謝荆南節度使表

臣某言。伏奉二十七日恩制。除臣江陵尹兼御史大夫。充荆南節度觀察處置使。寵命自天。戰荷無地。竊以荆南巨鎮。江漢上游。右控巴蜀。左聯吳越。南通五嶺。北走上都。寇賊雖平。襟帶尤切。雖叔子仁德。元凱智囊。居之猶或病諸。過此豈宜濫據。祇承睿顧。伏深慙惕。無任感戴屏營之至。

批答

卿明邁偉才。忠貞壯節。夙推公器。累踐周行。專城高魏。尙之助。會府著山濤之績。而七澤交帶。三江要衝。式資統尹之方。雅屬旌施之寄。人存政舉。其在茲乎。所謝知。

文忠集卷三

表

謝贈官表

臣某言。伏奉二月十七日恩制。臣亡祖故曹王屬。曹王晉王侍讀先臣昭甫。特蒙聖恩超贈。使持節華州諸軍事。華州刺史。天慈錫類。泉壤疏榮。捧戴殊私。闔門感慶。竊以臣亡祖伏膺文儒。克篤前烈。能讀三墳五典。八索九丘。特爲伯父故祕書監先臣師古之所賞愛。師古每有注釋。未嘗不參預焉。又與學士令狐德棻等同侍天皇。得備顧問。有時無命。天闕盛年。臣亡父故薛王友先臣惟貞。亡伯故豪州刺史先臣元孫等。並襁褓苴麻。孩提未識。養于舅氏。殷仲容以至成立。臣堂兄故衛尉兼御史中丞杲卿。卽元孫之子。及臣兄弟等。應承貽厥之訓。遭遇明聖之朝。各以微誠。皆蒙殊獎。杲卿雖死爲不朽矣。臣亦何人。屢叨榮祿。夙夜祇懼。慚戴已深。不謂霑澤曲霑。褒贈俯及。特蒙加等之禮。實爲非常之恩。感戴屏營。萬死非報。無任戰荷之至。謹因中使內謁者監張抱誠冒死陳言以聞。

批答

卿之乃祖。當爲碩儒。旣高倚相之能。遂有臧孫之後。不墜其業。在卿之門。式覃追遠之思。俾蒙貽厥之慶。加贈方岳。以表哀榮。所謝知。

乞御書天下放生池碑額表

臣某言。臣聞帝王之德。莫大于生成。臣子之心。敢忘于讚述。臣去年冬任昇州刺史。日屬左饒衛左郎將史元琮。中使張庭玉等。奉宣恩命。于天下州縣臨江帶郭處。各置放生池。始于洋州興道。汔于昇州江寧。秦淮太平橋。凡八十一所。恩沾動植。澤及昆蟲。發自皇心。徧于天下。歷選列辟。未之前聞。海隅蒼生。孰不欣喜。臣時不揆愚昧。輒述天下放生池碑銘一章。又以俸錢于當州採石。兼力拙自書。蓋欲使天下元元。知陛下有好生之德。因令微臣獲廣昔賢善頌之義。遂絹寫一本。附史元琮奉進。乞御書題額。以光揚不朽。緣前書點畫稍細。恐不堪經久。臣今謹據石壁窠大書一本。隨表奉進。庶以竭臣下悽悽之誠。特乞聖恩俯遂前請。則天下幸甚。豈惟愚臣。昔秦始皇暴虐之君。李斯邪諂之臣。猶刻金石。垂于後代。魏文帝外禪之主。鍾繇偏方之佐。亦于繁昌。立表頌德。況陛下以巍巍功業。而無紀述。則臣竊恥之。謹昧死以聞。伏增戰越。

批答

朕以中孚及物。亨育爲心。凡在覆載之中。畢登仁壽之域。四靈是畜。一氣同和。江漢爲池。魚鼈咸若。卿慎徽盛典。潤色大猷。能以懿文。用刊樂石。體含飛動。韻合鏗鏘。成不朽之立言。紀好生之上德。唱而必和。自古有之。情發于中。予嘉乃意。所請者依。

文忠集卷四

碑

天下放生池碑銘

皇唐七葉。我乾元大聖光天文武孝感皇帝陛下。以至聖之姿。屬艱虞之運。無少康一旅之衆。當祿山強暴之初。乾鞏勞謙。勵精爲理。推誠而萬方胥悅。克己而天下歸仁。恩信侔于四時。英威達于八表。功庸格天地。孝感通神明。故得回紇。奚鬻。契丹。大食。盾蠻之屬。扶服萬里。決命而爭先。朔方。河東。平盧。河西。隴右。安西。黔中。嶺南。河南之師。虓鬪五年。推鋒而効死。摧元惡如拉朽。舉兩京若拾遺。慶緒遁逃。已蒙赤族之戮。思明踰伏。行就沸鼎之誅。拯已墜之皇綱。據再安之宗社。迎上皇于西蜀。申子道于中京。一日三朝。大明天子之孝。問安視膳。不改家人之禮。烝烝然。翼翼然。眞帝皇之上儀。誥誓所不及已。歷選內禪。生人以來。振古及隋。未有如我皇帝者也。而猶嫗煦萬類。勤喚四生。乃以乾元二年。太歲己亥春三月己丑。端命左驍衛右郎將史元琮。中使張庭玉。奉明詔布德音。始于洋州之興道。息山南。劍南。黔中。荆南。嶺南。江西。浙西諸道。訖于昇州之江寧。秦淮。太平橋。臨江帶郭。上下五里。各置放生池。凡八十一所。蓋所以宣皇明而廣慈愛也。易不云乎。信及豚魚。書不云乎。鳥獸魚鼈咸若。古之聰明睿智神武而不殺者。非陛下而誰。昔殷湯克仁。猶存一面之網。漢武垂惠。纔致銜珠之答。雖流水救涸。寶勝稱名。蓋事止于當時。尙介祉于

終古豈若我今日動者植者。水居陸居。舉天下以爲池。罄域中而蒙福。乘陀羅尼加持之力。竭煩惱海。生死之津。揆之前古。曾何髣髴。微臣職忝方面。生丁盛美。受恩寢深。無以上報。謹緣臯陶奚斯歌虞頌魯之義。述天下放生池碑銘一章。雖不足雍容明聖萬分之一。亦臣之精懇也。敢刻金石。著其詞曰。

明明皇帝。臨下有赫。至德光天。乾元啓蹟。緯武戡亂。經文御歷。孝感神明。義形金石。仁覆華夏。恩加蠻貊。道冠巍巍。威深皦皦。遭茲多難。克廣丕績。慶緒旣誅。思明辟易。人道助順。天心惡逆。撲滅之期。匪朝伊夕。乘此寶祚。永康宗祏。業盛君親。功崇列辟。交禪之際。桀然明白。迴映來今。孤高往策。去殺留惠。好生立辟。率土之濱。臨江是宅。遂其生性。庇爾鱗鬪。環海爲池。周天布澤。致茲忠厚。罔弗怡懌。動植依仁。飛沈受獲。流水長者。徒稱往昔。寶勝如來。疇庸允格。德力無競。慈悲孔碩。相時傳聞。尙賴弘益。矧在遭遇。其忘敷錫。眞卿勒銘。敢告凡百。臣眞卿以乾元三年春三月戊辰撰。至大歷七年秋九月己亥。自撫州刺史蒙除湖州。八年秋七月戊戌。于州駱駝橋東追建。吳文休鑄。

湖州烏程縣杼山妙喜寺碑銘

州西南杼山之陽。有妙喜寺者。梁武帝之所置也。大同七年夏五月。帝御壽光閣。會所司奏請置額。帝以東方有妙喜佛國。因以名之。舊置在州西金斗山。唐太宗文皇帝升極之六年春二月。移于此山。山高三百尺。週迴一千二百步。蓋昔夏杼南巡之所。今山有夏王村山。西北有夏駕山。皆后杼所幸之地也。晉吳興太守張玄之。吳興疏云。烏程有墟名東張。地形高爽。山阜四周。卽此山也。其山勝絕。遊者忘歸。前代亦

名稽留山。寺前二十步跨澗有黃浦橋。橋南五十步。又有黃浦亭。並宋鮑昭送盛侍郎及庾中郎賦詩之所。其水自杼山西南五里黃蘗山出。故號黃浦。俗亦名黃蘗澗。卽梁光祿卿江淹賦詩之所。寺東偏有招隱院。其前堂西廡謂之溫閣。從草堂東南屈曲有懸巖。徑行百步至吳興太守何楷釣臺。西北五十步至避它城。案說文云。它。蛇也。上古患它。而相間得無它乎。蓋往古之人築城以避它也。有處士竟陵子陸羽杼山記所載如此。其臺殿廊廡。建立年代。并具于記中。大歷七年。真卿蒙刺是邦。時浙江西觀察判官殿中侍御史袁君高巡部至州。會于此上。真卿遂立亭于東南。陸處士以癸丑歲冬十月癸卯朔二十一日。癸亥建。因名之曰三癸亭。西北于蘗桂之間創桂棚。左右數百步。有芳林茂樹。悉產丹青紫三桂。而華葉異。各樹桂之有支徑。以袁君步焉。因呼爲御史徑。真卿自典校時。卽著五代祖隋外史府君與法言所定切韻。引說文蒼雅諸字書。窮其訓解。次以經史子集中兩字已上成句者。廣而編之。故曰韻海。以其鏡照源本。無所不見。故曰鏡源。天寶末。真卿出守平原。已與郡人渤海封紹高。族弟今太子通事舍人渾等。修之。裁成二百卷。屬安祿山作亂。止其四分之一。及刺撫州人左輔元。姜如璧等。增而廣之。成五百卷。事物嬰擾。未遑刊削。大歷壬子歲。真卿叨刺于湖。公務之隙。乃與金陵沙門法海。前殿中侍御史李鵬。陸羽。國子助教州人褚沖。評事湯某。清河泉太祝柳察。長城丞潘述。縣尉裴循。常熟主簿蕭存。嘉興尉陸士修。後進楊遂初。崔弘。楊德元。胡仲。南陽湯涉。顏祭。韋介。左興宗。顏策。以季夏于州學及放生池。日相討論。至冬徙于茲山東偏。來年春遂終其事。前是顏渾。正字般佐明。魏縣尉劉茂。括州錄事參軍盧鏗。江寧丞韋

寧、壽州倉曹朱弁、後進周愿、顏暄、沈殷、李莆，亦嘗同修，未畢，各以事去。而起居郎裴郁、祕書郎蔣志、評事呂渭、魏理、沈益、劉全白、沈仲昌、攝御史陸向、沈祖山、周闕、司議邱悌、臨川令沈咸、右衛兵曹張著、兄蕃、弟薦、爲校書郎權器、興平丞韋柏尼、後進房夔、崔密、崔萬、竇叔蒙、裴繼、姪男超峴、愚子頤、願往來登歷，時村山大德僧皎然工于文什，惠達等昧于禪誦，相與言曰：昔廬山東林謝客，有遺民之會，襄陽南峴羊公，流潤浦之詞，況乎茲山深邃，羣士響集，若無記述，何以示將來。乃左顧以求蒙，俾記詞而戴事。銘曰：

夏后南巡，山名是因。梁王東揆，寺榜攸詢。形勝天絕，規模鼎新。避它城古，垂釣臺堙。棚以桂結，浦由黃申。二庾迢遞，三癸嶙峋。徑列御史，傳紆逸人。紛吾著書，羣彥惠臻。海韻鏡源，自秋徂春。編同貫魚，學比成麟。幸託勝引，亟倍僧珍。庶斯見傳，金石不泯。

開府儀同三司行尚書右丞相上柱國贈太尉廣平文貞公宋公神道碑銘

於戲！逆鱗劇上，匡救之義深，守死不回，人臣之致極。況乎文包風雅，道濟生靈，建一言而天下倚平，含九德而三光式序。超無友而獨立者，其惟廣平公乎！公諱璟，字【案】原本邢州南和人。其先出于殷王元子，七代祖弁，魏吏部尚書，襲烈人子。祖欽道，北齊黃門侍郎，并事跡崇高，各見本傳。高祖元節，定州田曹，曾祖弘俊，大理丞。祖務本，皇櫟陽令。父玄，撫衛州司戶，贈戶部尚書。自田曹至于尚書，皆實浮于名，而位不充量。事見許公蘇頌所撰神道碑。公七歲能屬文，一遍誦服鳥賦，丁尚書府君憂，水漿絕口者五日。八九歲時，嘗夢大鳥銜書吐公口中，公吞之，遂乘而直上，倏忽驚悟，猶若下在胷間。自後藻思日新，襟懷益爽。

年十六七時。或讀易曠時不精。公遲而覽之。自亥及寅。精義必究。明年進士高第。補上黨尉。轉王屋主簿。相國蘇味道爲侍御史出使。精擇判官。奏公爲介。公作長松篇以自興。梅花賦以激時。蘇深賞嘆之。曰。眞王佐才也。轉合宮尉。長壽三年。從調判入高等。有司特聞。天后親問所欲。公以代爲唐臣。不求榮達。詭奏云。家本山東。願得魏之一吏。遂手詔授錄事參軍。拜舞趨出。后異而召還。又手詔拜監察御史。裏行。尋丁齊國太夫人憂。服闋。築室反耕。志圖不起。俄而卽眞。遷殿中侍御史。同列有博于臺中者。將責名品而黜之。博者惶恐自匿。翌日。公獨正辭引過。天后悅而釋之。遷天官員外郎。鳳閣舍人。御史中丞。乃謂所親曰。吾比欲優遊自免。不圖要近。驟至于斯。其敢廢所職乎。乃悉心納忠。無所迴避。時張易之。昌宗兄弟。席寵脅權。天下側目。公危冠入奏。奮不顧身。天后失色。蒼黃欲起。公叩頭流血。誓以死爭。拾遺李邕奏曰。陛下坐則天下安。起則天下危。內史令敕公出。公曰。天顏咫尺。親奉德音。不勞宰臣擅宣王命。詞氣慷慨。左右震悚。遂俱攝詣臺庭。立切責。二豎股栗氣索。不敢仰視。自朝至于日昃。敕使馳救之。公不得已而罷。又令詣公謝罪。公拒之。後有慘恤。二豎來弔。公辭曰。貴近不宜與執法通同。假滿朝士慰公。二豎又欲序進。公舉板迎揖之。不得成禮而去。神龍之興復也。公實佐其謀。及當疇庸。讓而不受。曰。清宮問罪。事出五王。祀夏中興。功歸明主。非曰逃賞。誰敢貪天。俄拜朝散大夫。吏部侍郎。兼諫議大夫。遷黃門侍郎。嘗遇梁王武三思于朝。三思方欲言事。公正色謂之曰。當今復子明辟。王宜以侯就第。何得尙干朝政。三思慚懼而退。請急累月。俄而兼攝尙書左丞。玄宗將幸西蜀。深虞北鄙。乃兼檢校并州大都督府長史。又改兼貝州刺

史與數人同辭三思獨揖公住。公顧謂之曰：諸人已出，不可獨留。遂揖之而去。屬年穀不登，國租罷入三思食邑。公悉蠲之。既屢挫其鋒，亦處之自若。俄而真拜轉杭州。又復遷相州。尋入爲洛州長史。唐隆初，拜吏部尚書同中書門下三品。唐隆初，即景雲元年也。是年六月甲申，改元唐隆。七月己巳，改元景雲。環粵之拜命在丁巳，未改景雲之前。故曰唐隆初。宰相表統言之。故曰景雲。五日，兼右庶子。尋加銀青光祿大夫。玄宗之在儲闈，鎮國太平長公主潛謀廢立，嘗于光範門內坐步檐中。諷宰臣以此旨，諸相失色。莫敢先言。公盛氣詰之曰：東宮有大功，宗廟社稷主也。安得異議？遂奏婦人干政，恐生禍階，請不令朝謁。俄而男又縱橫。公奏之。繇是貶楚州刺史。主亦竟以凶終。無何，復拜銀青光祿大夫。兼河北按察使。尋遷幽州都督，兼御史大夫。復爲魏州。入爲國子祭酒。東都留守。開元二年，尋拜御史大夫，兼京兆尹。貶睦州刺史。轉廣州都督。充按察經略討擊使。又兼御史大夫。特許便宜從事。前是首領桀驁，多據洞不賓。公之下車，無敢不饒。彼之風俗，競趨苟簡。茅茨竹櫨，比屋鱗次。火災歲起，燬燼無餘。公教之度材，變以陶瓦。千甍齊翼，萬堵皆興。于今賴焉。燕國公張說，著爲碑頌。無何，使中官楊思勗召公。公拜恩而就馬，便行。在路竟不交一言。思勗以將軍貴幸，泣訴于帝。帝嗟嘆久之。拜刑部尚書。四年，遷吏部，兼黃門，監修國史。五年，改號侍中。明年，幸洛陽。至三嶠，馳道險隘，行不得前。河南尹李朝隱知頓使中丞王怡並坐當降黜。公奏曰：必若致罪二臣，將來必受其弊。遂命公捨之。曰：陛下責之，以臣免之。是過歸于上。恩由于下。臣請使且待罪，然後俾其復職。上遂嘉而從之。玄宗嘗命公名諸皇子及公主，邑號。既而又令各定一美名。公奏稱：七子均養，鴈鳩之德。錫以名號，不宜有殊。若母寵子愛，恐非正家之道。

王化所宜。玄宗悅而從之。八年，拜開府儀同三司，進爵廣平郡開國公，策勳上柱國，狂豎權梁山構逆，長安有司深探其獄，敕公按覆。如京兆司錄李如璧等百餘家，皆以借宅假器，悉當連坐。公以婚姻假借，天下大同。至于京城，其例尤衆，知情卽是同反，無罪不合論辜。兇渠之外，一切原免。天下欣服焉。中書令河東張公傑出將明之材，獨連廟堂之上，鏡機朗澈，見事風生，求公規模，悉閱堂案，每至危言讜議，執正守中，未嘗不廢卷失聲，汗流浹背，其爲通賢所服也如此。十三年，新舊史並作十二年，駕幸東都，以公爲西京留守，公極言得失，無有所隱。玄宗感悅，制曰：所奏之言，置之座右，出入觀省，以誠終身。因賜綵衣二百疋，明年又兼吏部。十七年，拜尙書右丞相，雅善戲謔，不常矜莊，與故戶部尙書王駿爲莫逆之友，晚而彌篤。凡所談諧，人輒疏取，端五日，蒙賜鍾乳，命醫歸鍊，或以爲上藥異殊，不宜委之。公曰：推誠求信，猶懼不應，猜以待人，信其可得。聞者慙退。二十一年，新舊史作二十年，抗疏告老，至于再三，手詔優許，遂特給全祿，賜絹五百疋，還東京。公以爲大臣歸休，不宜關通人事，遂杜絕賓客。其年，新舊史作二十二年，駕幸洛陽，公迎拜道左。玄宗親駐龍蹕，使榮王琬勞問者數四，自後中使往來，賞賚不絕。方崇乞言之典，以極師臣之敬。二十五年仲冬月十九日，寢疾，薨于東都明教里第。享年七十五。天下失聲，玄宗震悼，追贈太尉，諡曰文貞公。賻物米粟常數有加，喪葬官供，仍詔河南少尹崔釋之充監護使。夫人齊國夫人博陵崔氏滄州長史藝之女，淑慎嚴整，高明柔克，訓諸子而慈，且有威，佐丞相而德無違者。門內之理，一以見咨，躡公而歿，允終偕老。嗚呼！公有七子，復同州司功先公而卒，昇尙書郎太僕少卿，尙漢東太守，渾職方郎中，諫議大夫，御史中丞，東京畿

探訪使、太子左諭德、恕、都官郎中、延原少尹、華、判入高等、登封尉、尉氏令、衡、右散騎常侍、兼御史中丞、河南節度行軍司馬、或肅、或父、或哲、或義、克篤前烈、以休令聞、以戊寅歲五月二十九日、虔奉遺約、歸葬公于沙河縣太尉鄉丞相原之先塋、夫人合而祔焉、禮也、惟公間氣降神、應期傑出、生知禮度、天縱才明、玉立殿天子之邦、介然秉大臣之節、震電憑怒、讜言而不有厥躬、鼎鑊沸前、臨事而義形于色、蠹迪檢押、難常情之所易、志深直諒、易古人之所難、外其身而富貴不離、行其道而死生勿替、非夫合一之德、格于皇天不二之心、形于造次、則何以异是乎、允所謂振古之元龜、皇王之威寶者矣、且夫公之德烈、充塞寰宇、公之謀猷、著明日月、大歷五年冬十二月、孫儼懼遺盛美、不遠求蒙、以真卿天祿校文、叨太僕之下列、憲臺執簡、承諭德之深知、雖青史傳信、實錄已編于方冊、而豐碑勒銘、表墓願備于論議、謹憑吏部員外郎盧僎所上行狀、略陳萬一、多恨闕遺、其辭曰、

天命玄鳥、降而生商、湯孫之緒、微子分疆、詞招正則、尉翼文皇、吏部黃門、紛綸耿光、忠賢世出、信史相望、篤生丞相、祚我有唐、文明純嘏、毅烈堅剛、恆衛間氣、星辰降芒、巍然山立、鏗爾金鏘、忠孝之盛、人倫紀綱、垂髻能文、夢鳥發祥、通夕究易、冲齡擅場、勝冠結綬、歷政洋洋、乃尉合宮、貳軺琅琅、賦嗤梅豔、篇美松長、蘇公嗟稱、才必佐王、滿歲從調、試言高驪、登聞黼辰、驟列繡裳、筵跡天官、如珪如璋、司言鳳閣、綸綽煌煌、乃作中丞、威稜莫當、志除兇狡、廷劾二張、天后愕眙、百寮震惶、公獨凜然、出身激昂、義形言色、精貫穹蒼、皇室中興、嘉謀克彰、功成生讓、事軼屠羊、貳職選曹、諫議是匡、載清流品、屢奏封章、乃侍瑣闥、時惟夕郎、

悉心糾正。庶績咸康。三思睢盱。席寵于常。責之就第。慙懼靡亢。左曹攝轄。大鹵于襄。兼刺貝立。朋辭厲行。三思揖語。公獨循牆。處之不怍。轉旆于杭。旣遷鄴城。遂尹洛陽。乃作冢宰。訐謨廟堂。俄兼宮相。亟綰銀黃。玄宗登儲。鎮國是遑。潛謀廢立。謠詠相翔。厥男撓政。累奏愆殃。聿臨楚邦。洵察冀方。總督幽薊。翻飛國庠。亞相烈烈。尹京趨趨。旋臨建德。歛莅南荒。俚帥咸蕝。茅橈是攘。張公頌德。雋永甘棠。所忠來召。拜命卽裝。略無交言。帝用式臧。載司刑吏。八座抑揚。兼監黃樞。鈞軸是將。匪躬審審。終始泔泔。乃拜儀同。允釐保鄣。河東閱故。汗洽流漿。狂豎犯關。兇渠旣戕。命公覆獄。咸脫死亡。乃陟右揆。讜論泱泱。每譴王君。豈常矜莊。懸車告老。庶保康強。方崇饋醑。孤映縑緗。天不愍遺。萎哲壤梁。一人震悼。九有淒涼。市旣罷賈。春仍絕糧。乃贈太尉。飾終禮滂。返葬沙河。羽儀央央。闔朝傾祖。河尹護喪。生榮死哀。行路感傷。令人孺慕。攀泣嗷嗷。高墳崔嵬。鉅鹿劇旁。森梢宰樹。繚繞連岡。吁嗟廣平。宅此不暘。孝孫翼翼。論譏靡忘。豐碑堅碣。萬古營相。

開府儀同三司太尉兼侍中河南副元帥都知河南淮南淮西荆南山南東五道節度行營事東都留守上柱國贈太保臨淮武穆王李公神道碑銘

昔宗周之中興也。時則有若方叔召虎。總師干肇敏之業。南威蠻荆。東截淮浦。以左右宣王。詩人歌之。列在風雅。我皇唐之反正也。時則有若臨淮汾陽。秉文武忠義之資。廓清河朔。保乂王室。翼戴三聖。天下之人。謂之李郭。異代同德。今古一時。公諱光弼。京兆萬年人也。曾祖皇左威衛大將軍幽州經略軍副使府君諱令節。祖鴻臚卿兼檀州刺史府君諱重英。父雲麾將軍左領左羽林二軍大將軍朔方節度副使。薊

郡開國公。贈幽州都督司空。諱楷洛。皆以英果沈勇。累葉將邊。懔威稜于幽碣。公卽薊公之第四子也。體渾元之正性。秉弘毅之高躅。天子純嘏。生知禮度。謨謀炳遠。默識沖深。傑出經武之才。鬱爲興王之佐。故能東征北伐。厭難康屯。挺草昧不世之功。允蒼生具瞻之望。社稷威寶。公之謂歟。初天后萬歲中。大將軍燕國公武楷固爲國大將。威震北陲。有女曰今韓國太夫人。才淑冠族。嘗鑒之曰。爾後必生公侯之子。因擇薊公配焉。後果生公。公年六歲。嘗撫鹿而遊。薊公視而誨之曰。兒勿更爾。公振手而起。遂絕不爲童戲。未冠。以將門子。工于騎射。能讀左氏春秋。兼該太史公班固之學。開元中。起家左衛左郎。將歷豐夏二都督府長史。尋遷別駕。加朝散大夫。丁父憂。以毀聞。終喪不入妻室。太夫人高明整肅。有慈有威。公下色怕聲。承順而每竭其力。雖已官達。小不如意。猶加誨讓之責。故能濟其勳業。天寶二年。拜寧朔郡太守。四載加左清道率兼安北都護。仍充朔方行軍都虞候。五載充王忠嗣河西節度兵馬使。加游騎將軍。守右領軍。賜紫金魚袋。仍充赤水軍使。八月。襲封薊郡開國公。八載遷右金吾衛將軍。充節度副使。以破吐蕃及招討吐谷渾。加雲麾將軍。左武衛大將軍。十一載拜單于副都護。十三載爲安思順朔方節度兵馬使。思順慕公信義。請爲婚姻。公辭不獲免。遂託疾罷官。西平王哥舒翰聞而趨之。奏歸京師。遂守道屏居。杜絕人事。十四載冬十一月。安祿山反。范陽天下驛騷。朝廷旰食。聿求虓鬪之將。爰統鷹揚之師。明年春正月。起公爲銀青光祿大夫。鴻臚卿。兼雲中郡太守。攝御史中丞。持節充河東節度使。支營田副大使。知節度事。仍充大同軍使。二月。拜攝御史大夫。魏郡太守。充河北道採訪使。俄除范陽郡大都督府長史。充范陽

節度使初公以勦方馬步八千人出土門其月既望收常山郡前是太守顏杲卿長史袁履謙殺祿山土門使季欽湊擒其心腹高邁何千年屬太原尹王承業不出救兵杲卿履謙爲史思明所陷戰士死者貽藉于津池之上公親以衣袂拂去其上沙塵因慟哭以祭之分遣恤其家屬城中莫不感激一心史思明正圍饒陽馳來拒戰公屢摧陷之詔拜公兼御史大夫俾今尙書令汾陽王郭子儀悉朔方之衆與公合勢南收趙郡又敗之于沙河夏六月戰于嘉山大敗之斬獲萬計思明露髮跣足奔于博陵窮蹙無計歸節于祿山祿山大恐逆徒幾潰屬潼關不守肅宗理兵于靈武盡追朔方之師加公太原尹公以麾下及景城河間之卒數千人至秋八月拜戶部尙書同中書門下平章事史思明既有河北之地與蔡希德悉衆來攻累月不克而退公自賊逼城于東南角張帳次居止竟不省視妻子每過府門未嘗回顧是後決遣事務僭宿方歸至德二載拜司徒冬十二月十五日肅宗旣還京師策勳換司空兼兵部尙書封鄭國公食實封八百戶公弟光進亦以懋功同制封拜乾元元年八月拜侍中其年冬十月與九節度圍安慶緒于相州明年春三月史思明至滏陽屢絕我糧道衆咸請公簡精銳以擊之交鋒竟日思明奔北于百里之外公反旆而歸煙塵亘天諸將皆以爲賊軍大至遂南渡黃河公至則無見矣迺歸于太原是年夏五月除范陽節度使尋代汾陽王爲朔方節度使秋八月充天下兵馬副元帥以數千騎東巡追兵馬使張用濟會于汜水用濟獨來上謁公數其罪而斬之因迫都知兵馬使御史大夫僕固懷恩懷恩中夜馳赴魚貫而前再宿遄至秋毫不敢犯公趣河而東及滑州聞史思明已過河遂迎強旅以至東京移

驍留守及官吏等悉皆迴避。公獨與麾下趣河陽橋城。賊先鋒已下倒愁坂。公至石橋。命秉燭徐行。一夜方達。賊望之不敢近。思明來至城下。請見。公已于城上謂之曰。我三代無葬地。一身必以死國家之患。爾爲逆虜。我爲王臣。義不兩全。我若不死于汝手。汝必死于我手。將士聞之。無不激勵。相持凡八月。思明暴露。不敢入東京。乾元二年冬十月甲申。賊將周贄悉河北之衆萃于河陽城北。思明以河南之衆頓于河陽南城之南。南北夾攻。表裏受敵。公設奇分銳襲其虛。而大破贄軍。臨陣擒其大將徐璜。玉殺獲略盡。贄僅以身免。收軍資器械不可勝數。思明心悸氣索。煙火不舉者三日。官軍大振。初公以爲戰者危事。勝負難必。每臨陣。嘗貯伏突于靴中。義不受辱。至是登城。西向拜舞。因歎歎不自勝。三軍見之。無不淚下。三年春正月。遷太尉兼中書令。其年改元上元。冬十一月。攻拔懷州。擒其僞節度安太清。二年春二月。統僕固懷恩自河陽趨河清。與史思明合戰于邙山。屬風雨晦冥。王師不利。公收合餘卒。屯于垣縣。遂引過請罪。懇讓太尉。肅宗不能違之。二月。拜開府儀同三司。中書令兼河中尹。節度使。夏五月。十有一日。復拜太尉兼侍中。充河南副元帥。都知河南淮南淮西山南東荆南五道節度行營事。出鎮臨淮。時史朝儀乘邙山之捷。圍逼申安等一十三州。自領精騎圍李岑于宋州。公之將吏皆兇懼。議南保揚州。公謂之曰。臨淮城池卑陋。不堪鎮遏。不如徑赴彭城。俟其東寇。躡而追之。賊可擒也。遂趨徐州。因召田神功宴慰。與同寢宿。以宋州之難告。祖道郊外。俾先飲以寵之。分麾下隸于其將喬岫。仍令兵馬使郝庭玉與岫犄角而擊之。賊遂一戰而走。使來告捷。公已屈指俟報。俄而吉語至焉。今上登極。寶應元年夏五月。進封臨淮郡王。廣

德元年秋七月加實封三百戶。遷前後凡二千戶。賜鐵券名藏太廟。仍圖畫于凌烟閣。冬十一月上在陝州。以公兼東都留守。制書未下。久待命于徐州。將赴東都。屬疾痢增劇。公知不起。使使齎表奉辭。廣德二年秋七月五日己亥。薨于徐州之官舍。初將吏等問以後事。公曰。吾久在京中。不得就養。今爲不孝子矣。夫復何言哉。因取已封布絹各三千疋。錢三千貫。鬻麥以分遺將士。衆皆感痛不自勝。及公云亡。遂以其布爲公製衣。庚申哀問至上都。上痛悼之。輟朝三日。太夫人一慟而絕。終夕方蘇。上使開府魚朝恩就宅。敕諭京兆尹第五琦監護喪事。九月己未。追贈太保。十二月太常議行。諡曰武穆。夫人薛國夫人。太原王氏。曩長子太僕卿義忠。並先公而逝。次曰太府少卿太僕卿象。殿中丞彙等。皆保家克荷。備聞詩禮。無忝燕翼過庭之訓。冬十一月二十七日庚申。泣而咨于王母。虔窆公于富平縣先塋之東。禮也。於戲。公以吉甫文武之姿。兼樊仲將明之德。王國多難。羣醜構紛。藉朔方偏師之旅。入井陘不測之地。思明挫銳于恆定。祿山絕望于江淮。守太原而地道設奇。保河陽而雲梯罔冀。破周贛于溫沈。擒太清于覃懷。走史朝義。叛渙之衆于梁宋。救僕固瑒已危之軍于瀛莫。皆意出事外。敵墜計中。天下無贅旒之患。此皆公之力也。公兄遵宜。遵行。仕至將軍。曩弟光瑛。並不幸早世。次曰光顏。特進鴻臚卿。皆有才略。見稱時輩。季曰光進。拜檢校太子太保。兼御史大夫。渭北節度使。涼國公。清讜表微。沈謀絕衆。剛亦不吐。柔而能立。與公並時。仗鉞分關。凌霄翼聖。既有戴天之功。華原統帥。獨聞禁暴之德。方當會同正至。榮耀君親。入侍黼帷。峨二貂乎秦階之上。歸聯綵服。頓雙節于高堂之下。斯歎未劇。遺恨何居。昔斛律丞相與弟并州。同務烈于北

齊賀拔行臺與兄荊州亦宣力于西魏咸稱義烈各懋勳庸而風樹寂寥偏偶隘陜比之我族事則不侔
眞卿昔守平原困于兇羯繫公莅止獲保餘生束帶與居空想北平之禮操觚論議敢墜中郎之辭銘曰
安史猖狂傲擾皇綱降生臨淮佐我興王惟此臨淮萬夫之望爰初發迹罔或弗臧出入忠孝人倫激昂
其心鐵石其行圭璋天寶未造河朔恆懷天子命公經營冀方沙河嘉山我伐用張思明歸節祿山震惶
潼關弗帥醜虜其亡肅宗有命大鹵于襄應變如神兇徒靡亢介珪入覲台座用光俾公東征北國是皇
長圍鄴下望入河陽擒斬渠魁霆擊龍驤淮潰鎮定徐土翱翔服田蠶屈料場鷹揚不有神算疇戡暴強
弟兄同時乘鉞煌煌方期凱旋雙映旗常晨趨法座夕慶高堂如何不辰愆此百祥素輶反葬白驥踟箱
簫鼓悲鳴羽儀分行萬乘致祭千官送喪生榮死哀身歿名揚渭水川上壘山路旁惟餘豐碑突兀連岡
往來必拜萬古沾裳

文忠集卷五

碑

河南府參軍贈祕書丞郭君神道碑銘

夫駢驥千里之足。踣于庭唐之內。鴻鵠四海之志。輟于墜溲之羽。此僞儻奇偉之士所爲嘆息者也。取之于人在于郭君矣。君諱揆。字良宰。太原人也。郭本號叔之後。春秋暴漢。細侯得政事之美。有道冠人倫之目。素絲作詠。青溪招隱。信爲多士。宜稱盛族。五代祖昶。隋驃騎大將軍。開府儀同三司。高祖澄。皇朝朔方道大總管。涇。鄜。坊。慶。丹。延。夏七州刺史。贈荊州都督。諡曰忠。曾祖某。朝散大夫。太子洗馬。祖義。朝議大夫。贈鄭州刺史。父虛己。銀青光祿大夫。守工部尙書兼御史大夫。蜀郡大都督府長史。持節充劍南節度度支營田副大使。本道并山南西道採訪處置使。上柱國。贈太子太師。諡曰獻君。生而聰明。不爲戲弄之事。長而清峻。罔雜綺紈之流。辯對則江夏之童。志意則山東之妙。大夫府君以其于氏之出。故幼名封奴。嘉有應務之器。故長字良宰。蓋取待封宰割之義也。觀其言必顧行。動必由禮。讀書不取其糟粕。爲仁罕忘于造次。亦足以保其嘉名。楚之正則。漢之臺卿。乃其比也。年十七。崇文生明經及第。侍郎韋陟揚言于朝。稱其稽古之力。許其青冥之價。後調集。侍郎李彭年嗟君所判。足冠後生。擢才子于公庭。賀大夫于私第。美聲洋溢。時莫與京。授太常寺太祝。加敬蒞事。陳信正辭。每巡陵及郊。必有歌咏。潘河陽籍田之賦。顏光

祿明祀之作。復見前賢之致矣。無何。改授河南府參軍。天寶五載。大夫總度瀘之師。緊君奉循陔之養。南中污下。遂得氣疾。先大夫憐其寢劇。命訪秦醫。太夫人懼其不起。繼自蜀至。何神不禱。靡藥不嘗。依親自強。望父增嘆。以天寶八載二月十八日。終於安輿之私第。時年二十四。皇帝聞而悼之。贈祕書丞。嗚呼。斯人不起。子丕未識。亦可爲長慟者矣。君子曰。夫孝弟之至。絜矩之道。文章之絕。周旋之儀。可謂成人矣。方將培雄風。罩白石。憐乎得二。幾乎第一。是以其疾。卽御醫坐門。其亡。卽天使歸贈。陳師境上。推以雨露之私。修文地下。贈以蓬萊之職。弔客多其文行。操誅盡于作者。以五月二十一日。葬于首陽鄉大塋之側。君志也。先大夫懿其天姿。親疏行狀。敘其參玄之美。歎其老成之風。方崇南峴之碑。以慰西門之感。伏滔受遇。爲人父也。若斯。祁奚至公。其知子也如此。斯文未建。頽山遂及。太夫人東海于氏。凌虛墜翼。開臧悼心。望汝絕歸來之期。抱孫有無時之哭。遂成刊刻之意。以寄零落之哀。銘曰。

粲粲門子。菲菲國香。家傳玉樹。人詠金相。風流小褚。才貌潘郎。一經自達。六義名揚。聞于密啓。實此周行。爲子道備。從親路長。旣銘絕壁。亦奉垂堂。霧露成病。膏肓遂亡。天向京兆。墳歸洛陽。江壘初流。水毀寒霜。茫茫蔓草。蕭蕭白楊。苦月墳上。豐碑道傍。披文相質。誰不沾裳。

右武衛將軍贈工部尚書上柱國上蔡縣開國侯臧公神道碑銘

公諱懷恪。字貞節。東莞人。其先出于魯孝公之子彊。字子臧。大夫不得祖諸侯。其孫以王父字爲氏。僖哀二伯旣納。忠于魚鼎。文武兩仲。亦不朽于言哲。丈人成功而遁跡。子原抗節而捨生。義和辭金飾之器。榮

繕奮陽秋之筆。賢達繼軌。紛綸至今。曾祖滿隋驃騎將軍。祖龍皇通議大夫。靈州都督府長史。父善德。朝散大夫。贈銀州刺史。咸務遠圖。克開厥後。恤胤之慶。世祀宜哉。公卽銀州之第三子也。身長六尺一寸。眉目雄朗。鬚髯灑秀。雅善騎射。尤工尺牘。沈靜少言。寬仁得衆。奇謀沖邈。英勇冠倫。友于弟兄。謹爾鄉黨。每敦詩而執禮。不苟柔以吐剛。蒞事而剖判泉流。臨戎而智略鋒起。古所謂文武不墜。高明有融者焉。少以勳勞。亟紆戎級。開元初。嘗遊平盧。屬奚室韋大下。公挺身與戰。所向摧靡。繇是發名。玄宗聞而嘉之。拜勝州都督府長史。銳精佐理。絜矩當官。朔漠不空。邊隅用人。俄拜左衛率府左郎將。轉右領軍中郎將。兼安北都護中受降城使。朔方五城都知兵馬使。戎事齊足。十萬惟羣。我伐用張。軍威以肅。由是深爲節度使王峻所器。奏充都知兵馬使。嘗以百五十騎遇突厥。斬啜八部。落十萬餘衆于狼頭山。殺其數百人。引身據高環馬禦外。矢來如雨。公徒且殲。遽而給之曰。我爲臧懷恪。敕令和汝。何得與我拒戰。于時僕固懷恩父設之。適在其中。獨遮護之。諸部落持疑不肯。公剖羊以盟之。仗義以責之。衆皆感激。由此獲免。遂與設之部落二千帳來歸。後充河西軍前將。盤禾安氏有馬千駟。怙富不虔。一族三人。立皆毆斃。軍中悚慄。疇敢不祗。俱爲節度相國蕭嵩所賞。後充河源軍使。兼隴右節度副大使。關西兵馬使。拜右武衛將軍。吐蕃不敢東向者累年。俄封上蔡縣開國侯。開元十二年歲次甲子。春二月二十有六日。薨于鄴城之官舍。享年五十有六。其年八月二十三日。詔曰。故具官某。頃以幹能。亟承任使。操行逾謹。勞效未酬。不幸遷殂。良增追悼。可贈右領軍衛大將軍。卽以其年冬十月庚戌。遷窆于京兆府三原縣北原。禮也。嗚呼。公兄左羽

林軍大將軍平盧副持節懷亮以方虎之才膺爪牙之任孔懷斯切致美則深七子遊擊將軍崇仁府折衝希崇豐州別駕贈宋州刺史希昶左武衛將軍朔方節度副使贈太子賓客希忱右衛左郎將劍南討擊副使贈汝州刺史希悖右驍衛郎將靜邊軍使贈祕書監希景寧州刺史左金吾衛將軍贈揚州大都督希晏開府儀同三司行太子詹事兼御史大夫邠寧山南觀察使集賢待制工部尚書渭北節度使魯國公希讓等夙漸詩禮恭承教義芬潤挺蘭王之姿英威鬱虢之質而希讓識度弘遠器謀沈邃仁親以孝殿國以忠綽裕冠于人倫勳勞懋于王室至德中今上爲元帥東伐肇允押牙從收兩京陟降左右入侍帷幄旣崇翼戴之功出擁麾幢載叶澄清之寄加以篤睦羣從糾綏宗族吉凶瞻恤終始無渝行道之人孰不嗟尙肅宗以公有謀翼之勤乾元三年春三月贈魏州刺史寶應元年冬十月又贈太常卿廣德元年冬十月詔曰孝以立身可揚名于後世忠能事主故追榮而及親開府儀同三司兼御史大夫元帥都虞候魯國公臧希讓亡父贈太常卿懷恪業茂勳賢地華簪紱佩忠信而行己包禮樂以資身守節安卑幽貞自處養蒙全正聲利不營雖與善無徵促齡悲于逝晷而積善垂裕餘慶光于後昆故得業濟艱難功參締構出有藩條之寄入多爪牙之位以德遷禮宜加等父由子貴贈合超倫宜登八座之榮式慰九原之路又贈工部尚書褒異之典于斯爲盛臧氏自驃騎而下世以材雄朔陲尙書旣還特以功懋當代兄弟子姓勳賢間出自天寶距于開元乘朱輪而拖珪組者數百人迨于今茲繁衍彌熾綰軍州而握兵要者相望國都有後之慶固殊異于他族者矣真卿早歲與公兄子謙爲田蘇之游敦伯仲之契

晚從大夫之後。每接嘗寮之歡。故公之世家。竊補見聞。敢述遺烈。將無愧辭。銘曰。

魯史褒者。臧孫有之。陳魚則諫。納鼎以規。歿貴言立。時稱聖爲。仁昭典墳。智叶蓍龜。世濟忠肅。光光羽儀。以至夫公。英明雄毅。鸚視騰彩。龍驤作氣。鋒淬霜稜。妙窮金匱。謀猷泉瀉。翰墨風駛。儒勇是兼。勳庸以位。介馳戎馬。猛奮虓虎。絕漠援孤。連兵戰苦。萬虜鳴鏑。紛紛如雨。一身抗詞。諤諤連柱。精貫雲日。氣雄征鼓。狄人義激。僕固誠全。眇漫窮裔。隨降幾千。野靜沙雪。風恬塞煙。我騎如雲。我旗連天。牧無南向。凱有北旋。天子休之。命侯開國。謂福而壽。康衢騁力。奚命之遭。幽局是卽。十城玉折。萬里鵬息。陣雲蒼蒼。日暮無色。令人趨奉。天眷孔明。九原不作。八座哀榮。勇列徽範。芳時懿名。里成冠蓋。族茂簪纓。萬古千祀。瞻言涕零。

東莞臧氏紉宗碑銘

德有三。孝弟稱其至。常有五。仁道原其終。故興化所自。則曰侯其在矣。死喪相恤。疇能亦莫吾聞。脊鴿于焉。譬急難。常棣所以勗跗。尊紉宗綏族。所貴因之。誰其庶乎。吾見之于臧氏矣。爰自伯禽國魯。公子氏疆。魚賂大諫于僖。哀言聖兩垂于文武。朗陵會吳而滅蜀。東郡感張而絕袁。建議而辭器歸高。奮筆而陽秋與直。賢明之盛。今古莫崇。積慶所鍾。克生隋驃騎將軍府君諱滿。滿生皇朝通議大夫靈州都督府長史府君諱寵。寵生銀青光祿大夫銀州刺史贈太子少師諱善德。咸懷忠良。克續徽烈。古稱有後。今見其然。少師生三子。曰右武衛將軍贈幽州大都督懷慶冠軍左羽林大將軍兼營府都督御史中丞充平盧節度採訪兩蕃使懷亮。河源軍使安北都護右領軍將軍上柱國上蔡縣開國侯累贈太常卿魏州刺史工

部尚書懷恪。皆行冠人倫。才兼文武。並時迭將。爲國虎臣。朔漠之間。峻風斯在。其功庸志業。各具三原。縣先塋神道碑。懷慶五子。曰左金吾中郎將范陽節度經略副使希古。右威衛將軍中受降城使希真。殿中監朔方經略副使希賓。原州長史監牧副使希咄。銀青北平太守仍充軍使希逸。懷亮五子。曰勝州都督朔方節度副使敬廉。金紫文安太守范陽節度副使希莊。左清道率幽州經略副使敬之。太常卿特進武州刺史今上元帥都知兵馬使讓之。左監門將軍敬此。懷恪七子。曰右衛中郎將贈【案】原本州刺史希崇。豐州別駕贈宋州刺史希昶。左驍衛中郎將贈太子賓客希忱。忠武將軍贈汝州刺史希愔。壯武將軍左威衛中郎將贈祕書監希景。雲麾麟寧三州刺史左金吾將軍左街使贈揚州大都督希晏。魯國公希讓。並稟訓義方。丕崇閎閱。遭逢明盛。備展材良。能挺虓鬪之姿。學蘊韜鈴之略。糅蘭玉而輝映階庭。畫隼熊而光聯旗軾。勳庸之盛。當世無倫。源長流深。德盛祀遠。開元天寶間。宗族之紆青紫。佐麾幢者。已數十百人。迨乎今上當二。而諸孫冠軍左羽林將軍贈太子詹事彥英。忠武左清道率瑗。左清道率則。少府監彥侄金紫太僕卿涉。特進殿中監玠。左金吾大將軍彥璟。正議湖州長史隨。並不幸早世。銀青棣州刺史瑜。特進殿中監慈州刺史瑀。特進鴻臚卿均。特進太常卿彥昭。開府太常卿彥嵩。正議杭州別駕巽。銀青鴻臚少卿渙。鴻臚卿頤。朝散明州長史叔獻。少府監楚卿。朝散台州司馬晉卿。朝散洋州司馬叔雅。符寶郎齊卿。涇陽縣【案】原本一字。雲卿。左金吾衛長卿。千牛叔卿。京兆府參軍叔清。【案】此下原本缺

容州都督兼御史中丞本管經略使元君表墓碑銘

嗚呼。可惜哉。元君君諱結。字次山。皇家忠烈。義激文武之直清臣也。蓋後魏昭成皇帝孫。曰常山王遵之。十二代孫。自遵七葉。王公相繼。著在信史。高祖善樟。皇朝尙書都官郎中常山郡公。曾祖仁基。朝請大夫。襲信令襲常山公。祖利貞。唐書作名亨字利貞。霍王府參軍。隨鎮改襄州。父延祖。清淨恬儉。歷魏城主簿。延唐丞。思聞輒自引去。以魯縣商餘山多靈藥。遂家焉。及終。門人諡曰太先生。寶應元年。追贈左贊善大夫。君聰悟宏達。倜儻而不羈。十七始知書。乃受學于宗兄德秀。常著說楚賦三篇。中行子蘇源明駭之。曰。子居今而作真淳之語。難哉。然世自澆浮。何傷元子。天寶十二載。舉進士。作文編禮部侍郎陽浚。曰。一第汙元子耳。有司得元子是賴。遂登高第。及邊寇首亂。逃難于猗玕洞。因招集鄰里二百餘家奔襄陽。玄宗異而徵之。君移居濃溪。乃寢。乾元二年。李光弼拒史思明于河陽。肅宗欲幸河東。聞君有謀略。虛懷召問。君悉陳兵勢。獻時議二篇。上大悅。曰。卿果破賊。朕憂遂停。拜君右金吾兵曹。攝監察御史。充山南東道節度參謀。仍于唐鄧汝蔡等州招輯義軍。山棚高冕等率五千餘人。一時歸附。大壓賊境。于是思明挫銳。不敢南侵。前是泌南戰士積骨者。君悉收瘞。刻石立表。名之曰哀丘。將吏感焉。無不勇勵。璽書頻降。威望日隆。時張瑾殺史闢于襄州。遣使請罪。君爲聞奏。特蒙嘉納。乃真拜君監察。仍授部將張遠。田瀛等十數人將軍。屬荆南有專殺者。呂誣爲節度使。誣辭以無兵。上曰。元結有兵在泌陽。乃拜君水部員外郎。兼殿中侍御史。充誣節度判官。君起家十月。超拜至此。時論榮之。蜀道士申泰芝誣湖南防禦使龐承鼎謀反。并判官吳子宜等。皆被決殺。推官嚴郢坐流。俾君按覆。君建明承鼎。獲免者百餘家。及誣卒。淮西節度使王仲鼎爲

賊所擒。裴茂與來瑱交惡。遠近危懼。莫敢誰何。君知節度使觀察使。事經八月。境內晏然。今上登極。節度使留後者例加封邑。君遜讓不授。遂歸養親。特蒙褒獎。乃拜著作郎。遂家于武昌之樊口。著自釋以見意。其略曰。少習靜于商餘山。著元子十卷。兵起逃難于猗玕洞。著猗玕子三篇。將家濃濱。乃自稱浪士。著浪說七篇。及爲郎。時人以浪者亦漫爲官乎。遂見呼爲漫郎。著漫記七篇。及家樊上。漁者戲謂之聲叟。歲餘。上以君居貧起家。爲道州刺史。州爲西原賊所陷。人十無一。戶纔滿千。君下車。行古人之政。二年閒歸者萬餘家。賊亦懷畏不敢犯。旣受代。百姓詣闕請立生祠。仍乞再留。觀察使奏課第一。轉容府都督兼侍御史。史本管經略使。仍請禮部侍郎張謂作甘棠以美之。容府自艱虞以來。所管皆固拒山谷。君單軍入洞。親自撫諭。六旬而收復八州。丁陳郡太夫人憂。百姓詣使請留。大歷四年夏四月。拜左金吾衛將軍兼御史中丞。管使如故。君矢死陳乞者再三。優詔褒許。七年正月。朝京師。上深禮重。方加位秩。不幸遇疾。中使臨問者相望。夏四月庚午。薨于永崇坊之旅館。春秋五十。朝野震悼焉。二子以明能世其業。名雖著而官未立。以其年冬十一月壬寅。虔葬君子魯山青嶺泉陂原。禮也。嗚呼。君其心古。其行古。其言古。躬是三者。而身重于今。雖擁旌麾。總戎于五嶺之下。彌綸秉憲。對越于九天之上。不爲不遇。然以君之才之德之美。竟不得專政方面。登翼太階。能不爲之感激太息也。君雅好山水。閒有勝絕。未嘗不枉路登覽。而銘贊之感。中行見知之恩。及亡。至今分宅以恤其子。其不偷也多此類。中書舍人楊炎常袞皆作碑誌。以抒君之志業。故吏大歷令劉袞。江華令瞿令問。故將張滿。趙溫。張協。王進等。感念舊恩。送哭以終喪。竭資鬻石。願

垂美以述誠。眞卿不敏。常忝次山風義之末。尙存靈往。敢廢無愧之辭。銘曰。
次山斌斌。王之薰臣。義烈剛勁。忠和儉勤。炳文華國。孔武寧屯。率性方直。秉心眞純。見危不撓。臨難遺身。
允矣全德。今之古人。奈何清賢。素志莫申。羣士立表。垂聲不泯。

文忠集卷六

碑

特進行左金吾衛大將軍上柱國清河郡開國公贈開府儀同三司兼夏州都督康公神道碑銘

竭誠奉主之謂忠。率義忘窮之謂勇。忠勇不犯。則名登于明堂。子仕教忠之謂慈。戰陣能勇之謂孝。孝慈有裕。則道存乎方冊。兼此四者。其惟清河公之族乎。公諱阿義。屈達于姓。康氏。柳城人。其先世爲北蕃十二姓之貴種。曾祖頡利部。落都督。祖染可汗。駙馬都知兵馬使。父頡利發。墨噶可汗。衛衙官。知部落都督。皆有功烈。稱于北陲。公卽衙官之子也。正直忠鯁。以信行聞。爲國人所敬。長于謀略。工騎射。其弓十鈞。二。十三爲阿史那頡佚。施默噶等九可汗宰相。秉心顯一。立言無二。不吐剛以茹柔。必蹈道而履義。可汗每有過失。未曾不極言切諫。蕃黨中重焉。以比國家之丞相宋璟。初默噶弟拔悉密時。勤嘗擊藥。弑可汗。公竊而藏之。密持示默噶。默噶大怒。將誅之。公以爲請。但令歸于部落。默噶知公至忠。繇是益加親信。同列四人。莫與公比。其後公以孤直屢見疑譖。遂請退歸。可汗察公非罪。尋復追爲宰相。先是毗伽可汗小殺爲其大臣梅錄噶所毒。小殺覺之。盡滅其黨。旣卒。國人立其子伊然可汗。無何病卒。又立其弟登利可汗。華言登利。猶可報也。其母噉欲谷之女。與其小臣飢斯達干預國政。登利從叔父。因左殺右殺。東西分掌其兵馬。登利與其母誘斬西殺。盡并其衆。左殺懼及。乃攻殺登利。自立爲烏蘇米施可汗。拔悉密擊敗之。

脫身遁走。國中大亂。天寶元年。公與四男及西殺妻子。默噉之孫勃德支持勒毗伽可汗。女大洛公主。伊然可汗小妻余塞匄。登利可汗女余燭公主。及阿布思。阿史德等部落五千餘帳。并駝馬羊牛二十餘萬。款塞歸朝。朔方節度使王斛斯具以上聞。秋八月至京師。玄宗俾先謁太廟。仍于殿庭引見御花萼樓。以宴之。仍賦詩用紀其事。拜公左威衛中郎將。屬范陽節度使安祿山潛懷異圖。庶爲己用。密奏公充部落都督。仍爲其先鋒使。公旣不得已。僂從之。四載以破契丹功。遷右威衛將軍。俄拜范陽經略副使。五載又破契丹功居多。拜左武衛大將軍。仍充節度副使。玄宗嘉之。璽書慰勉。盈溢篋笥。十四載冬十一月九日。甲子。安祿山反。范陽公以天子有命。陷身兇逆。舉家見質。自拔莫由。旣至東歸。公泣血顛天。次于寤寐。欲與諸子逃歸國家。爲賊邢州刺史康節所告。遂被收繫。僭奏被誅者二十餘人。公之四子各奔于外。賊恐衆情不安。貫之而後出。至德二載。闔門二百餘口被安慶緒脅至安陽。屬今上爲天下兵馬元帥。統今尙書令汾陽王郭子儀朔方之師。諸節度回紇之衆。東收二京。公率四子及孫姪等十餘人。冒死南奔。至汲郡。爲從者所告。家人殲焉。二子沒野波英俊挺身行前。二子屈須彌施英正持滿殿後。沒野波妻阿史那氏爲公控馬。登于西山。至高平界。遇賊蔡希德以精騎三百遮路。邀擊沒野波英俊。馬奔之。殺四十餘人。生擒四人。冬十有一月七日。投今上行營至焉。帝聞而嘉之。欲以開府儀同三司處公。仍加實封。公固辭乃受。因以爲金吾衛大將軍。加特進。增封清河郡開國公。食邑三百戶。策勳【案】原本衛大將軍【案】原本。本缺【案】原本射【案】原本。開府儀同三司。太常卿殿前衙門射生兵馬。俄加上柱國。姑臧縣開國子。

沒野波雲鷹將軍左金吾衛大將軍上柱國射生散騎常侍驍騎大將軍左武衛大將軍兼鴻臚卿上柱國殿前射生使清河郡開國公英俊等官秩各有差。因留公及屈須彌施英正供奉射生。以沒野波英俊勇冠三軍。並令東隨。故太尉李光弼于太原後鄴郡瓦窰陣。官軍與安慶緒相逼。王思禮爲其所敗。賊勢旣盛。太尉與思禮相顧氣索。沒野波英俊勃然奮怒。遂直抵薄河。當鋒擊之。殺獲二千餘人。賊衆方退。太尉諸公覩而駭之。賞雜綵百疋。並以轉分麾下。一無所納。三軍欽羨焉。沒野波居常謙謹。臨事勇銳。戰則先鋒。前無強敵。捉生遊奕。所向必摧。九節度之圍安陽也。史思明悉衆來救。沒野波以十五騎過河逆擊之。并馬刺倒者數人。生擒數十人。後擊懷州。思明又自來救。匆爽之際。屢軼柴籬。沒野波領甲騎三十禦之。賊軍五千人。一時摧敗。真卿之棄平原也。沒野波爲賊騎將。緩策不追。及聞渡河。然始奔躡。是以得脫于難。平原人至今稱之。英俊瞪視眈眈。姿氣雄果。發勁矢。持大槍。巍然萬衆之中。左右馳突。無不辟易。而退。嘗隨太尉討思明于河陽。賊驍騎萬餘于中闌城索鬪。將莫敢應者。英俊挺身奔擊之。應槍落者二十餘人。英俊被槍刺頰。貫喉而出。擺首而去之。猶殺二人而還。太尉壯焉。遂以從父兄子妻之。故天下之言勇者。以沒野波英俊兄弟爲稱首。廣德元年。上幸陝州。公之諸子皆當扈從。公以體貌瓌碩。難于舉動。方與之死訣。沒野波妻爲公介馬。扶奔華州。公慮不免。謂左右曰。我若爲賊所得。無累我兒子乎。汝曹何不殺我。衆人感懼。叫然皆哭。遂竭力昇公。至于行在上。深嗟賞之。方極尊榮。以終宴喜。上天不惠。以二年青龍甲辰冬十有一月二十日甲寅。感肺疾薨于上都勝業坊之私第。春秋七十有五。親事左右。莫不撻面。

截耳以哭。初凌霄之難。公實援立。澧水之屯。公親總統。上之反正。父子從焉。帝疇厥功。遂有開府儀同三司。兼夏州都督之贈。夫人清河郡太夫人交河石氏。左衛中郎將珍之孫。左金吾衛大將軍三奴之女。溫敏淑慎。柔明端雅。有女師母儀之德。克懋于家。不幸遭疾。以天寶十五載春三月八日先公而薨。永泰元年春二月十日壬申。與公合祔于萬年縣之長樂原禮也。嗚呼。公以沈果之姿。抗英威之志。降精昴宿。炳粹天街。忠肅表于生知。義勇形于造次。屬國家多難。淪胥以痛。壯一心而來事我君。貫四時而不改柯葉。義方懇到。相攜于巽閭之中。臣節激昂。三見于危亡之際。天子感焉。既受腹心之託。禁旅資焉。俱列爪牙之地。勳庸克茂。聲問攸歸。叢綵衣于玉帳之前。羅五戟于一門之內。不其盛矣。昔蕭相國舉宗佐命。金日磾七葉珥貂。望古儔今。可謂同德。其孤等窮人孺慕。靡所寘哀。聿求不腆之辭。庶播無疆之美。銘曰。

北方之強歟。十有二姓。強哉矯。部落之雄者。康執兵柄。緬乎眇。特進誕生兮。實登邦政。德不擾。噉女滅國兮。烏蘇不竟。慍羣小。三濱九死兮。舉族致命。丹心皦。一門萬石兮。彰厥誠敬。皇恩曠。生爲忠臣兮。後有餘慶。其不天。家有孝子兮。嚴親翊望。王之爪。乃立豐碑兮。百代遺詠。鴻名表。忠孝之際兮。于斯爲盛。遠圖宵。金紫光祿大夫守太子太傅兼宗正卿贈司空上柱國隴西郡開國公李公神道碑銘

昔周武以二公股肱王室。然而允蓋西土。師保萬民者。其惟召公乎。漢室以二傅羽翼儲宮。然而亮采東朝。儀型百辟者。其惟蕭傅乎。則九德之師。六行之傅。親賢既美。亦何代無其人哉。隴西公才爲國之垣翰。位爲天之喉舌。德爲朝之元老。行爲帝之信臣。蓋所謂宗室之間生。士林之傑出者也。公諱齊物。字道用。

盛德彌于百祀。靈根固于千葉。太祖景皇帝功高佐魏。慶始封唐。家崇八柱之勳。地半三分之業。亦猶殷人之祖契。周室之宗文。公卽景皇帝之五代孫也。鄭王亮之玄孫。淮安王神通之曾孫。淮安王。皇朝開府儀同三司。尙書左僕射。贈司空。盤石開府。介圭錫瑞。成周之晉鄭。西漢之勃平。祖孝銳。鹽州刺史。父璟。隴州司倉。贈弘農太守。並清白貽範。仁賢繼軌。連華公族。濟美專城。公稟乾剛之正性。體坤順之中德。爰自岐嶷。特鍾美秀。儼然王公之量。鬱有台鼎之姿。固已超等夷而出羣萃矣。神龍初。起家左右千牛備身。歷尙輦直長。許州司馬。華州司兵。時方振拔。勢已飛騰。此則江漢之濫觴。華嵩之覆簣也。丁太夫人憂。公有至性。毀瘠過禮。扶杖于家。哭不絕聲者累月。倚廬于墓。衣不解帶者終喪。天子特降璽書。就廬慰勉。非常之澤。近古未聞。服闋。授鴻臚丞。除尙輦奉御。遷北都軍器監事。太原爲一都之雄鎮。軍器掌五庫之禁兵。故乾沒之賊。一徵百萬。繕完之利。費省巨億。少尹嚴挺之連奏課最。擢拜長安令。陸海殷湊。五方浩劇。公以威禁暴。以恕用刑。邑里之人。陶然大化。遷將作少匠。殿中少監。太府少卿。懷陝二州刺史。雖漢之宗室。不典三河。而周之懿親。先分二陝。惟良之寄。實在于公。嘗以黃河經砥柱之艱。有覆州之患。遂奏疏九派。鑿三門。屬役而堅冰大合。興功而烈火潛熾。不愆于素。若有神焉。人皆以公至誠之所感也。又于石獲古銘曰。平陸。遂以名縣焉。玄宗異之。賜貂裘一領。絹三百疋。特加銀青光祿大夫。鴻臚卿。并公之先隴州府君專城之贈。上嘗賜公玉尺一。詔曰。謂之尺度。可以裁成。卿實多能。故爲此賜。識者知公必將金玉王度。

代天之工。豈惟從容九列而已。拜河南尹。仍水陸運使。屬左相李公適之。尚書裴公寬。京兆尹韓公朝宗。與公爲飛語所中。公遂貶竟陵郡太守。時陸羽鴻漸隨師郡中。說公下車召吏人戒之曰。官吏有簞箠不修者。僧道有戒律不精者。百姓有泛駕驟弛者。未至之前。一無所問。而今而後。義不相容。數年間。一境不變。熙然若羲皇之代矣。哀孤老隱逸有道者。常騎馬于里巷之中。親自恤問。量移安康。卽日上道。老幼遮擁不得發者三辰。轉漢陽蘄春。其政如一。公虛中自牧。接下愈恭。與物盡推誠之心。正身無氣餒之忌。每上春行令。大戶閱農。輕裹餼糧。重煩縣道。化流江漢。如時雨焉。故郡歷數四。課事第一。去思之感。人到于今稱之。天寶末。徵拜將作監。重授鴻臚卿。縱擊巨鱗。還游舊浦。凌風勁翮。俄返故林。時國忠包藏于內。【案】此下原本缺。

中散大夫京兆尹漢陽郡太守贈太子少保鮮于公神道碑銘

公諱向。字仲通。以字行。漁陽人也。其先出于殷太師。周武王封于朝鮮。子仲。食邑于于。因而受氏。漢有京兆尹褒。褒十二世孫康。後魏秦州刺史。直閣將軍。武威郡公。忠于本朝。爲齊神武所害。康玄孫匡贊。隋冠氏長。義寧初。通議大夫。匡贊生士簡。士簡並早孤。爲叔父隆州刺史匡紹所育。因家于新政。士簡。士迪。皆魁岸英偉。以財雄巴蜀。招徠賓客。名動當時。郡中憚之。士簡生令徵。公之父也。僮儻豪傑。多奇畫。嘗傾萬家之產。周濟天下士大夫。與妻兄著作郎廣漢嚴從。景殿中侍御史何千里。俱以氣槩相高。不肯仕官。竟以壽終。天寶九載。贈遂寧郡太守。廣德元年。又贈太常卿。公少好俠。以鷹犬射獵自娛。輕財尚義。果于然。

諱年二十餘。尙未知書。太常切責之。驕南有離堆山。斗入嘉陵江。形勝峻絕。公乃慷慨發憤。屏棄人世。鑿石構室以居焉。勵精爲學。至以鍼鉤其臉。使不得睡。讀書觀大略。頗工文。而不好爲之。開元二十年。近四十。舉鄉貢進士高第。二十六年。調補益州新都尉。視事二十日。謝病去。二十七年。長史張宥奏充劍南採訪支使。宥方謀拔安戎。獨與公計畫。幕中之事。一以咨公。司馬章仇兼瓊惡之。及代宥節度。乃移郡收公。月餘仍釋之。俄而攝判使事。監越嶺兵馬。復奏充採訪支使。盡護劍南軍事。首尾二載。冒暑渡瀘者凡一十八度。公秉操堅伎。吏人望而畏之。改授新繁尉。充山南西道採訪支使。頃之。雲南蠻動。瓊請公往。以便宜行事。公戮其尤害者數人。蠻夏懽服。山南盜賊。舊多光火。公察其名居。悉傾巢穴。人到于今賴焉。俄拜左衛兵曹。例遷也。瓊以兩道採訪節度使務悉以委公。無何。攝監察御史。充劍南山南兩道山澤使。遷大理評事。充西山督察使。天寶五載。戶部侍郎兼御史大夫郭公虛已。代瓊節制。郭以庶務。一皆仗公。公素懷感激。竭誠受委。故幕府之事。無遺謂焉。六載。拜監察御史。公誅羌豪董哥羅等數十人。以靖八州之地。郭公將圖弱水西之八國。奏公入覲。玄宗駭異之。卽日拜尙書屯田員外郎。兼侍御史。蜀郡司馬。劍南行軍司馬。旣略三河。收其八國。長驅至故洪州。與哥舒翰隴右官軍相遇于橫嶺。鳴鼓而還。及郭公云亡。慟哭之曰。公亡矣。吾無爲爲善乎。初。郭公對敷天休。每薦公有文武之材。堪方面之寄。至是。遂拜公爲蜀郡大都督府長史。兼御史中丞。持節充劍南節度副大使。公當大任。旣竭丹誠。射討吐蕃。摩彌城。拔之。改洪州爲保寧都護府。甄弱水爲蕃漢之界。收戶數十萬。闢土千餘里。屬恩救命。召祇赴京師。至臨臯驛。上

令中貴人勞問。賜甲第一區。又錫名馬。兼供御饌。俄拜司農卿。將不遠而復。十一載拜京兆尹。公威名素重。處理剛嚴。公初善執事者。後爲所忌。十二載。遂貶邵陽郡司馬。灌園築室。以山泉琴酒自娛。賦詩百餘篇。俄移漢陽郡太守。下車閉閣。惟讀玄經。以自適。不幸感疾。以十四載閏十有一月十有五日。終於官舍。春秋六十有二十五。載春正月。歸葬于新政縣嘉陵江之西岸。先塋寶應元年。追贈衛尉卿。廣德元年。又贈太子少保。公凡著坤樞十卷。文集十卷。並爲好事者所傳。於戲。公負不羈之才。懷當世之志。方及知命。始擢一第。從宦十年。超登四岳。拔身巴江之下。自致青雲之上。非夫珪璋特達。聖賢相遭。則何以凌厲沈浮。若斯之速。旣而吉凶糾纏。慶弔相隨。天睨排于賊臣。維圖屈于促景。有足悲矣。有子六人。仲曰贈左金吾衛郎將昊。隨公陷于西二河。力戰而歿。季曰前鄉貢明經晃。神清才秀。先公而卒。伯曰壁州刺史昱。克篤孝行。見稱衣冠。公之捐館也。萬里迎喪。泝湍而輟。塚拔筵。段子章之稱亂也。閩門逃賊。安親而晨夕板輿。叔曰萬州刺史旻。雅有父風。頗精吏道。肅宗之幸鳳翔也。謁誠幕府。以佐公家。今上之命庶僚也。由華原之政。驟登省闕。作牧萬州。政績尤異。有詔遷祕書少監。尋又改牧巴州。幼曰青城尉晏。稚曰成都府參軍景。皆保家之主。亦著令聞。公弟晉。字叔明。敦厚溫敏。少以任俠聞。事公以悌稱。與朋以信著。好讀書。而不爲章句。精吏道。而尤擅循良。再爲法官。三秉天憲。二登郎署。一宰洛陽。從其兄之討南蠻也。兩軍交戰。仗忠信而必使其間。佐寧國之如回紇也。絕域奉辭。布皇明而皆得要領。肅宗褒異。擢拜商州刺史。無何。超遷京兆尹。不十年而兄弟相代。論者偉之。永泰二年秋八月。有詔自太子左庶子。復拜爲邛州刺史。兼

御史中丞。邛南八州防禦觀察等使。真卿與公同在御史。亡兄國子司業。允南弟。今江陵少尹。允臧。又與少尹同時。臺省既接通家之歡。載敦世親之好。以爲徂謝永久。所存者微。猷陵谷雖遷。不朽者金石。銘功篆美。敢墜所聞。其詞曰。

洪範垂休。系殷封周。鮮于身繇。派漁陽兮。世掌漢歷。子孫烏奕。代有不續。暴定襄兮。冠氏促齡。二孫夙丁。隨官不寧。肇定疆兮。嘉陵森森。雲臺矯矯。降生京兆。爲龍光兮。有武有文。剛嚴不羣。克懋鴻勳。制惟梁兮。既靖巴蜀。既清瑩穀。日聞啓沃。播周行兮。結友不終。孤我深衷。如彼飛蟲。反予戕兮。邵陽典午。漢陽紆組。孰云心苦。坦行藏兮。天不愍遺。哲人其萎。反葬江涓。咥其傷兮。此令有裕。教忠有素。天介景祚。熾而昌兮。三世尹京。二子專城。一門載榮。餘慶彰兮。豐碑巍巍。盛業暉暉。舉世是希。與天長兮。

文忠集卷七

碑

郭公廟碑銘

昔申伯翰周。降神于維嶽。仲父匡晉。演慶于筮淮。而猶見美詩人。騰芳史冊。豈比夫神明積高之壤。百二懸隔之都。三峯發地而削成。九派浮天而噴激。炳靈毓粹。奕葉生賢。括宇宙而稟和。總河山而蘊秀。莫與京者。其惟郭宗乎。其先蓋出周之虢叔。虢或爲郭。因而氏焉。代爲太原著姓。漢有光祿大夫廣德。生孟儒。爲馮翊太守。子孫始自太原家焉。後轉徙于華山之下。故一族今爲華州鄭縣人。夫其築臺見師。瘞子致養。家承金穴之貴。政有露冕之高。或哲或謀。或肅或乂。皆海有珠而鳥有鳳也。閔閔之盛。其流益光。隋有金州司倉諱履球府君。懋其德輝。不屑下位。克己復禮。州邦化焉。篤生唐涼州司法諱昶府君。能世其業。以伸其道。遠近宗之。不隕厥問。生美原縣主簿贈兵部尙書諱通府君。清讜澈照。博綜羣言。始登王畿。鬱有佳稱。道悠運促。靡及貴仕。垂于後昆。沒而見尊。是生我諱敬之府君。府君幼而好仁。長有全德。身長八尺二寸。行中絜矩。聲如洪鐘。河目電照。虬鬚蝟磔。進退閒雅。望之若神。以仲由之政事。兼翁歸之文武。始自涪州錄事參軍。轉瓜州司倉。雍北府右果毅。加遊擊將軍。申王府典軍。金吾府折衝。兼左衛長上原州別駕。遷扶州刺史。未上。除左威衛左郎將。兼監牧南使。涇吉二州刺史。侍中牛仙客。隲君清節。奏授綏州。

遷壽州。累加中大夫。策勳上柱國。以天寶三載春正月十日。遭疾終于京師常樂坊之私第。春秋七十有八。乾元三年春二月。以公之寶胤開府儀同三司。司徒。兼中書令。柱國。汾陽郡王。曰子儀。有大勳于王室。乃下詔曰。故中大夫壽州刺史郭敬之。果君子之行。毓達人之德。才光文武。政美中和。生此大賢。爲我良弼。頃以孽兒作亂。黔首罹殃。朕于是鬱興神武之師。克掃機槍之氣。而子儀帥彼勁卒。赫然先驅。取京洛如拾遺。剪凶殘。猶振槁。功存社稷。澤潤生人。是用寵洽衰榮。義申存歿。可贈太保。於戲。府君體含弘之素履。秉沖邈之高烈。言必主于忠信。行不違于直方。清白爲吏者之師。死生敦交友之分。端一之操。不以夷險槩其懷。堅明之姿。不以雪霜易其令。用情不間于疎遠。泛愛莫遺于賤貧。拳拳服膺。終始靡二。故所居則化。所去見思。人到于今稱之。斯不朽矣。傳曰。德盛必百代祀。其有後也。宜哉。恭惟令公。先皇之佐命臣也。少而美秀。長而瓌偉。姿性質直。天然孝悌。寬仁無比。騎射絕倫。所蒞以清白見稱。居常以經濟自命。弱冠以邦鄉之賦。驟膺將帥之舉。四擢高第。有聲前朝。三爲將軍。再守大郡。累典兵要。必聞休績。天寶末。安祿山反于范陽。令公以節度使擁朔方之衆。圍高秀巖于雲中。破史思明于嘉山。先帝之幸朔方。赴行在。于靈武。擊同羅于河曲。走崔乾祐于蒲坂。今上之爲元帥也。首副旄鉞。會回紇于扶風。摧兇寇于涑水。追餘孽于陝服。長驅河洛。弼成睿圖。再造生靈。克清天步。又函夏之未乂。安天下之未安。一年之間。區宇大定。豈不休哉。觀其元和降精。間氣生德。感星辰而作輔。應期運以濟時。忠于國而孝于家。威可畏而儀可象。盛德繫物。寬身厚下。用人由己。從善如流。沈謀祕于鬼神。精義貫于天地。推赤誠而許國。蹈白刃以率

先靈擊于雲雷之初。鷹揚于廟堂之上。大凡二歷鼎司。兩升都座。四作元帥。九年中書。歷事三聖。而厥德惟懋。易相二十。而受遇益深。蓋剋復上都者再。戡定東京者一。其餘壘城擄邑。得僑摧鋒。亦非遽數之所周也。信可謂王國之虓虎。生人之蔭庥者歟。非太保之邁種不孤。則何以鍾美若是。況乎友于著陸。贊龍虎者十人。貽厥有光。紆青紫者八九。勳庸舉集。今古莫儔。昔奮號尊榮。紅粟纒霑于萬石。憚家全盛。朱輪不出于十人。繇我觀之事。不侔矣。於戲。清廟之興。所以仁祖考。鴻伐之刻。亦以垂子孫。爰制于舊居。將永圖而觀德。中堂有恤。丕構克崇。感霜露而忱惕。以增敘。昭穆而敬。恭斯在。庶乎觀盟。顯若既無斃于永懷。入室優然。必有觀乎其位。哀榮既極。情禮用申。仁人之所及遠哉。孝子之事親終矣。豈惟溫溫孔父。遠稱錢鼎之銘。穆穆魯侯。獨美龍旂之祀。其詞曰。

郭之皇祖。肇允號土。逮于後昆。實守左輔。徙華陰兮。源長流光。施于司倉。涼州兵部。克熾而昌。載德深兮。篤生太保。允懋厥道。神之聽之。永錫難老。式如金兮。於穆令公。汾陽啓封。文經武緯。訓徒陟空。簡帝心兮。含一不二。格于天地。愷悌君子。邦之攸暨。昭德陰兮。芝蘭芳。羽儀公堂。子子孫孫。爲龍爲光。鏘璆琳兮。乃立新廟。肅雍允劭。神保是聽。孝思孔炤。亶居歆兮。乃立高碑。盛美奚鼓。日月有旣。徽猷永垂。映來今兮。廣德二年歲次甲辰十一月甲午朔二十一日甲寅建。

銀青光祿大夫海瀆饒房睦台六州刺史上柱國汲郡開國公康使君神道碑銘

君諱希銑。字南金。其先出于周武王同母少弟衛康叔封之後也。史記云。成王長用事。舉康叔爲周司寇。

賜衛寶祭器以彰有德。封子康伯支庶。有食邑于康者。遂以氏焉。代爲衛大夫。至漢有東郡太守超。始居汲郡。超之裔孫魏強弩將軍權。權生晉虎賁中郎將泰。泰生太守威。威生蘭陵令奮。節將軍翼。隨晉元帝過江。爲吳興郡丞。因居烏程。事見山謙之吳興記。翼生豫章太守鎮。鎮生征虜司馬建武將軍欽。信。欽信生宋晉熙王兵曹參軍黯。黯生南臺郎高。高生齊驃騎大將軍孟真。孟真生梁散騎侍郎僧朗。僧朗生陳給事中五兵尚書宗。【案】原本缺一字。爲山陰令。子孫始居會稽。遂爲郡人焉。曾祖孝範。江夏王府法曹。臨海縣令。祖英。隋齊王府騎曹。江寧縣令。皇朝隨郡王行軍倉曹。父國安。明經高第。以碩學掌國子監。領三館進士教之。策授右典戎衛錄事參軍。直崇文館。太學助教。遷博士。自獸門內供奉。崇文館學士。贈杭州長史。君卽長史府君之叔子也。年十四。明經登第。補右內率府胄曹。應詞藻宏麗。舉甲科。拜祕書省校書郎。轉左金吾衛錄事參軍。應博通文史。舉高第。授太府寺主簿。轉丞。又應明于政理。舉。拜洛州河清令。加朝散大夫。【案】原本缺一字。州司馬。德州長史。轉定州。屬突厥侵疆。君以偏師抗之。遷海州刺史。上功以敕書賜方岳繡袍一領。雜綵二百段。下車未幾。詔擇政術尤異者。察使奏公恩制褒異。遷濮州。加銀青光祿大夫。累封汲郡開國公。策勳上柱國。轉饒州。入爲國子司業。以言事貶房州。轉睦州。遷台州。所至之邦。必聞美政。開元初入計至京。抗表請致仕。玄宗不許。仍留三年。請歸鄉。敕書褒美。賜衣一襲。并雜綵等。仍給傳驛。至本州。冬十月二十有二日。不幸遘疾。薨于會稽覺胤里第。春秋七十一。夫人陳郡殷氏。太子中舍人聞禮之曾孫。右清道率令德之孫。【案】原本缺一字。州錄事參軍子恩之第五女。先天二年。封丹陽郡夫人。公薨之年。破

于東都章善坊私第。春秋六十九。嗣子朝散大夫婺州司馬襲汲郡公元昆。會稽縣男元瑾。宣州司士京兆府奉先尉會稽縣男元瑒。朝議郎前獲嘉丞元瓌等。虔以天寶四載七月四日。窆于山陰縣籬渚村之先塋。卜遠日而葬合焉。禮也。嗚呼。君負不器之姿。包周身之智。寬仁且惠。慤愿而恭。金玉其相。敬明其道。文章麗藻。二雅所祇。政事優長。百僚所則。嘗撰自古以來清白吏圖四卷。仍自爲序贊。以見其志。宰相黃門侍郎章承慶。中書舍人馬吉甫等。美而同述焉。盛行于世。赴海州時。君兄德音爲右臺侍御史。弟爲偃師令。俱以詞學擅名。時同請歸鄉拜掃。朝野榮之。與狄仁傑。岑義。章承慶。嗣立。元懷景。姚元崇友善。至是咸傾朝同賦詩以餞之。近代未有此比。君之四代祖至于大父。爲諸王掾屬者七人。歷尚書郎給事中侍御史者二人。君之先君崇文學士府君。有文集十卷。注駁文選異義二十卷。漢書【案】原本缺一字十卷。自述文集二十卷。元昆修書學士顯府君文集十卷。撰詞苑麗則二十卷。海藏連珠三十卷。累璧十卷。姪祕書監集賢院侍講學士元撰。周易累義二十卷。秀州長史元瓌著于錄寶典三十卷。姪刑部員外郎瑾。男美原。尉南華撰。代耕心鏡十卷。君之先君至南華四代進士。登甲科者七人。舉明經者一十三人。時君門頗盛美矣。君之女曰辨惠。整厓縣令陝郡長史郃象弑之妻。君之孫台州司戶參軍【案】原本缺二字。歲而卒。汾州司田參軍真弼。德州平昌縣令輔旻。崇玄學生曙。懷州武陟尉憺。宣州南陵尉渭。鄉貢明經緯綸。皆修身踐言。敦詩悅禮。紹承餘訓。克稟義方。及君告老。鄒自然。陳光壁。間丘景陽。陶暹。送至越州。邑子謝務遷。僧陸鑒。校書郎陳齊卿。恒爲文酒之會。論者休焉。愜求舊之念。崇乞言之禮。天乎不愆。其恨若何。大歷十一年。

元瓌【案】原本缺九字乞願言刊勒懼沒微猷求無愧之詞垂不朽之事願惟末學曷足當仁銘曰

汲公恂恂德懋惟仁後先多士東南有筠緝熙代業詞章發身佐軍貔虎典校麒麟三擢昆玉再司【案】原本

本缺五字【案】原本泐驥展河濟驟貳嘉州錫命斯頻繡寵方岳榮加搢紳六登【案】原本洽膠庠【案】原本華墓表

申【案】原本見節文昭友仁懸車告老衣錦熙神連璧襲懿梓澤齊彬饋醕未濟春濛遽淪朝廷惋悼遠

近悲辛季子象賢恐懼鬱堙於赫鴻伐千秋不泯

遊擊將軍左領軍衛大將軍兼商州刺史武關防禦使上柱國歐陽使君神道碑銘

使君諱瑄字子瑄渤海人其先出自帝顓頊高陽氏漢有歐陽伯和伯和孫高、高孫地餘並列儒林晉有

堅石著名文苑賢達繼軌其來邈乎六代祖僧寶始自渤海徙居長沙五代祖頴陳山陽郡公高祖紇陳

開府儀同三司左屯衛大將軍交廣等十九州諸軍事廣州刺史襲山陽郡公功業並著于前史曾伯祖

詢皇朝銀青光祿大夫給事中率更令崇賢館學士以詞學德行見重前朝筆法孤標垂名不朽曾祖胤

年十七以門子入侍見賞太宗十八加正議大夫魯王傳奉使和突厥不拜屈朝廷嘉之回封南海郡公

施光二州刺史祖諶洛州鞏縣令父機漢州什邡令以休懿傳世著聞于家邦使君卽什邡之第四子志

尚恬曠顯精于詩易春秋尤明吏術所居則理開元十八年解褐安西大都護府參軍充湯嘉惠節度推

勾官外憂去職服闋補北庭大都護府戶曹參軍節度使蓋嘉運奏授金滿令仍充營田判官以破賊功

當遷請回授幼弟孤姪者三人教義稱之二十九年河西節度使奏授晉昌郡戶曹參軍攝晉昌令轉張

掖郡張掖令攝司馬知郡事。按吏贓罪。罪人誣訟于使司。百姓苗秀、康順忠等三十人皆截耳稱冤。節度使主捶駭焉。奏與上攷。轉岳州長史。時屬荒旱。人多莩餒。君以祿俸贖田。并率官吏食餓者千餘人。凡月餘。遂多全活。劍南節度使楊國忠奏知三峽轉運。改衡陽郡長史。賜緋魚袋。天寶末。安史作亂。統江湖之兵。先至南陽。加賜紫金魚袋。充魯吳南陽節度副使。攝淮南郡長史。充當郡防禦使。時南陽爲賊所圍。諸將選懦。莫敢先救。至德元載。君以當郡防禦士至新野芙蓉鄉。遇賊合戰。斬其將。犯圍而入。吳壯而德之。賊圍解。加遊擊將軍。左金吾衛中郎將。兼南陽郡司馬。遷右驍衛將軍。兼上洛郡太守。充武關防禦使。肅宗降璽書云。卿以特達之姿。抱殊常之略。武關防守。委卿一人。屬賊陷商於。復圍南陽。【案】原本浙川以保。又人吏逆賊悉力來攻。六十日糧盡救絕。遂陷賊庭。賊將甘言忱。君令至城下以給。吳君忠勇感激。捨生徇義。抗聲謂吳曰。鳳翔諸將已收長安。玃不能效死軍前。辱大夫所使。願大夫保守忠義。克終令圖。賊以兵刀毆君。君志氣彌厲。因被執送洛陽。今天子收復兩京。僅得脫禍。其事具向城令王瀟南陽記。吳又奏君充節度兵馬使。君遂辭疾不行。稅駕于鄭之別墅。君所居以清白廉慎聞于朝廷。祿俸之餘。必賙親族之貧者。先疇舊業。悉畀羣從。一簪不私于其身。又常持誦金剛淨名經。向逾三紀。不茹葷血者十年。至是無儻石之儲。而處順安時。不改其度。蓋澹如也。識者歸高焉。粵以上元二年秋九月十四日寢。疾而終。春秋六十有五。夫人高平徐氏。安西都護高平縣公欽識之女。婦順母儀。克明休德。以大歷二年夏六月二十五日終于岳州客舍。享年五十有六。其孤嵩臯。中子崙。少子峯等。銜恤允窮。竭力襄事。以大歷十年

冬十月二十四日合祔君累夫人于榮澤縣廣武原。遵理命也。崙不遠千里。泣而求蒙。敢述無愧之詞。式揚不朽之烈。銘曰。

猗那使君。世挹清芬。顯經飾吏。休有令聞。天子命我。參卿西軍。驟遷大縣。克懋殊勳。讓行親睦。耳截冤分。糜祿食餓。馳師解紛。孤城再色。罷卒益振。麾守商於。移兵浙潰。綢繆宸睭。焜耀天文。力盡寇多。師陷身屯。詭詞紿賊。解路是羣。脫禍歸朝。義高天雲。乞骸廷闕。稅駕涓漆。志敦禪誦。茹絕羶葷。處順齊終。聊樂我云。刻諸金石。永永不泯。

文忠集卷八

碑

朝議大夫贈梁州都督上柱國徐府君神道碑銘

自古遭盛明而功不立。都卿相而名不稱者。蓋有之矣。其或荷丕構而繼志不忘。在下位而能伸其道。克揚前烈。以承後昆。其惟徐君乎。君諱秀。東海郟人也。其先出于伯益。實掌舜虞裔孫。偃王躬行仁義。遂因國命氏焉。厥後樂以文侍金門。稱以禮優塵榻。仙人寄傲于賢聖。偉長首冠于應劉。英達相仍有自來矣。宋有中書侍郎遠之。司空羨之。兄祕書監欽之。欽之子尚書僕射中書令湛之。湛之生黃門侍郎聿之。聿之生齊太尉孝嗣。孝嗣生梁侍中緄。緄生陳五兵尚書君敕。君敕生丹陽尹溫。自司空已還。四爲上公。五降帝女。尹生隋民部侍郎唐贈祕書監諱恕。監生金紫光祿大夫右散騎常侍兼禮部尚書諱筠。尚書生庫部郎中萬年令太子詹事諱所。皆以盛德濟美。垂于世家。君卽詹事第三子也。幼而聰悟。篤學能屬文。事繼親以孝稱。十餘歲時。父友鳳閣侍郎姚元崇示君五百字詩。一覽便誦。姚公奇之。因謂納言狄公曰。徐子珠華玉潔。後但不知命何如耳。年十五。爲崇文生。應舉。攷功員外郎沈倫期再試東堂。壁畫賦。公援翰立成。沈公駭異之。遂擢高第。調補幽都縣尉。充相國尚書趙彥昭朔方節度判官。以事去職。又歷蔡州參軍。爲御史宋遙關內覆囚判官。公銳精鞠訊。多所全活。宋公以爲言。公正色謂之曰。僕從祖父司刑卿。

天授中詳理冤獄。振雪者七十餘家。今子孫猶困于襄陵。豈忍以束濕之事。以自便也。因頓首請去。宋謝而留之。無何或訟冤于執事者。召公問狀。則他判官之爲也。宋欲別白旌公。公曰。僕雖不材。豈可藉人之過。以爲己功乎。論者休之。戶部侍郎徐知仁請爲招慰南蠻判官。奏課居最。轉瀛州司法參軍。侍御史趙頤貞辟宜慰判官。歷湖州德清長城潤州丹陽三縣令。天寶二年春二月。加朝散大夫。敕攝新安郡別駕。採訪使齊澣梁昇卿並奏爲判官。六載秋七月。拜臨淮郡長史。加朝請大夫。九載夏四月。除濟南郡司馬。加朝議大夫。十二載春三月。拜信都郡長史。不幸感疾。天寶十三載秋七月九日。終於郡之官舍。春秋七十。公先世塋壠宅于京師少陵原。詹事府君巡按河南。薨于洛汭。因葬于緱氏縣西南大寇原。公啓手足也。顧命其子今侍御史續曰。吾家代儉約。不欲華衆。歸全之後。其以布車一乘。虔耐先塋。續泣而奉之。及其葬也。塋小無便地。于次東馬鞍山下。得紫龍飲乳岡之原。龜筮從也。夫人南陽縣君樊氏。戶部尙書子蓋之曾孫。袁州刺史文器之孫。廬江太守季節之女。仁孝柔明。閑于禮度。左右圖史。雅善琴碁。中外孤弱。躬自收視。俾夫遠近咸懷安之。春秋六十有八。棄堂帳于相州之安陽。天寶十五載秋八月十有四日。爰遵周公之典。而合祔焉。禮也。廣德二年春二月。皇帝有事于南郊。追贈君都督梁州諸軍事梁州刺史。夫人南陽郡太君。蓋以續簪白筆于赤墀。董財賦于巴漢。是用有永錫之寵。紆褒崇之命。榮哀之盛。不其至矣。君凡四爲綱佐。六奉使軒。所至之邦。必聞異績。舉天下之政事。莫不咨折中焉。性嗜清貧。室無長物。孤

疾。君嘗仰于君。既嬰沈痼之疾。縣歷三載。續請就上國之醫。庶其逢吉。君曰。閭門之資者寸祿也。今疾

劇命也。吾不以一身。身百口。竟不從而死。譴者哀之。或謂君曰。吾奉養。養姊用度萬錢。橫諸姑。續續五兩。姑見君笑而不答。退謂續曰。吾見其撫孤。不見其怨德。教義之士。有以見其用心也。君恬淡寡欲。雅好攝生。在新安。或指靈叟于洞。君齋心四日。果入其阻。而後覲之。訊其由來。陳思王東閣祭酒蔣凱也。說魏時事。歷歷可聽。君稽首而斬之。叟曰。從我乎。必可度世。君以王事靡盬。退而辭焉。比回顧。則爲茅草矣。初。君上計濟南。展羣祖之墓。松檟森然。微猷莫紀。留居論議。時日以成。先德之不忘。案原本三字緊是舉也。嗚呼。君體聰穎之上姿。恬曠之夷度。寬明足以濟衆。和義足以長人口。絕莠言。目無遺視。立身先張仲之志。與朋服子路之言。內行可以質神明。清規可以勵風俗。宜克享胡耆。荷天之龍光。輔乎漢之得人。高視乎周之列位。而道之將喪。命不偶時。屈輿驥于身前。墮峴碑于歿後。吁足嘆也。春秋貴九世卿族。漢史稱七葉珥貂。陪臣于下。士卑僚。絕屬于天潢戚里。豈比夫登台者四世。尙主者五人。焜耀于數朝之間。蟬聯于百代之下。可同年而語矣。續懿文懋學。峻節清標。天寶末。陷居賊中。爲僞命連辟。辭疾不起。謀使家人與本朝通計。爲部曲所發。遂遭禁詰。一日之中。議刑者數焉。俄而官軍大至。賊黨奔北。由是獲免。乾元中。奉使巴渝。屬段子璋構逆。流輩十人。皆被屠害。以續高名。欲留同惡。期之以死。承劍不回。時諸道徵求之。不堪命。續至之邦。必荷仁信。如期而畢。案原本三字將崇必復之矣。寧止當朝之望。俾銘功伐。敢墜斯文。其辭曰。

益爲帝虞。偃不異途。世表東海。其惟徐乎。或文或武。或哲或儒。休美後昆。厥德不孤。猗那都督。克懋遠圖。

邦國四佐。翰軒六徂。樹聲長世。與道爲徒。爰觀幽光。無寧集枯。【案】原本缺八字。仁義都盡。彭殤曷殊。所嗟人紀。莫展嘉謨。馬鞍山北。龍乳岡隅。于焉崇祔。先志靡渝。豐碑崔嵬。宰樹繁紆。【案】原本缺六字。沾濡。

京兆尹御史中丞梓遂杭三州刺史劍南東川節度使杜公神道碑銘

征鎮四出。鑿門之寄崇。邦畿千里。內史之官最。非夫任均周召。名軼趙張。則何以展心膂之謀。光錡笏之

製者矣。公諱濟。字應物。京兆杜陵人。晉征南大將軍當陽侯元凱十四代孫。周禮部侍郎殿內監。【案】原本缺一

字。棠公懿之來孫。隋符璽郎乾祐之玄孫。皇度支員外主客郎中續之曾孫。朝散大夫明堂丞贈潤州刺

史知讓之孫。高陵令贈太子少保惠之第三子也。器識通簡。履懷坦易。以文飾吏。用晦而明。逗機而舉。無

遺譖。洩事而照有餘地。早歲以癡郎從。調書判超等。爲李吏部彭年所賞。補梁州南鄭主簿。州主司馬垂

爲山南西道採訪使。引在幕下。俄丁內艱。終制。轉許州長杜尉。楊光翹都督隴西。奏公爲法曹。皇甫侁採

訪江西。奏公爲推官。授大理司直攝殿中侍御史。賜緋魚袋。尋正除殿中。俄宰郿縣。相國李峴尹京兆。奏

公爲渭南尉。僕射裴冕爲劍南。奏公爲成都令。遷絳州刺史。賜紫金魚袋。屬徐知道作亂。使裨將曹懷信

招公。公執以歸朝。除戶部郎中。加朝散大夫。廣德中。檢校駕部郎中。上柱國。公善與人交。于嚴武情均莫

逆。武再充劍南節度。爲武行軍司馬。郭英義之代武也。矯宜恩命。毀玄宗宮爲節度使宅。公驚其異謀。移

疾不視事。今司空冀國公崔寧旣誅。英義請知使事。公墜臥不起。仍俾通泉令今前殿中侍御史韋都賓

唐史家傳。唐史事實。大歷初。吐魯斯分屬爲東西川。公爲開元帥判官。知東川節度。唐史中大夫。系判

遂瀘合龍書等州。蜀防禦使梓州刺史兼御史中丞公以威儀嚴戎實明夜備克。州之人朝廷嘉之。尋拜東川節度使。俄而移軍。復爲遂州都督。徵拜給事中。間歲拜京兆少尹。明日遷京兆尹。出爲杭州刺史。不逾周歲。風化大行。不幸感疾。又聞代到。請尋醫于晉陵。以大歷十二年歲次丁巳秋七月二日辛亥薨于常州之別館。春秋五十有八。夫人京兆韋氏曰平仲。房州刺史景駿之孫。禮部尚書琅琊王丘之外孫。太子中舍迪之第三女也。精識高明。正家柔克。移天有幹。夫之蠱。宜室多綏。族之仁。六姻稱其盛。則四德被于彤管。生三子四女。而公卽世。夫人晝哭茹毒。星言割哀。留子婿祕書省校書郎范陽盧少康。曩二子匡陟緝寧家殘。獨與子肅。匍匐萬里。以祇護喪櫬。冬十一月至上都。二十四日壬申。度窆公子萬年縣洪原鄉之少陵原。祈先塋也。仍自爲祭文以抒意。其略曰。周旋吳蜀。備歷艱危。不陷寇難。賴君攜持。一朝孤立。更復何依。魚失水而鱗悴。樹無根而葉萎。詞理精婉。才情懇到。聞者傷感焉。於戲。公以傑俊之材。當艱虞之際。伸其智略。宣力盛時。顏頰驚鷺之間。總統龍犀之節。旋登瑣闥。驟陟尹畿。方當燁耀高衢。升凌台序。而一麾出守。鍛翻江臯。竟吉往而凶歸。齋此志而歿地。吾道慚矣。真卿何幸。得忝維私。未終倚玉之歡。遽切據梧之恨。吁足痛也。銘曰。

杜侯義義。令聞猗那。其用于世。爲獸匪他。理稱易簡。政絕煩苛。州縣發跡。雲霄切摩。化存江濟。威肅岷嶓。巴蜀靖謐。精誠孔多。瑣闥久拜。亞尹邁過。始陟京兆。旋移浙河。云何不弔。遭此凶瘡。哲婦哭晝。護喪奔波。禱于先靈。映蔚條柯。曷用表德。勒銘墳阿。

文忠集卷九

碑

晉紫虛元君領上真司命南嶽夫人魏夫人仙壇碑銘

夫人諱華存字賢安任城人晉司徒劇陽文康公舒之女也師于小有清虛真人王裒裒命巾候上仙范邈爲立傳其略云夫人挺瓊蘭之流映體自然之靈璞志逸雲霞明潔鮮蔚天才卓異玄標幽拔少讀老莊三傳五經百子無不該覽性樂神仙味真慕道少服胡麻散茯苓丸吐納氣液攝生夷靜親戚往來一無關見常欲別居閒處父母不許年二十四強適太保掾南陽劉君幼彥生二子璞遐幼彥後爲修武令夫人心期幽靈精誠苦盡逮子息粗立乃離隔室宇齋于別寢清修百日忽有太極真人安度明東華大神方諸青童扶桑碧河湯谷神王景林真人小有仙王清虛真人王裒來降裒謂夫人曰聞子密緯真氣太帝君敕我授子神真之道青童曰清虛爾之師也度明曰子苦心求道道今來矣景林曰虛皇鑒爾勤感太極已注子于玉札子其勗哉青童又曰子不受聞上道內法晨景玉經者仙道無緣得成也後日當會陽洛山中爾勤密之矣三君乃命侍女開玉笈出太上寶文八素隱身大洞冥經高仙羽玄等書三十卷手授夫人焉此皆王君昔遇南極夫人西城真人王方平于陽洛山所受之本經也山中有洞臺是清虛之別宮王君至是北向祝誓于夫人曰太上三元九皇高真虛微八道玉清玉泉裒爲太帝所教子

魏華存。又說太極白簡青籙。金刻玉文。有得見此三十一卷書者之姓名也。凡此寶書。起自清虛真人。受太師西城王君紫元夫人。從是當七人得之。以白玉爲簡。青玉爲字。至是夫人爲四矣。于是景林又授夫人黃庭內景經。令晝夜誦讀萬遍。得乃洞觀鬼神。此乃不死之道也。于是四真吟唱。各命玉女。彈琴擊鐘。吹簫合節而發歌。歌畢。王君乃解語夫人。向所授書。存思指歸。寶經節度。行事口訣。諸要粗訖。徐乃別去。凡二夕一日。共會在曲靜之中。自此之後。王君及西城真人諸元君夫人。互有來往。或與隔壁共庭。初不暇悟。已而幼彥以暴疾殞世。值天下荒亂。夫人撫養內外。傍救窮乏。超羣先覺。乃攜細小徑來東南。及兒息各大。並處官位。至于守靜之思。與日而進也。凡在世三十八年。以成帝咸和九年歲在甲午。王君乃與東華青童來降。與夫人靈藥兩齋。使頓服之。尅期會于陽洛宮。夫人服藥稱疾。閉目寢息。飲而不食。七日夜半。太一玄仙遣飄車來迎。夫人用藏景之法。託形神劍。化成死骸。始終外朗仙化。內逸冥變。隱適從此而絕。子璞時爲庾司空司馬。退時爲陶太尉從事中郎。安城太守。故夫人自此隱化淪景。須臾至陽洛山。明日青童君。太極四真人。清虛王君。三天法師張道陵等。凡四十七真人。降教夫人于隱元之臺。王君令夫人清齋五百日。讀大洞真經。并分別登真祕奧。道陵授以新出明威章。【案】原本入靜存祝。吏兵符籙之缺。乘真各標至訓。三日而去。道陵所以備教委曲者。以夫人在世爲女官祭酒。領職理故也。夫人遂修齋讀經。誦研萬過。積十六年。顏如少女。于是龜山九靈太真。西王母金闕聖君。南極元君。乃共來迎。夫人遂白日升晨。北詣上清宮玉闕之下。太微天帝。中央王老君。三素高元君。太上玉晨大道君。太素三元君。

扶桑大帝君。金闕後聖君。各令使者致命。授夫人玉札金文。位爲紫虛元君。領上真司命南嶽夫人。比秩仙公。使治天台大霍山洞臺之中。主下訓奉道教。授當真仙者。而男之高仙曰真人。女曰元君。于是夫人受錫事畢。王母及金闕聖君南極元君各去。使夫人于王屋小有之中。更齋戒三日。畢。九微元君龜山王母三元夫人。馮雙禮珠泉諸衆仙。並降夫人于小有清虛上宮絳房之中。時夫人與王君爲賓主焉。神看羅陳金觴四奏。各命侍女陳曲成之鈞。九雲合節。八音零粲。于是西王母擊節而歌。歌畢。馮雙禮珠彈雲璈而答歌。餘真人各歌。須臾司命神仙請隸屬及南嶽神靈迎官。並至虎旂龍輦。激曜數百里中。西王母諸真乃共與夫人東南行。俱詣天台霍山臺。又便道過句曲金壇茅叔申宴會。二日二夕。又共適于霍山。夫人安駕玉宇。然後各別。初王君告夫人曰。學者當去疾除病。因授甘草丸。所謂穀仙方也。夫人服之而仙。夫人能隸書。爲王君立傳。事甚詳悉。又述青精飴飴。注黃庭內景經。自後屢降茅山。子璞後至侍中。蒙使傳法于司徒琅瑯王舍人楊羲。護軍長史許穆。穆子玉斧。並升仙。事具陶弘景真誥。所呼南真。卽夫人也。初夫人旣渡江。徧遊名山。至臨川郡。臨汝水西立壇。置精舍。院東百餘步。造冢壙。又于石井山建立壇場。往來遊憩。歲月深久。榛蕪淪翳。雖備載圖經。而略遺無跡。有唐女道士黃令微。道行高遠。八十而有少容。蹀屣而行。奔馬不及。時人見其顏色殊異。號曰花姑。聞夫人靈迹。長壽二年。歲在壬辰。冬十月。乃訊于洪州西山道士胡超。超能通神明。遙指郭南六里烏龜原。有石龜。每犯田苗。被人擊首。折其處是也。姑與道流尋訪。見龜在壇中央。其下得尊像。油甕。鎗刀。燈蓋之類。俄夢夫人指九曲池于壇南。獲之。埴砌猶在。

景雲中。睿宗使道士葉善信。將繡像幡花。來修法事。仍于壇西置洞靈觀。度女道士七人。開元初。玄宗使醮祭。祈禱不絕。每有風雨。或聞簫管之聲。入室禮謁。必須嚴潔。不爾。必有蛇虎驚吼之異。時時有雲。如烏鳥羣飛。垂帶直下。壇上倏忽不見。西出如向井山。前後非一。已而花姑舛蠻。間如有告者曰。井山古跡。汝須崇建。俄聞異香。西來。姑行宿洞口。聞鐘磬之音。遲明入山。果遇壇殿餘趾。遂建立屋宇。屢聞仙梵之響。環壇數里。有採斫及不精潔者。必有怪異之警。有野象中箭。來投花姑。姑爲拔之後。每齋前。則銜蓮藕。以獻姑。開元九年。姑欲上升。告弟子曰。勿釘吾棺。可以絳紗翬之。已而霆雷震擊。紗上有孔。大如雞卵。棺中惟有被覆木簡。屋上穿。可容人。座前奠瓜。數日生蔓。結實如桃者二。每至忌辰。則風雨鬱勃。直入室內。玄宗聞而駭之。覆視明白。使道士蔡偉編入後仙傳。二十九年春三月乙酉。使道士齋龍壁來醮。忽有白鹿自壇東出。至冢間而滅。五色仙娥集壇上。刺史范陽張景佚。以爲聖德感應。立碑頌述。天寶八載。以夫人得道升仙之所。度女道士二人。見修香火。大歷三年。真卿叨刺是州。言崇禮謁。郊郭蒙邃。萑蒲震驚。女弱曹逃。豺狼窟聚。真儀如在。壇殿巋然。瞻仰徘徊。悄焉若失。有仙壇觀道士譚仙巖者。修真自遠。法侶是宗。請以男官黃道士二七人。抽隸洞靈。共申灑掃。高行女道士黎瓊仙七人。萃居壇院。精力住持已久。率勵往來。增修觀宇。從之不日。遙暨厥成。仙迹之載。崇師之力也。敢備其本末。而爲頌云。銘曰。

紫虛元君。惟魏夫人。位列五嶽。名高七真。凝華台胤。奪志劉嬪。太帝昭懇。清虛降神。羣仙畢會。玉笈斯陳。服道日損。精心益勤。蛻形神劍。託馭飄輪。適抵陽洛。遄登隱元。黃庭朗詠。白日升晨。西降王母。東過叔申。

傳法侍中許楊或作陽非爲鄰。伊昔南渡，爰居汝濱。壇場處所，埋沒荒榛。寶賴花姑，諗于胡尊。果獲靈迹，烏龜之原。次尋井山，實叶巖言。嫣然簡解，紗幕空存。野象銜藕，靈瓜吐根。怪異昭彰，不可殫論。二聖竦駭，屢崇明囚。于嗟女弱，香火壺淪。眞卿刺州，謁拜思類。乃命仙子，增修鼎新。花姑侍傍，異代同塵。曷表玄德，銘功翠珉。垂諸來裔，塊圪無垠。

撫州臨川縣井山華姑仙壇碑銘

華姑者姓黃氏，諱令微，撫州臨川人也。少乃好道，風神卓異，天然絕粒。年十二，度爲天寶觀女道士。年八十，髮白面紅，如處子狀。時人謂之華姑，蹠屣而行，奔馬不及。聞魏夫人仙壇在州郭之南，草木榛翳，結廬求之，不得。長壽二年，歲在壬辰，冬十月壬申朔，訪于洪州西山胡天師。天師名超，能役鬼神，見其懇切，遙指姑所居南二百步曰：烏龜原中有石龜，每蹂踐田苗，百姓患之，乃擊斷其首，卽其處也。明日，與姑登山，願望西面，有池水焉。天師謂姑曰：池中有所見乎？曰：無。師遂舉左手令姑自腋下觀之，四仙浴焉。師曰：爾有道分，必當得之。因留與語數日，虔誠尋訪，遂獲石龜于壇中央，掘其下，得尊像及刀鋸各一，油甕五口，燈盞數十箇。天后聞之，盡收入內。姑嘗于旦夕精思，想象之間，忽有告曰：壇南有九曲池，汝可開之。姑從而獲焉。壩砌盡在，他日有異香綵雲從西南而來，其夕夢有人謂姑曰：井山道場，何不修葺？姑未及往，忽然感疾。姑曰：得非違尊教所致乎？翌日病愈，又聞異香而宿于谷口，聞鐘聲，遲明入山，果獲壇殿地砌。北半峯有自然石井，深可三尺，闊丈餘，故名井山。天欲雨，則雲霧先起。姑旣建置精舍，時聞仙梵之音，環壇

五七里間。莫敢樵採。姑遂灑掃修葺。極其力焉。人或不潔不誠。必遭蛇虎怪異之警。迷不能出矣。至今猶然。有野象爲獵人所射。來姑前。姑爲拔箭。其後每至齋時。卽銜蓮藕以獻。姑開元九年欲上昇之際。忽謂弟子曰。不須釘吾棺。可以絳紗幕之。數夕。有雷震繞視紗頂。孔如雞卵。屋穿容人。棺中惟被覆木簡而已。弟子奠瓜數日。生蔓長數尺。結實二顆。其大如桃。姑同學弟子黎瓊仙。恒服茯苓胡麻。絕粒四十餘秋。年八十。齒髮不衰。六七歲時。親覩其事。每至忌辰。卽風雲蕪鬱。直入室內。村墅路人。往往見綵雲白鶴。飛入洞口。清齋行道時。每有一朱鬚白馬。在壇側。逼之則奔而出外。捨之則隨而復來。靈異昭彰。不可談悉。仙巖史玄同。左通玄等。每至三元。恒修齋醮。大歷三年。真卿獲刺是州。明年春三月。山下有女道士曾妙行。夢一女師。令上層華樹。層層撥澆。及悟猶飽。因是不食。嘗于觀中見黎瓊仙。跪而拜曰。夢中所見。乃尊師也。因請依之。于今覺韶顏潤澤。虔修香火于此山。遐邇駭慕焉。於戲。昔麻姑得道而名。山南真仙昇于龜原。華姑竄于茲嶺。瓊仙妙行。接踵而出。非夫天地矜鑿。從古以然。則何以仙氣氤氳若斯者矣。真卿幸因述職。親覩厥猷。若默而不言。則來者奚述。乃爲銘曰。

綽綽華姑。真仙品徒。芳蓮比色。逸駿爭驅。南郭從魏。西山訪胡。腋窺洛泉。原獲龜烏。靈跡旣儼。曲池猶污。鼎新廟貌。煥發規模。名曰井山。終焉不逾。象來藕獻。馬見鬢朱。簡解空存。紗穿上徂。奠瓜吐實。藹室雲趨。妙行精持。高真是俞。勒銘翠琰。永播玄都。

浪跡先生玄真子張志和碑銘

士有牢籠太虛。擻掖玄造。擺元氣而詞鋒首出。軋無間而理窟肌分者。其惟玄真子乎。玄真子姓張氏。本名龜齡。東陽金華人。父遊朝。清真好道。著南華象罔說十卷。又著沖虛曰馬非馬證八卷。代莫知之。母留氏。夢楓生腹上。因而誕焉。年十六。遊太學。以明經擢第。獻策肅宗。深蒙賞重。令翰林待詔。授左金吾衛錄事參軍。仍改名志和。字子同。尋復貶南浦尉。輕量移不願之任。得還本貫。既而親喪。無復宦情。遂扁舟垂綸。浮三江。泛五湖。自謂烟波釣徒。著十二卷。凡三萬言。號玄真子。遂以稱焉。客或以其文論道縱橫。謂之造化鼓吹。京兆韋諳爲作內解。玄真又述太易十五卷。凡二百六十有五卦。以有無爲宗。觀者以爲碧盧金骨。兄浦陽尉鶴齡。亦有文學。恐玄真浪跡不還。乃于會稽東郭買地。結茅齋以居之。閉竹門十年不出。史人嘗呼爲拘河夫。執舂就役。曾無忤色。又欲以大布爲褐裘。復徐氏聞之。手爲織纈。一製十年。方畧不解。所居草堂。椽柱皮節皆存。而無斤斧之跡。文士效柏梁體作歌者十餘人。浙江東觀察使御史大夫陳公少遊。聞而謁之。坐必終日。因表其所居曰玄真坊。又以門巷湫隘。出錢買地以立閉閤。旌曰迴軒巷。仍命評事劉太真爲敍。因賦柏梁之什。文士詩以美之者十五人。旣門隔流水。十年無橋。陳公遂爲創造。行者謂之大夫橋。遂作告大夫橋文以謝之。常以豹皮爲度。麕皮爲屨。隱素木几。酌班螺盃。鳴榔杖擊。隨意取適。垂釣去餌。不在得魚。肅宗嘗錫奴婢各一。玄真配爲夫妻。名夫曰漁僮。妻曰樵青。人問其故。漁僮使捧釣收綸。蘆中鼓柁。樵青使蘇蘭薪桂。竹裏煎茶。竟陵子陸羽。校書郎裴修。嘗詣問有何人往來。答曰。太虛作室而共居。夜月爲燈以同照。與四海諸公未嘗離別。有何往來。性好畫山水。皆因酒酣乘興。擊鼓吹

笛或閉目。或背面。舞筆飛墨。應節而成。大歷九年秋八月。訊真卿于湖州。前御史李嶠以縑帳請焉。俄揮
灑橫掃。而織纊霏拂。亂槍而攢毫雷馳。須臾之間。千變萬化。蓬壺髣髴。而隱見。天水微茫。而昭合。觀者
如堵。轟然愕眙。在坐六十餘人。玄真命各言爵里。紀年名字。第行于其下。作兩句題。自命酒以蕉葉書之。
授翰立成。潛皆屬對。舉席駭歎。竟陵子因命畫工圖而次焉。真卿以舴艋既敝。請命更之。答曰。儻惠漁舟。
願以爲浮家泛宅。沿沂江湖之上。往來蒼雪之間。野夫之幸矣。其談諧辯捷。皆此類也。然立性孤峻。不可
得而親疎。率誠澹然。人莫窺其喜愠。視軒裳如草芥。屏嗜欲若泥沙。希跡乎道丈夫。同符乎古作者。莫可
測也。忽焉去我。思德茲深。曷以真懷。源諸他山之石。銘曰。
邈玄真超隱淪。齊得喪。甘賤貧。泛湖海。同光塵。宅漁舟。垂釣綸。輔明主。斯若人。豈烟波。終此身。

茅山玄靖先生廣陵李君碑銘

先生姓李氏。諱含光。廣陵江都人。本名弘。以孝敬皇帝廟諱改焉。二十一代祖宏。江夏太守。避王莽徙居
晉陵。遂爲郡人。高祖文嶷。陳柱陽王國侍郎。曾祖榮。皇朝雷州司馬。祖師龕。隱居以求其志。徙于江都。父
孝感。博學好古。雅修彭聃之道。與天台司馬鍊師子微爲方外之交。尤以篤慎著于州里。攷行議諡曰正。
隱先生。母琅琊王氏。賢明有德行。先生孩提則有殊異。晬日獨取孝經如捧讀焉。羈卯好靜處。誦習墳典。
年十八。志求道妙。遂師事同邑李先生遊藝數年。神龍初。以清行度爲道士。居龍興觀。尤精老莊周易之
深趣。執喪過哀。口不嘗甘旨之味。食惟穢麥而已。封植膳羞。皆經其手。號毀骨立。親族莫不傷之。開元十

七年從司馬鍊師于王屋山傳授大法靈文金記一覽無遺綜核古今該明奧旨玄宗知先生徧得子微之道乃詔先生居王屋山陽臺觀以繼之歲餘請居茅山纂修經法頻徵皆謝病不出天寶四載冬乃命中官齋籙書徵之既至延入禁中每欲諮稟必先齋沐他日請傳道法先生辭以足疾不任科儀者數焉玄宗知不可強而止先生嘗以茅山靈跡剪焉將墮真經祕籙亦多散落請歸修葺乃特詔于楊許舊居紫陽以宅之仍賜絹二百疋法衣兩副香爐一具御製詩及序以餞之又禁于山側採捕漁獵食葷血者不得輒入公私祈禱咸絕性卒先生以六載秋到山是歲詔書三至渥澤頻繁暉映崖谷初山中有上清真人許長史楊君陶隱居自寫經法歷代傳寶時遭喪亂散逸無遺先生奉詔搜求悉備其跡而進上之先時玄宗將求大法請先生爲師先生竟執謙沖辭疾而退梟七載春玄宗又欲受三洞真經以其年春之三月中官齋籙書云其月十八日剋授經誥是日于大殿潔修其事遂遙請先生爲玄師并賜衣一襲以伸師資之禮因以玄靖爲先生之嘉號焉仍詔刻石于華陽洞宮以誌之是歲夏五月隱居先生合丹之所有芝草八十一莖散生于松石之間詔碑先生與中官啓告靈仙緘封表進夏又詔以紫陽觀側近二百戶太平崇元兩觀各一百戶並蠲其官徭以供香火秋七月又徵先生既至請居道觀以養疾九載春辭歸舊山其年夏六月前生靈芝之所又產三百餘莖煌煌秀異人所莫覩先生又圖而奏之是歲冬又徵先生于紫庭別院館之十載秋先生又懇辭告老御製序詩以餞之十有一載先生奉詔與門人韋景昭等于紫陽之東鬱岡山別建齋院立心誠肅是夜仙壇林間遍生甘露因以上聞特詔嘉異初隱

居先生以三洞眞法傳昇玄先生。昇玄付體玄先生。體玄付正一先生。正一付先生。自先生距于隱居。凡五葉矣。皆總集妙門大正眞法。所以茅山爲天下道學之所宗矣。於戲。是非可齊也。我物均焉。生死可忘也。覺夢同焉。如出可域。心于變化之際哉。先生以大歷己酉歲冬十一月十有四日。遁化于茅山紫陽之別院。春秋八十有七。其年十二月八日。門人赴喪而至者凡數千人。號奉冠寫。遷窆于雷平山之西陲。遺命以松棺竹杖木几水瓶香奩香爐置藏門內。弟子等仰奉嘉猷。克遵儉德。先生器識眞淳。業行高古。道窮情性之本。學冠天人之際。所以優游句曲。鬱爲王者之師。出人明庭。特寵肩輿之貴。是知順風而問。昔稱于黃帝。望山而請。今見于玄宗矣。又博覽羣言。長于著撰。嘗以本草之書。精明藥物。事關性命。難用因循。著音義兩卷。又以老莊周易爲潔靜之書。著學記義略各三篇。內學記二篇。以續仙家之遺事。皆名實無違。詞旨該博。初先生幼年。頗工篆籀。而隸書尤妙。或賞之。云賢于其父。因投筆不書。玄宗詔山人王旼。強請先生楷書上經一十三紙。以補楊許之闕。先生能于陰陽數術之道。而不以藝業爲能。極于轉鍊服食之事。而不以壽養爲極。但冥懷素樸。妙味芝津。非夫博大之至人。孰能盡於此。眞卿乾元二年。以昇州刺史充浙江西節度。欽承至德。結慕玄微。遂專使致書于茅山。以抒誠懇。先生特令韋鍊師景照復書于眞卿。恩眷綢繆。足勵超然之至。然可師可仰望。紫府而非遙。王事不遑。寄白雲而悠遠。景大歷六年。眞卿罷刺臨川。旋舟建鄴。將宅心小嶺。長庇高蹤。而轉刺吳興。事乖夙願。徘徊郡邑。空懷尊道之心。瞻望林巒。永負借山之記。而景昭景郭闔等。以先生茂烈芳猷。願銘金石。乃邀道士劉明素來託斯文。眞卿與先生

門人中林子殷淑。遺名子韋。渠年嘗接采真之遊。緒聞舍一之。健敢強名于巷。黨曷足辨于鴻。臺其謂曰。抱一混茫。人之紀綱。先生以之。氣王神強。乃啓玄旨。玄門以彰。乃爲帝師。帝道惟康。甘露呈瑞。靈芝效祥。上士云感。高風再揚。鶴返仙廟。雲辭帝鄉。退歸而老。妙齋行藏。德本無累。道心有常。寔曰形解。孰云坐亡。伐石表墓。勒銘傳芳。谷變陵遷。厥跡彌光。

文忠集卷十

墓碣墓誌

曹州司法參軍祕書省麗正殿二學士殷君墓碣銘

善父母之謂孝。陸昆友之謂悌。孝悌也者。其仁之本歟。經天緯地之謂文。博古知今之謂學。文學也者。其德之蘊歟。誰其兼之。卽我伯舅殷君其人矣。君諱踐猷。字伯起。陳郡長平人。五代祖不害。舊集作不古非以孝見梁書。高祖英童。周御正中大夫麟趾學士。曾祖開禮。唐太子中書舍人弘文館學士。祖令言。校書郎。淄川令。父子敬。太常博士。吳令。累葉皆以德行名義。儒學翰墨。聞于前朝。君卽吳縣之元子。幼而聰悟絕倫。長而典禮不易。年十三。日誦左傳二十五紙。讀稽聖傳一遍。亦誦之。博覽羣言。尤精史記。漢書。百家氏族之說。至于陰陽。數術。醫方。刑法之流。無不該洞焉。與賀知章。陸象先。我伯父元孫。韋述。友善。賀呼君爲龜龜。以龜千年五聚。問無不知也。君性方正。志業深淳。識理清遠。人皆望而服之。解褐杭州參軍。刺史宋璟。以相國之重。簡貴自居。無所推揖。每見君。必特加禮敬。政事之諉譏者。皆咨決焉。開元初。舉文儒異等。授祕書省學士。尋改曹州司法參軍。麗正殿學士。與韋述。袁暉。同修王儉。今書七志。及羣書四錄。流別銓次。皆折衷于君。璟與蘇頲。旣入相。每引君詢以當代之務。友于兄弟。羣從宗黨。必盡紉綬之恩。長妹蘭陵郡太夫人。真卿先妣也。中年孀。遺孤十人。未能自振。君悉心訓獎。皆究恩意。故能長而有立。開元九年秋七

月九日有叔父臨黃尉子玄之喪。哀慟嘔血。終於京師通化坊之私第。夫人蘭陵蕭氏。司空璠之玄孫。括州司馬宋國公興宗之女。賢和齊肅。秉修禮度。能讀論語周易。泛觀史傳。率諸婦以和義。故閨範修睦焉。君之捐館。以清白留遺。家道素然。夫人躬甘菲糲。勸勉桑穡。晏息晨興。以率勵僮僕。行之數歲。經費羨焉。教誨三子。攝寅克齊等。皆克負荷。攝大斌令。克齊高平尉。爲真卿河東覆屯軍試判官。並不幸早世。寅聰達有精識。能繼先父之業。有大名于天下。舉宏詞。太子校書永寧尉。筮殺護吏。貶移澄城丞。久疾將歿。願瞻太夫人。欲訣不忍。其子監察御史亮。年未志學。隱而潛畫之。及寅卒。斬指剪髮。寘于棺中。誓事太夫人。不敢渝常日。及有疾。不脫衣帶者數年。故白燕巢于苦楸。乾元元年。太夫人季女適于邠州司法陸超。板輿隨牒。俄而遘疾。三月朔日。終於超之官舍。春秋八十有一。龜筮未從。因權殯于三水。亮以校書郎遷壽安尉。爲真卿荆南節度推官。廣德二年。十有二月。與弟令榮陽尉永。匍匐徒步。力護雙親。合祔。君夫人于新安縣之龍澗原。三子塋。從理命也。嗚呼。以君之才之美。被服純行。加人數等。清修素業。爲代元龜。竟不得贊皇極。而叶彝倫。登泰階。而饒百辟。不其惜矣。嗟乎。仲尼聖者也。終於魯司寇。而君官與之比。公明達者也。年纔四十八。而君壽與之齊。豈聖賢之道。有遭遇乎。將運命之數。有窮通乎。茲小子所以獻疑而述報施也。大歷五年夏五月。真卿以恩宥刺于撫州。採石刻頌丹。寄碣于墓左。銘曰。般之後昆。奕葉儒門。盛烈存兮。君能濟美。於穆不已。明德尊兮。運促道長。身歿名揚。教義敦兮。合祔先窆。述遵理命。哀順孫兮。高墳崔嵬。龍澗之隈。映鮮原兮。斯焉窆止。以望吾子。慰營魂兮。

京兆尹兼中丞杭州刺史劍南東川節度使杜公墓誌銘

九有無虞。行師貴于枉席。四方取則。鉤距資乎浩穰。誰其有之。則杜公其人矣。公諱濟。字應物。京兆杜陵人。皇主客郎中續之曾孫。明堂令知讓之孫。贈太子少保惠之第三子。姿度韶舉。心靈敏達。在家必聞。既蘊睦親之志。所居則化。多稱不器之能。解褐南鄭主簿。州主司馬。垂引在使幕。轉長杜尉隴西法曹。皇甫侁江西採訪。奏爲推官。授大理司直。攝殿中侍御史。賜緋魚袋。尋正除殿中歷宰郿渭南成都三縣。縣州刺史。賜紫金魚袋。戶部郎中。加朝散大夫。廣德中。檢校駕部郎中。上柱國。充嚴武劍南行軍司馬。杜鴻漸分蜀爲東西川。以公爲副元帥。判官。知東川節度。拜太中大夫。縣劍梓遂都防禦使。梓州刺史。兼中丞。時寇盜充斥。公示以威信。八將之不隕。公之力焉。尋拜東川節度使。俄而移軍。復爲遂州都督。徵拜給事中。間歲拜京兆少尹。明日遷京兆尹。出爲杭州刺史。公移清簡。庭落若無吏焉。不幸感風疾。以大歷十二年歲次丁巳秋七月二日辛亥。薨于常州之別館。春秋五十有八。夫人京兆韋氏。太子中舍迪之第三女也。沈敏精深。高明柔克。幹夫之蠱。以懋厥家。生三子四女。而公卽世。夫人星言晝哭。躬護櫬。與子肅以冬十一月二十有四日壬申。歸窆于萬年縣洪原鄉之少陵原。耐先塋也。嗚呼。以公之志業材力。宜其振揮鱗鬪。凌厲清浮。而命迨成山。功虧長世。吁。足恨也。真卿忝居友婿。亟接周行。痛音徽之永隔。感存歿其何已。銘曰。

藹藹顯顯。時惟杜公。業先臺省。政洽軍戎。乃尹京師。乃麾江東。帝方俟理。命則不融。內子護喪。哀哀送終。

祭文

祭姪季明文

維乾元元年歲次戊戌九月庚午朔三日壬申第十三叔銀青光祿大夫使持節蒲州諸軍事蒲州刺史上輕車都尉丹陽縣開國侯真卿以清酌庶羞祭于亡姪贈贊善大夫季明之靈惟爾挺生夙撰幼德宗廟瑚璉階庭蘭玉每慰人心方期戢殺何圖逆賊間發稱兵犯順爾父竭誠常山作郡余時受命亦在平原仁兄愛我俾爾傳書爾既歸止爰開土門土門既開兇威大斃賊臣不久孤城圍逼父陷子死巢傾卵覆天不悔禍誰爲荼毒念爾遺殘百身何贖嗚呼哀哉吾承天澤移牧河關泉明比者更陷常山攜爾首櫬及茲同還撫念摧切震悼心顏方俟遠日卜爾幽宅魂而有知無嗟久客嗚呼哀哉尙饗

文忠集卷十一

書帖

與李太保帖

不審所苦何如。奉計已痊復。真卿緣馬病。朝回已乏。未遂馳謁。謹勒參候。不次。謹狀。十一日。刑部尙書顏真卿狀。上李太保大夫公閣下。于手贊檢未得帖之。謹空。

拙于生事。舉家食粥。來已數月。今又罄竭。祗益憂煎。輒恃深情。故令投告。惠及少米。實濟艱勤。仍恕于煩也。真卿狀。

陰寒不審。太保所苦何如。承渴已損。深慰馳仰。所檢贊猶未獲。望于文書細檢也。病妻服藥。要少鹿肉脯。有新好者。望惠少許。幸甚。專馳謁不次。謹狀。二十九日。刑部尙書顏真卿狀。上李太保大夫公閣下。謹空。

與盧倉曹帖

昨奉辭。但增悵仰。承已過埭。不得重別。情深惘然。珍重。謹此不宜。真卿白。二十四日。

與蔡明遠帖

蔡明遠
鄱陽人

真卿昔刺饒州。卽嘗趨事。及來江右。無改厥勤。靖言此心。有足嘉者。一昨緣受替歸北。中止金陵。闔門百口。幾至餬口。明遠與夏鎮不遠數千里。冒涉江湖。連舸而來。不愆暑刻。竟達命于秦淮之上。又隨我于邗

溝之東。追攀不疲。以至邵伯南埭。始終之際。良有可稱。今既已事方旋。指期斯復。江路悠緬。風濤浩然。行李之間。深宜尙慎。不宜真卿報。

聞鄒游與明遠同來。欲至采石。計其不久亦合。及吾淮泗之間。脫若未到。見之宜傳此意。遣此不宜真卿報。

與夫人帖

真卿頓首。奉承十四日遷厝承問。悲慕不能自勝。惟攀慕不及。摧毀何堪。痛當奈何。痛當奈何。凝寒。惟動靜支適。兒子等保侍。真卿離官已久。事須十間。前至鄭州汴州已來。專奉侍。一日只擬一驛。計過大事後。發猶恐遲。必望知此緩急。勿遲滯。足下不來。義無獨去之法。必請矜此。狼狽所望。今到汴州。水下不愁河凍。書祭器等。先下船去。真卿十一日且發東京。佇望早來。早來。謹不次。真卿頓首。夫人閣下。十一月八日。問訊頌鬪蒙郎和奴光嚴深遠憶。或至十三日得發。

寒食帖

天死殊未注。汝定成行否。寒食只數日間。得且住爲佳耳。

緒州帖

題驛舍壁

真卿奉命來此。事期未竟。止緣忠勤。無有旋意。然中心悵悵。悵悵集作悵悵非始終不改。游于波濤。宜得斯報。千百年間。察真卿心者。見此一事。知我是行亦朝達于時命耳。人心無路見。時事只天知。舊集後二句不載

與郭僕射書

十一月日某謹奉書于右僕射定襄郡王郭公閣下。蓋太上有立德。其次有立功。是之謂不朽。抑又聞之。端揆者百寮之師長。諸侯王者人臣之極地。今僕射挺不朽之功業。當人臣之極地。豈不以才爲世出。功冠一時。挫思明跋扈之師。抗回紇無厭之請。故得身畫凌煙之閣。名藏太室之廷。吁足畏也。然美則美矣。而終之始難。故曰滿而不溢。所以長守富也。高而不危。所以長守貴也。可不儆懼乎。書曰。爾惟弗矜。天下莫與汝爭功。爾惟不伐。天下莫與汝爭能。以齊桓公之盛業。片言勤王。則九合諸侯。一匡天下。葵丘之會。微有振矜。而叛者九國。故曰。行百里者半九十。言晚節末路之難也。從古至今。暴我高祖太宗已來。未有行此而不理。廢此而不亂者也。前者菩提寺行香。僕射指麾宰相與兩省臺省已下常參官並爲一行坐。魚開府及僕射率諸軍將爲一行坐。若一時從權。猶未可。何況積習更行之乎。一昨以郭令公以父子之軍。破犬羊兇逆之衆。衆情忻喜。恨不頂而戴之。是用有興道之會。僕射又不悟前失。竟率意而指麾。不顧班秩之高下。不論文武之左右。苟以取悅軍容爲心。曾不顧百寮之側目。亦何異清畫攫金之士哉。甚非謂也。君子愛人以禮。不聞姑息。僕射得不深念之乎。真卿竊聞軍容之爲人。清修焚行。深入佛海。況乎收東京有殄賊之業。守陝城有戴天之功。朝野之人。所共貴仰。豈獨有分子僕射哉。加以利衰塗割。恬然於心。固不以一毀加怒。一敬加喜。尚何半席之座。咫尺之地。汨其志哉。且鄉里上齒。宗廟上爵。朝廷上位。皆有等威。以明長幼。故得彝倫。敍而天下和平也。且上自宰相御史大夫兩省五品已上。供奉官自爲一

行十二衛大將軍次之。三帥三公令僕少師保傅尚書左右丞侍郎自爲一行。九卿三監對之。從古以然。未嘗參錯。至如節度軍將各有本班。卿監有卿監之班。將軍有將軍之位。縱是開府特進。並是勳官用蔭。卽有高卑。會議合依倫敘。豈可裂冠毀冕。反易彝倫。貴者爲賤所凌。尊者爲卑所逼。一至于此。振古未聞。如魚軍容階雖開府。官卽監門。將軍朝廷列位。自有次敘。但以功績既高。恩澤莫二。出入王命。衆人不敢爲比。不可令居本位。須別示有尊崇。只可于宰相師保座南橫安一位。如御史臺衆尊知雜事御史別置一榻。使百寮共得瞻仰。不亦可乎。聖皇時開府高力士承恩傳宣。亦只如此橫座。亦不聞別有禮數。亦何必令他失位。如李輔國倚承恩澤。徑居左右僕射及三公之上。令天下疑怪乎。古人云。益者三友。損者三友。願僕射與軍容爲直諒之友。不願僕射爲軍容佞柔之友。又一昨裴僕射誤欲令左右丞勾當尚書。當時輒有訓對。僕射恃貴張目。見尤介衆之中。不欲顯過。今者興道之會。還爾遂非。再獨八座。尚書欲令便向下座。州縣軍城之禮。亦恐未然。朝廷公議之宜。不應若此。今旣若此。僕射意只應以爲尚書之與僕射。若州佐之與縣令乎。若以尚書同于縣令。則僕射見尚書令得如上佐事刺史乎。益不然矣。今旣三廳齊列。足明不同刺史。且尚書令與僕射同是二品。只較上下之階。六曹尚書並正三品。又非隔品致敬之類。尚書之事僕射。禮數未敢有失。僕射之顧尚書。何乃欲同卑吏。又據宋書百官志。八座同是第三品。隋及國家始升作二品。高自標致。誠則尊崇。向下擠排。無乃傷甚。況再于公堂獨咄。常伯當爲令公初到。不願紛披。僂俛就命。亦非理屈。朝廷紀綱須共存立。過爾隳壞。亦恐及身。明天子忽震電含怒。責數彝倫之人。

則僕射其將何辭以對。

贊

李侍御寫真贊并序

前殿中侍御史正議大夫行洛陽縣令隴西李構年三十七

洛陽精堅強項稱賢粉績圖出風規宛然眸容昭寫卓立神全舉板迎揖吾將答焉。

題名

華嶽廟題名

皇唐乾元元年歲次戊戌冬十月戊申真卿自蒲州刺史蒙恩除饒州刺史十有二日辛亥次于華陰與監察御史王延昌大理評事攝監察御史穆寧評事張澹準陰令劉嵩主簿鄭鎮同謁金天王之神祠。

東林寺題名

唐永泰丙午歲真卿以罪佐吉州夏六月壬戌與殷亮章桓桓舊集作柏非尼賈鎰鎰舊集作鑑非同次于東林寺則同愔熙怡二公忠秀正義二律師曩楊鶴存焉仰廬阜之鐘峯想遠公之遺烈升神運殿禮僧伽衣觀生法師慶尾扇謝靈運翻涅槃經貝多梵夾忻慕之不足聊寫刻于李張二公耶舍禪師之碑側。

西林寺題名

唐永泰丙午歲真卿以疎拙貶佐吉州夏六月癸亥與殷亮章桓尼賈鎰楊鶴憩于西林寺有法真律師

深究清淨毗尼之學。卽律祖師志恩之上足。余內弟正義之阿闍黎也。緬懷遠見二公之遺烈。導余躋重閣。示余以張僧繇畫盧舍那佛像。景梁武帝蹙線繡鉢袋。因寓題歐陽公所撰永公碑陰。

靖居寺題名

唐永泰二年。真卿以罪佐吉州。聞青原靖居寺。有幽絕之致。御史韓公涉。刺史梁公乘。嘗見招。欲同遊而不果。大歷二年十月壬寅。評事章甫已使將歸。乃與別駕李【案】原本清河房澄。同官主簿陸涓甫。男七步。真卿子姪蔡頎。泚頤。盱等。同宿于下坊。明日。及僧明則智清。而登禮焉。因觀行思天師經始雙泉之靈迹。道契律師。纂成【案】原本路之祕藏。徘徊瞻仰。乃援翰而勒于碑陰。

題湖州碑陰

太保謝公。東晉咸和中。以吳興山水清遠。求典此郡。郡西至長城縣。通水陸。今尙稱謝公塘。及遷去郡。人用懷思。刻石記功焉。歷代至皇唐。天寶末。羣盜起。公之碑誌。失于所在。睿求蕪沒。深爲愴然。借舊史遺文。敬刊息石。公之雅量弘度。蓋嗟嘆之不足。

文忠集卷十二

序

尙書刑部侍郎贈尙書右僕射孫洙文公集序

古之爲文者。所以導達心志。發揮性靈。本乎詠歌。終乎雅頌。帝庸作而君臣動色。王澤竭而風化不行。政之興衰。實繫于此。然而文勝質。則繡其盤。而血流漂杵。質勝文。則野于禮樂。而木訥不華。歷代相因。莫能適中。故詩人之賦麗。以則詞人之賦麗。以淫。此其效也。漢魏已遠。雅道微缺。梁陳斯降。宮體聿興。既馳騁于末流。遂受嗤于後學。是以沈隱侯之論謝康樂也。乃云。靈均已來。此未及覩。盧黃門之序陳拾遺也。而云。道喪五百歲。而得陳君。若激昂頽波。雖無害于過正。權其中論。不亦傷于厚誣。何則。雅鄭在人。理亂由俗。桑間濮上。胡爲乎純古之時。正始皇風。奚獨乎凡今之代。蓋不然矣。其或斌斌彪炳。郁郁相宣。膺期運以挺身。奄寰瀛而首出者。其惟僕射孫公乎。公諱洙。河南鞏人。其先自樂安武水寓于涉。而從焉。父嘉之以詞學登科。官至宋州司馬。公風裁激明。天才傑出。學窮百氏。不好非聖之書。文統三變。特深稽古之道。故逸氣上躋。而高情四達。羌索隱乎混元之始。表獨立於常均之外。不其盛歟。年數歲。卽好屬文。十五時。相國齊公崔日用試土火爐賦。公雅思逾麗。援翰立成。齊公駭之。約以忘年之契。爾後遂有大名。故其試言也。年未弱冠。而三擅甲科。吏部侍郎王丘試竹籬賦。降階約拜。以殊禮待之。相國燕公張說覽其策。

而心醉。其序事也。則伯樂川記及諸碑誌。皆卓立千古。傳于域中。其爲詩也。必有逸韻佳對。冠絕當時。布在人口。其詞言也。則宰相張九齡欲掩疵瑕。沈吟久之。不能易一字。公之除庶子也。苑咸草詔。曰西掖掌綸。朝推無對。議者以爲知言。凡斯夥多。庸可悉數。故燕國深賞公才。俾與張九齡許景先韋述同遊。門庭命子均埴。施伯仲之禮。江夏李邕自陳州入計。繕寫其集。齋以詣公。託知己之分。其爲先達所重也如此。公文雅有清鑒。典攷功時。精覈進士。雖權要不能逼。所獎擢者二十七人。數年間。宏詞判等入甲者一十六人。授校書者九人。其餘咸著名當世。已而多至顯官。明年典舉亦如之。故言第者。必稱孫公而已。夫然信可謂人文之宗師。國風之哲匠者矣。公凡所著詩歌賦序策問贊碑志表疏制誥等。不可勝紀。遭二朝之亂。多有散落。子宿絳成等。夙奉過庭之訓。咸以文章知名。同時臺省。乃編次公文集爲二十卷。列之于左。庶乎好事者。傳寫諷誦。以垂乎無窮。亦何必藏名山而納石室也。真卿昔觀光乎天府。實荷公之獎權。見命爲序。豈究端倪。時則永泰元年仲秋之月。至若世系閥閱。蓋存諸別傳。此不復云。

懷素上人草書歌序

開士懷素。僧中之英。氣概通疎。性靈豁暢。精心草聖。積歲時。江嶺之間。其名大著。故吏部尚書韋公陟。觀其筆力。昂以有成。今禮部侍郎張公謂。賞其不羈。引共遊處。兼好事者。同作歌以贊之。動盈卷軸。夫草藁之作。起于漢代。杜度崔瑗。始以妙聞。迨乎伯英。尤擅其美。羲獻茲降。虞陸相承。口訣手授。以至于吳郡張旭長史。雖恣性頗逸。超絕古今。而楷法精詳。特爲真正。某早歲嘗接游居。屢蒙激勸。教以筆法。資質劣弱。

又嬰物務不能懲習。迄用無成。追思一言。何可復得。忽見師作縱橫不羣。迅疾駭人。若還舊觀。向師得親承善誘。亟揖規模。則入室之賓。舍子奚適。嗟嘆不足。聊書以冠諸篇首。

送劉太冲序

劉太冲彭城之華望者也。自開府垂名于宋室。澤州攷績于國朝。道素相承。世傳儒雅。尚矣。夫其果行修潔。斯文彪蔚。鄂木照乎移華。龍驥躡乎雲路。則公山正禮。策高足于前。冲與太真。嗣家聲于後。有日矣。昔余作郡平原。拒兇殘。而請與從事。掌銓吏部。第甲乙。而超升等夷。爾來蹉跎。猶屑卑位。雖才不偶命。而德其無鄰。故冲之西遊。斯有望矣。江月弦魄。秦淮頂潮。君行句溪。正及春水。勗哉之子。道在何居。

送辛子序

醇白之士曰隴西辛晃。銳業班漢。顯門名家。十五而志學克明。五十而勵精益懋。拳拳不失。慕回也之服膺。衰竟可聽。同茂先之善說。昔我高叔祖。郟州使君。著決疑一十二卷。問答稱爲大顏。曾伯祖祕書監。府君集註解成一十二帙。名儒斟酌煩省。摛撫英華。勒成三十篇。名之曰漢略。夫其發凡舉例。晃序言之已詳。惜乎困于縑紉。不獲繕寫。遂使精義沈鬱。闕然未彰。吁足嘆也。二月初吉。金陵氣暖。抵淮上之諸侯。所如必合。及滁川之美景。未至方歎。羣子賦詩以寵之。

文忠集卷十三

記

東方先生畫贊碑陰記

東方先生畫贊者。晉散騎常侍夏侯湛之所作也。湛字孝若。父莊爲樂陵太守。因來覲省。遂作斯文。贊云。大夫諱朔。字曼倩。平原厭次人。魏建安中。分厭次爲樂陵郡。又爲郡人焉。厭次今移屬樂安郡。東去祠廟一百里。故厭次城。今在平原郡安德縣東北二十二里。廟西南一里。先生形像。今則捏素爲之。并二細君侍焉。郡嘗爲德州。其贊開元八年。刺史韓公思復刻于石碑。真卿去歲拜此郡。屬殿中侍御史平公列。監察御史閻公寬。李公史魚。右金吾曹曹宋公審咸。以河北探訪使東平王判官巡按押至。真卿候于境上。而先生祠廟不遠道周。亟與數公。暴家兄淄州司馬曜卿。長史前洛陽蕭晉用。前醴泉尉李伯魚。徵君左驍衛兵曹張璠。遊尉韋宅相。朝城主薄韋夏。有司經正字畢燿。族弟渾。前參軍鄭悟初。同茲謁拜。退而遊于中唐。則韓之刻石存焉。僉嘆其文字纖靡。駁薛生金。四十年間。已不可識。真卿因勒諸他山之石。蓋取其字大可久。不復課其工拙。故授翰而不辭焉。至若先生事跡。則載在太史公書。漢齊風俗通。武帝內傳。十洲記。列仙。神仙。高士傳。此不復紀焉。有唐天寶十三載。季冬辛卯朔。建。

鮮于氏離堆記

閩州之東百餘里。有縣曰新政。新政之南數千步。有山曰離堆。斗入嘉陵江。直上數百尺。形勝縮疊。敲壁峻肅。上崢嶸而下迴泐。不與衆山相連屬。是之謂離堆。東而有石堂焉。卽故京兆尹鮮于君之所開鑿也。堂有室。廣輪袤丈。蕭豁洞敞。虛聞江聲。微見人羣。象人村川墳。若指諸掌。堂北磐石之上。有九曲流杯池焉。懸源螭。猶蹙噴鶴。味醴渠。股引迥坐環溜。若有良朋。以傾醇酎。堂南有茅齋焉。遊于斯。息于斯。聚賓友于斯。虛而來者實而歸。其齋壁間有詩焉。皆君舅著作郎嚴從君甥殿中侍御史嚴侁之等。美君考槃之所作也。其右有小石廬焉。亦可蔭而踰據矣。其松竹桂博冬青雜樹。皆徙他山而栽蒔焉。其上方有男宮觀焉。署之曰景福。君第京兆尹叔明。至德一年十月。嘗在尙書司勳員外郎之所奉置也。君諱向。字仲通。以字行。漁陽人。卓爾堅。毅然抗直。易有之曰。篤實輝光。書不云乎。沈潛剛克。君自高曾已降。世以財雄。招徠賢豪。施舍不倦。至君繼序。其流益光。弱冠以任俠自喜。尙未知名。乃慷慨發憤于焉。卜築養蒙學文。忘寢與食。不四三載。展也大成。著作奇之。勗以賓薦。無何以進士高第。驟登臺省。天寶九載。以益州大都督府長史兼御史中丞。持節劍南節度副大使。知節度事。劍南山南西道採訪處置使。入爲司農少卿。遂作京兆尹。以忤楊國忠。貶郡陽郡司馬。十有二載。秋八月。除漢陽郡太守。冬十有一月。終于所任官舍。悲夫。雄圖未伸。志業已空。葬于縣北。表附先塋。禮也。冢子光祿寺丞昱。匍匐迎喪。星言泣血。自沔泝峽。湍險萬重。肩槁足跣。板笊引舳。凡今幾年。鞍家在目。因心則至。豈無僮僕。曩昱之季。曰尙書都官員外郎昺。克篤前烈。永言孝思。懇【案】原本志反葬于茲。行道之人。孰不跋而眞卿猶子曰。從父兄故僮

師丞春卿之子也。嘗尉閩中。君故舊不遺。與之有忘年之契。叔明昱。昺亦篤世親之歡。真卿因之又忝憲司之寮。亟與濟南蹇昂奉以周旋。益著通家之好。君兄允南。以司膳司封二郎中。弟允臧。以三院御史。偕與叔明。首末聯事。我是用飽君之故。乾元改號。上元之歲。秋八月。哉生魄。猥自刑部侍郎。以言事忤旨。聖恩全宥。貶于蓬州。沿嘉陵而路出。新政適會。昱以成都兵曹取急歸覲。遭我乎貴州之朝。留遊締歡。信宿。徑峴。感今懷昔。遂援翰而志之。叔明時刺商州。昺又申掾京兆。不同躋陟。有恨如何。帝唐龍集。後壬寅仲夏己卯朔十五日甲午。刻于門序之左右。

撫州寶應寺律藏院戒壇記

如來以身口意三業難調伏也。淨尸羅以息其內。行住坐臥四威儀攝善心也。明布薩以昭其外。故曰波羅提本義。是汝之師。則憍陳如之善來。迦葉波之尚法。諸聲聞三歸約衆。十四年以八敬度尼羯磨相承。其致一也。至漢靈帝建寧元年。有北天竺五桑門支法領等。始于長安譯出四分戒本。兼羯磨與大僧受戒。至曹魏有天竺十尼自遠而來。爲尼受具。後秦姚萇弘始十一年。有梵僧佛陀耶舍譯出四分律本。而關內先行僧祇。江南盛行十誦。至魏法聰律師。始闡四分之宗。聰傳道覆。覆傳慧光。光傳雲輝。願傳理隱。樂洪雲。雲傳遵。遵傳智首。首傳道宣。宣傳洪。洪傳法勵。勵傳滿意。意傳法成。成傳大亮。道賓亮。亮傳雲一。賓岸超。惠澄。澄傳慧欽。此皆口相授受。臻至于壺奧。欽俗姓徐。洪州建昌人。蓋漢孺子之後也。二十二尋師于臨川楮山。後五歲削髮。隸于高安龍岡寺。遂受戒。有唐義淨則譯經上足。曰洪州之靈傑。其秉宣

羯磨者曰兩京滌法

舊集與文粹同石本作兩京清滌使法下文斷缺當攷

慧欽智度沖深神用高爽行無權實身絕開遮闡律藏

而日月光明聘辯才而龍象蹴蹈江嶺之外凜然風生開元末北遊京充福先大德常誦大涅槃經而講

之兼明俱舍論維摩金剛經每登講座其下日有二三千人由是名動輦轂屬祿山作亂杖錫南歸居于

西山洪井雙嶺之間慕高僧觀顯之遺蹤于寺北勑置蘭若山泉之美頗極幽絕欽雖堅持律儀而志在

弘濟好讀周易左傳下筆成章著律儀輔演十卷嘗撰本州龍興寺戒壇碑頗見稱于作者三年真卿忝

刺撫州東南四里有宋侍中臨川內史謝靈運翻大涅槃經古臺階局儼然軒構摧圮有高行頭陀僧智

清者首事修葺安居住持明年秋七月真卿績秩將滿有觀察使尙書御史大夫趙國魏公願以我皇帝

降誕之辰奏爲寶應寺仍請山林高行僧三七人冬十月二十三日聖恩允許于是鼎新輪奐其與也勃

焉仍請止觀大師法源法泉襄陽乘覺清源善弘羅浮圓覺佛跡十喻餘杭慧達景當州海通海岸等同

住董修以資景福僉以爲學徒雖增毗尼未立明年三月乃請欽登壇而董振鐸焉仍俾龍岡道幹天台

法裔招提智融白馬法胤法胤衡岱正覺同德義盈香城藏選龍興藏志開元明徹等同乘法事于是遠近駭

奔道場側塞聖像放光而龍王不雨者四旬僧尼等三百五十七人而文士正議大夫前衛尉少卿張延

畢脫俗歸真其名曰壞綱爲稱首焉又欽比年已來爲受具者凡一萬餘人江嶺湖海之間幅員千餘里

像法於變此皆欽教導之力焉臨川在嶺隅未嘗弘律于是二衆三百餘人謂法裔敷演而依止之後有

上都資聖寺高德曰還本律主偉茲能深辨嗟嘆而贊美之請于寺東南置普通無礙禪院院內立鎮國

觀音道場。請善弘居之。以開悟心。要雲一上足曰智融。精持本事。如會會衆。乃命智光等于普通道場。東置律藏院。樹立戒壇。以佇欽公之來儀。且施肇紀之不朽。經營未幾。壇殿鬱興。庶乎渡海浮囊。分毫絕羅刹之請。嚴身瓔珞。照耀有摩尼之光。則入佛位而披伽梨者。名香普熏。神足無極。其可勝紀而蕪絕乎。有唐大歷辛亥歲春三月。行撫州刺史魯郡開國公顏真卿書而誌之。

撫州南城縣麻姑山仙壇記

麻姑者。葛稚川神仙傳云。王遠字方平。欲東之括蒼山。過吳蔡經家。教其尸解。如蟬蛻也。經去十餘年。忽還。語家言七月七日。王君當來過。到期日。方平乘羽車。駕五龍。各異色。旌旗導從。威儀赫奕。如天將也。既至。坐須臾。引見經父兄。因遣人與麻姑相聞。亦莫知麻姑是何神也。言王方平敬報。久不行民間。今來在此。思想麻姑能整來。有頃信還。但聞其語。不見所使人。曰麻姑再拜。不見忽已五百餘年。尊卑有序。修敬無階。思念久煩。信承在彼。登山顛倒。而先被記。當按行蓬萊。今便整往。如是便還。還即親觀。願不即去。如此兩時間。麻姑來。來時不先聞人馬聲。既至。從官當半于方平也。麻姑至。蔡經亦舉家見之。是好女子。年十八九許。頂中作髻。餘髮垂之。至要。其衣有文章。而非錦綺。光彩耀日。不可名字。皆世所無也。得見方平。方平爲起立。坐定。各進行廚。金盤玉杯。無限美膳。多是諸華。而香氣達于內外。擗麟脯行之。麻姑自言。接待以來。見東海三爲桑田。向間蓬萊水。乃淺于往昔者。會時略半也。豈將復還爲陸陵乎。方平笑曰。聖人皆言海中行復揚塵也。麻姑欲見蔡經母及婦。經弟婦新產數十日。麻姑望見之。已知曰。噫。且止勿前。即求

少許米。便以擲之。墮地卽成丹砂。方平笑曰。姑故年少。吾了不喜復作此。曹狡獪變化也。麻姑手似鳥爪。蔡經心中念言。背蚌時得此爪以爬背。乃佳也。方平卽知心中所言。乃使人牽經鞭之曰。麻姑者。神人。汝何忽謂其爪可以爬背耶。見鞭著經背。亦不見有人持鞭者。方平告經曰。吾鞭不可妄得也。大歷三年。真卿刺撫州。按圖經。南城縣有麻姑山。頂有古壇。相傳云麻姑于此得道。壇東南有池。中有紅蓮。近忽變碧。今又白矣。池北下壇傍。有杉松。皆偃蓋。時聞步虛鐘磬之音。東南有瀑布。淙下三百餘尺。東北有石崇觀。高石中猶有螺蚌殼。或以爲桑田所變。西北有麻源。謝靈運詩題入華子岡。是麻源第三谷。恐其處也。源口有神。祈雨驟應。開元中。道士鄧紫陽于此習道。蒙召入大同殿。修功德二十七年。忽見虎駕龍車。二人執節在庭中。顧謂其友竹務猷曰。此迎我也。可爲吾奏。願欲歸葬本山。仍請立廟于壇側。玄宗從之。天寶五載。投龍于瀑布石池中。有黃龍見。玄宗感焉。乃命重修仙宇。真儀侍從雲鶴之類。於戲。自麻姑發迹于茲嶺。南真遺壘于龜原。花姑表異于井山。今女道士黎瓊仙。年八十。而容色益少。僧妙行。夢瓊仙而餐花絕粒。紫陽姪男曰德誠。繼修香火。弟子譚仙巖。法錄尊嚴。而史玄洞。左通玄。鄒鬱華。皆清虛服道。非夫地氣殊異。江山炳靈。則曷由慕懿流光。若斯之盛者矣。真卿幸承餘烈。敢刻金石而志之。時則六年夏四月也。

梁吳興太守柳惲西亭記

湖洲烏程縣南水亭。卽梁吳興太守柳惲之西亭也。瞭以遠峯。浮于清流。包括氣象之妙。實資遊宴之美。

觀夫構宏材拔廣榭豁遠其外睽眾其中雲軒水閣當亭無暑信爲仁智之所創制原乎其始則柳吳興
暉西亭之舊所焉。世增崇之不易其地。按吳均入東記云。暉爲郡起西亭毗山二亭。悉有詩。今處士陳羽
圖記云。西亭城西南二里。烏程縣南六十步。跨苕溪爲之。昔柳暉文暢再典吳興。以天監十六年正月所
起。以其在吳興郡里西。故名焉。文暢嘗與郡主簿吳均同賦西亭五韻之作。由是此亭勝事彌著。間歲頗
爲州僚處而有之。日月滋深。室宇將壞。而文人嘉客。不得極情于茲。憤憤悱悱者久矣。邑宰李清請而修
之。以攄衆君子之意。役不煩費。財有羨餘。人莫之知。而斯美具也。清皇家子。名公之胤。忠肅明懿。以將其
身。清簡仁惠。以成其政。絃歌二歲。而流庸復者六百餘室。廢田墾者三百頃。浮客臻湊。迨乎二千。種桑畜
養。盈于數萬。官路有刻石之堦。吏廚有餐錢之資。敦本經久。率皆如是。略舉數者。其餘可知矣。豈必夜魚
春躍。而後見稱哉。於戲。以清之地高且才。而勵精于政事。何患雲霄之不致乎。清之筮仕也。兩參雋人之
列。再移仙尉之任。毗贊于蜀邑。子男子吳興。多爲廉使盛府之所辟薦。則知學詩之訓。間緝之心。施之于
政。不得不然也。縣稱繁舊矣。今詔升爲望。清當受代。而邑人已軫去思之悲。白府願留者屢矣。真卿重違
耆老之請。啓于十連優詔。以旌清之美也。某不佞。忝當分憂共理之寄。人安俗阜。固有所歸。雖無魯臣掣
肘之患。豈盡子言用力之術。由此論之。則水堂之功。乃餘力也。夫知邑莫若州。知宰莫若守。知而不言。無
乃過乎。今此記述。以備其事。懼不宜美。豈徒媿詞而已哉。大歷一紀之首夏也。

吳興沈氏述祖德記

兩齊徵士吳興沈君名麟。士郡人也。蘊道德。晦于邑之餘。不溪。家貧無資。以織簾爲業。故時人號爲織簾先生。精于禮傳。嘗自詰訓。宗人吏部郎中淵。中書郎約。累薦徵爲著作郎。高臥不起。名重江表。臨終遺教。依皇甫玄晏。棺中貯孝經一卷。穿壙三尺。置棺平土。不設机位。四時地席玄酒而奠。子彝奉而行之。吳郡陸惠曉張融。皆爲之誄。徵士嘗製述祖德碑。立于金鵝山之先塋。年月淹遠。風雨蠹蝕。朽字殘文。翳而莫分。乾元中。爲盜火所襲。碑首毀裂。嶽然將墮。過江二十葉孫御史中丞震。移牒郡國。請其封葺。或屬兵凶。曠而莫修。忽有仆樹生于龜腹。盤根抱趾。聳榦夾碑。嶷如工造。鬱若神化。敲者復正。危而再堅。夫德無名。遇賢而鍾慶。神無質。假物以申應。沈氏積善。旣遠。徵士植德。旣深。天將與舊族乎。吾知沈之復大也。權檢校宗事十九葉于前太廟齋郎怡。拜泣松檟。增修舊塋。感先碑之隕覆。懼遺文之殘闕。乃具他石。傳而貳焉。崇其本所以尊先也。建其新所以嗣德也。以真卿江南婚姻之舊。中外伯仲之穆。謬忝拜刺。見託斯文。刊諸碑陰。以傳無朽。因改其樹爲慶樹。以旌其美焉。沈氏之故事。具于家牒。今闕而不紀。時有唐大歷八年冬十二月。

乞御書題額恩敕批答碑陰記

肅宗皇帝恩許。旣有斯答。御札垂下。而真卿以疎拙蒙譴。粵若來八月旣望。貶授蓬州長史。累今上卽位。寶應元年夏五月。拜利州刺史。屬羌賊圍城。不得入。恩敕追赴上都。爲今尙書前相國彭城公劉公晏所。讓授尙書戶部侍郎。二年春三月。改吏部。廣德元年秋八月。拜江陵尹。兼御史大夫。充荆南節度觀察處。

使以招諭太師中書令僕固懷恩不行。遂知省事。永泰二年春二月。貶峽州別駕。旬餘移貶吉州。大歷三年夏五月。蒙除撫州刺史。六年閏三月。代到。秋八月。至上元。爾來十有六年。困于疎愚。累蒙竄謫。其所採碑石。迄今委諸巖麓之際。未遑崇樹。七年秋九月。歸自東京。起家蒙除湖州刺史。來年春正月。至任。州東有茗讐兩溪。溪左有放生池焉。卽我寶應元聖文武皇帝所置也。州西有白鶴山。山多樂石。于是採而斲之。命吏幹磨礱之。家僮鐫刻之。建于州之駱駝橋東。蓋以抒臣下追遠之誠。昭先帝生成之德。額旣未立。追思莫逮。客或請先帝所賜敕書批答。答中諸事。以緝而勒之。眞卿從焉。勒願斯畢。瞻慕不足。遂志諸碑陰。庶乎乾象昭回。與宇宙而終始。天文煥發。將日月而齊暉。時則有唐大歷九年青龍甲寅之歲。孟秋甲子之日也。

文忠集卷十四

記

宋州官吏八關齋會報德記

敘石壁事附

夫德之所感。淪骨髓而非深。誠之所至。去神明而何遠。有唐大歷壬子歲。宋州八關齋會者。此都人士。兼文武將吏。朝散大夫使持節宋州諸軍事行宋州刺史兼侍御史本州團練守捉使賜紫金魚袋徐向等。奉爲河南節度觀察使開府儀同三司太子太師左右僕射知省事兼御史大夫汴州刺史上柱國信都郡王田公頌疾良已之所建也。公名神功。冀州南宮人。稟元和之粹靈。膺期運以傑出。含弘厚下。正直率先。起孝而德感生人。竭忠而精貫白日。和衆必資于寬簡。安人務在于撫柔。況乎武藝絕倫。英謀沈秘。所向而前。無強敵。日新而學。有緝熙。故能殿天子之邦。鬱蒼生之望。有日矣。賊構逆。公以平盧節將。佐今右僕射李公忠臣。收滄德。攻相州。拒杏園。守陳留。許叔冀降而陷焉。思明懼忠臣圖己。令公佐南德信。隨劉從諫。收江淮。至宋州。欲襲李銑。公斬德信。走從諫。遂并其衆而報焉。肅宗大悅。拜公鴻臚卿。再襲敬釭于鄆州。加中丞。討劉展于潤州。斬平之。遷徐州刺史。明年拜淄青節度使。屬侯希逸自平盧至。公以州讓之。時宋州刺史李岑爲賊所圍。副元帥李光弼請公討平之。拜御史大夫。加開府。充兗鄆節度。破法子營。又討敬釭。釭歸順焉。史朝義聞之。奔下博。投范陽。自縊死。廣德元年。授戶部尙書。封信都郡王。上幸陝。公首

末扈從。都知六年兵馬。每食宿。公皆躬自省視。上感焉。方委以政事。公涕泣固辭而止。二年拜汴宋節度。遷兵部。大歷二年。加右僕射。封母清州張氏爲趙國夫人。妻信安郡王禕女爲涼國夫人。太夫人慈和勤儉。睦于親黨。公性純孝。居常不離左右。閱讀書史。或時疾病。公輒累月不茹葷。家中禮懺不絕。仍造崇夏弘聖二寺。以祈福祐。五年兼判左僕射。知省事。加太子太師。公德厚量深。勞謙重慎。功既高而心益下。位彌大而體益恭。故遠無不懷。邇無不肅。今夏四月。忽嬰熱疾。沈頓累旬。積善降祥。勿藥過喜。鷹犬之翫。悉皆棄捨。羣帥感焉。無復弋獵。四履之內。咸懷歡欣。睢陽之人。踊躍尤甚。乃咨于州將曰。昔我公之陷賊也。至敝邑。而首誅德信。李岑之見圍也。破其黨。而克保城池。是卽我公再有再造于敝邑矣。微我公之救恤。則皆死于鋒鏑。入于煎熬矣。尙何能保完家室。嬉戲鄉井者乎。不資齋明。何以報德。徐公悅而從之。來五月八日。首以俸錢三十萬。設八關大會。飯千僧。于開元伽藍。將佐爭承。惟恐居後。已而州縣官吏長史苗藏實等。設一千五百人爲一會。鎮遏團練官健副使孫琳等。設五百人爲一會。耆壽百姓張烈等。設五千人爲一會。法筵等供。仄塞于郊垆。贊唄香花。喧填于晝夜。其餘鄉村聚落。來往舟車。聞風而靡督自勤。登惠而沐先胥懋者。又不可勝數矣。非夫美政淳深。德風汪濊。則何以感人若此。其至者乎。某叨接好仁。飽承餘烈。觀茲盛美。益覩求蒙。若不垂諸將來。則記事者奚述。

敝石幢事

宋州刺史崔倬

會昌中有詔大除佛寺。凡鎔塑繪刻。堂閣殿宇。關於佛祠者。焚滅銷破。一無遺餘。遣御史覆視之。州縣

震畏至于碑幢銘鏤贊述之類亦皆毀拆瘞藏之此州開元寺先有太師魯郡顏公以郡守僚吏州人等爲連帥田氏八關齋會鑄記大幢立石表丈而圍再幾尋程材巨異八觚如砥偉詞逸翰龍躍鸞翔時刺史邑宰以其大不可拆遂鑿鑿缺敗以仆之蓋三面僅存委埋于土倬大中己巳歲守郡明年嘗暇日訪求前賢事蹟郡從事涂君因言有魯公石幢索而得之壇壤之下癩瘻壞失文義乖絕尋釋研究不可復知意其邑居之中必有藏錄其文者果于前刺史唐氏之家得其模石本未完備炳然輝耀溢目倬自幼學慕習魯公書法纔不能窺涉其門宇然惜其高蹤堙沒遂命攻治其傷殘補續其次雖眞贗懸越貂狗相屬且復瞻仰魯公遺文昭示于後矣大中五年正月一日敕

通議大夫守太子賓客東都副留守雲騎尉贈尚書左僕射博陵崔孝公宅陋室銘記

公諱沔字若冲博陵安平人其先出于齊太公之後自亭伯三世文宗祕書監六【案】原本派別叔軌季

則俱死王事神謙神通並高循績子彭弘度以武幹稱景雋巨倫以文行著繼方面者累代列史傳者十人奕葉相仍恒爲鼎族曾祖弘峻隋銀青光祿大夫趙王長史祖儼皇朝益州雒縣令父體年未四十爲庫部員外郎因擇能吏爲壽安令又充江西道廉察使徙醴泉遂歷四邑盤桓不進以剛正也累至朝散大夫汝州長史封安平縣男贈衛尉少卿公卽安平之次子也全德天至成人玉立蓋聖代之寶臣華宗之孝子文章之哲匠禮樂之祖師旣不可以一名又何能以悉數年二十四舉鄉貢進士攷功郎季迥秀器異之曰王佐才也遂擢高第其年舉賢良方正對策萬數公獨居第一而兄渾亦在甲科典試官梁載

言陳子昂歎曰。雖公孫暹。鄒不及也。召見前殿。拜麟臺校書郎。繇是名蓋天下。御史張思敬以德行薦。久之以資授陸渾主簿。平陽王敬暉弘度外之交。略上官之禮。丁府君憂。服除。太夫人勉起之。以所試超邁。擢拜左補闕。遷殿中侍御史。奉敕按竊金者。公得其情。許之不死。竟得減論。諸王或恃貴不遵法度。舉而按之。其不吐茹也如此。尋遷起居舍人。當扈從。以親老。抗疏乞退。薦琅瑯王丘。太原郭濬。渤海封希顏等。自代。睿宗嘉之。特許留司。以遂其孝養。遷祠部員外郎。倖僧有請度人者。公拒不奉詔。遷給事中。大理卿韓思復用法小差。權臣致劾。公特寬之。遷中書省舍人。改紫微。其官仍舊。又固辭。以親老。除虞部郎中。開元初。攝御史中丞。或訟吏曹之不平。公與崔泰之銜命詳理。多所收拔。俄而卽真。兼都畿按察使。歲或不稔。公請發粟賑貸之。賴全活者以萬數。內謁者霍玄忠有罪。公執之以聞。玄宗使以璽書勞之。公之澄清中外也。以畿縣令長陸景融。劉體微。盧暉。有異政。丞尉宋遙。皇甫翼。陳希烈。宋鼎。蕭隱之。范冬芬。楊慎餘。劉日正。高昌寓。州掾李瑱。裴曠等。並以清白吏疏而薦之。二十二年。置十道採訪使。公所舉六人在焉。執事子有不法者。公舉之不回。移著作郎。尋遷祕書少監。修圖書使。尋判大理卿。禮部侍郎。公旣職司典禮。乃刪寫疏論數百卷。以備闕遺。特加朝散大夫。遷左庶子。丁太夫人憂。徵拜中書侍郎。出爲魏州刺史。乃肇移元城。徙置新市。吏人便之。乙丑歲。玄宗東封。知頓。奏課第一。賜絹二百疋。嶽下觀禮。獻慶雲頌。又賜絹一百疋。明年入朝。分掌十銓。公與王丘爲選人所歌。曰。沔人澄明澈底清。丘山介直連天峻。時人趨之。還州。以理有異績。御史大夫崔隱甫。中丞宇文融。朝服表薦。璽書寵慰。無何徵拜左散騎常侍。上以六宮

親蠶絲。賜近臣公獻御絲賦。又侍謙別殿賦。端午詩。屢蒙錫以縑帛。綵羅兼判。國子祭酒。俄充東都副留守。十七年。有事陵廟。追贈安平公。及太君日安。【案】原本四字。駕還。罷留守。二十年。奉敕撰龍門公宴詩序。賜絹百疋。延入集賢院。修老子道德經疏。行于天下。二十一年。遷祕書監。修撰如故。屬耕籍田。爲居守。賜絹百疋。遷太子賓客。出兼懷州刺史。二十四年。罷州。又以本官充東都副留守。累加通議大夫。二十七年冬。十一月十有七日。寢疾。薨于位。春秋六十有七。玄宗震悼。贈禮部尚書。葬日。量借手力幔幕。故吏前監察御史博陵崔頌爲公行狀云。公德充符契。精貫人極。孝愛聞于天下。制作垂于無窮。執太夫人之喪。徒跣吐血。以身爲糞土。況乎含弘內恕。夷坦外名。德至矣乎。今之遠者。若以富貴崇德行。藏養高。則老萊闕于榮親。黔婁偏于謀道。又加于古人矣。故養則致其樂。喪則過乎哀。以兄弟之感。亞其親。甥姪之慈。甚其子。至于藥砭備物。溫濟異宜。手胝杵臼之間。身辱澣濯之伍。汲汲然矣。每至宗廟心齋。嚴恭祀事。明發不寐。翌日餘悲。故聲氣感人者深。儀形化人者遠。躬踐五德。退讓于恭儉。溫良行張四維。加信于仁義。禮智而老驥伏櫪。以鮑聰不忘。白鳩巢檐。以家瑞終黔。則非殊倫絕輩。擬議乎萬一矣。太常博士裴愬議曰。公醇一誕靈。文明含粹。蹈元和以爲天性。藉間氣以爲人師。前後歷官。或拜而不至。或常而不留。瘠形瞽目。誓遵孝養。可不謂孝乎。遂諡曰孝公。凡所著文集二十九卷。并嗣子祐甫論次先志一卷。爲三十卷。吏部員外郎趙郡李華爲集序云。公之侍親也。孝。達乎神祇。居憂也。哀。貫乎天地。喪期有數。而茹荼終身。親交鄰里。飢者待公而炊。寒者待公而裘。烝嘗之奠。待公而具。故祿廩雖厚。而未嘗足也。傳祖禰之美。合于禮經。

見公文章。知公行事。則人倫之序。理亂之源。備矣。祐甫純行而文。直清而和。希公門者。謂公存焉。亡賢數載如此。初太夫人患目。公傾家求醫。或曰療之必愈。恐壽不得延。太夫人及公悲恨而罷。自是端力奉養。不脫冠帶者。僅三十年。每至良辰美景。勝引佳遊。必扶侍左右。笑言陳說。親朋往來。莫知太夫人之有苦也。公年官雖高。至于食果蔬菜。與子姪躬自植藝。溉灌以申馨潔。曩終喪。雖見孩稚者。必設位束帶。盡哀以禮之。公與江夏李邕友善。爲校書郎時。引邕館于祕閣之下。讀書者累年。邕由是才名益盛。邕與尚書席建侯嘗過公。怪乘馬羸羸。曰何不于廳前自觀。餼飼忽然致殞。何以更之。公唯而不易。他日二公又以爲言。公良久則曰。每欲發言。恐涉有疑于廝養者。所以沈吟自媿。二公退而謂人曰。每想崔公此言。使人慙慙如醉。延和太極之間。公既留司東都。遂鬻所乘馬。就故人監察御史張滋子深河南府崇政坊。買宅以製居。建宗廟于西南。惟先太夫人安平郡夫人堂在宅之中。儉而不陋。淨而不華。六十餘年。椽棟如故。堂東嫂盧夫人所居。堂之東北鄭氏李氏姊歸寧所居。堂之北五步之外。建瓦堂三間以居之。雜用舊椽。不崇壇。無楮堊。累歷清要。所得祿秩。但奉蒸嘗。資嫂妹。給孤幼。營甥姪婚姻而已。朝衣服馬。一皆取其下者。惟祭器祭服稱禮焉。其室竟不修。曩夫人太原郡太夫人王氏捐牀帳之後。公徙居他室。或在賓館。而無常所。爲常侍時。著陋室銘以自廣。天寶末。子孫灑掃。貯書籍劍履而已。逆賊再陷洛陽。屋遂崩圮。惟簷下廢井存焉。長子成甫。惆儻有才名。進士校書郎。早卒。祐甫能荷先業。以進士高第。累登臺省。至吏部郎中。充永平軍節度使。尚書李公勉行軍司馬。兼侍御史中丞。永懷先德。明發不寐。恐茂烈湮淪。罔垂後裔。

乃刻陋室銘于井北遺址之前。以抒所志。某夙仰名教。實欽孝公之盛德。晚聯臺閣。竊慕中丞之象賢。又能好我不遺。見託論譎。採風猷而莫窮萬一。涉泉海而豈究津涯。操筆強名。退增戰慄。時卽大歷十一年青龍景辰孟夏之月也。

撫州寶應寺翻經臺記

撫州城東南四里有翻經臺。宋康樂侯謝公元嘉初年于此翻譯涅槃經。因以爲號。公諱靈運。陳郡陽夏人也。祖玄。晉車騎將軍。父瑛。祕書郎。公幼穎悟。好學博覽羣書。文章之美。江左莫逮。以襲祖爵。世人宗之。盛稱謝康樂。初爲劉毅衛軍從事中郎。太子左率。出爲永嘉太守。郡有名山水。公素愛好。肆意遨遊。稱疾去職。于始寧縣修營故墅。傍山帶江。盡幽居之美。因著山居賦。并自註之。與隱士王弘之等。遊放爲娛。有終焉之志。每一詩至。都邑莫不競寫。宿昔之間。士庶皆遍。徵爲祕書監。屢不赴。太祖使范泰與書敦獎之。乃出就職。尋遷侍中。日夕引見。賞遇甚厚。多疾不朝。賜假東歸。免官。與從弟惠連。東海何長瑜。潁川荀雍。泰山羊璿之。以文章賞會。時人謂之四友。尋山登賞。常著木屐。上則去其前齒。下則去其後齒。會稽太守孟顓。事佛精懇。公謂之曰。得道應須慧業文人。生天應在靈運前。成佛必在靈運後。顓深恨此言。後遂表公有異志。公馳出自陳。太祖知見誣。除臨川內史。公以曇無讖所翻大涅槃經。語小小樸質。不甚流靡。品數疎簡。初學者難以措懷。乃與沙門范惠嚴。崔慧觀。依舊泥洹經。共爲潤色。勒成三十六卷。義理昭暢。質文相宣。歷代寶之。盛行于天下。其餘感神徵應。具如高僧傳所說。邈乎階局不改。棟宇具無。真卿叨刺是

邦茲用懷息。有。高。行。頭。陀。僧。智。清。緒。發。洪。誓。精。心。住。持。請。以。佛。跡。寺。僧。什。喻。仙。臺。觀。道。士。譚。仙。巖。同。力。增。修。指。期。恢。復。自。是。法。堂。之。遺。構。克。崇。先。達。之。高。蹤。□□。百。里。而。遙。四。山。不。逼。三。休。而。上。十。地。方。超。經。行。之。業。既。崇。斗。藪。之。功。斯。懋。大。歷。己。酉。歲。四。月。丙。午。都。人。士。庶。相。與。大。會。設。嚴。供。而。落。焉。以。真。卿。業。於。斯。文。見。咨。紀。述。後。之。君。子。其。忘。增。修。乎。銘。曰。

摩訶般若。解脫法身。是則涅槃。衆經中尊。曇無讖。允。嚴。觀。是。因。實。賴。同。德。弘。茲。法。輪。謝。公。發。揮。精。義。入。神。理。絕。史。野。文。兼。都。彬。一。垂。刊。削。百。代。咸。遵。遺。跡。忽。睹。高。臺。嶙。峴。載。悲。徂。謝。曷。踐。香。塵。真。卿。愀。然。憫。故。執。新。檀。那。衣。鉢。悉。力。經。綸。不。日。復。之。周。邦。仰。仁。緬。懷。孰。慕。予。亦。何。人。徒。願。神。交。愧。非。德。鄰。刻。銘。金。石。永。永。不。泯。

張長史十二意筆法記

予罷秩醴泉。特詣京洛。訪金吾長史張公。請師筆法。長史于時在裴儼宅。憩止。有羣衆師張公求筆法。或有得者。皆曰神妙。僕頃在長安二年。師事張公。皆大笑而對之。時即便草書。或三紙五紙。皆乘興而散。不復有得其言者。僕自再于洛下。相見。眷然不替。僕因問裴儼。足下師張長史。有何所得。曰。但書得絹屏素數十軸。亦嘗論諸筆法。惟言倍加功學。臨寫書法。當自悟耳。僕自停裴家月餘。日因與裴儼從長史言語。散卻。迴京師前。請曰。既承九丈獎諭。日月滋深。夙夜工勤。溺于翰墨。儼得聞筆法要訣。終爲師學。以冀至于能妙。豈任感戴之誠也。長史良久不言。乃左右眄視。拂然而起。僕乃從行。歸東竹林院小堂。張公乃當堂踞牀而坐。命僕居于小榻。而曰。筆法玄微。難妄傳授。非志士高人。詎可與言要妙也。書之求能。且攻真。

草今以授之。可須思妙。乃曰：天平謂橫。子知之乎？僕思以對之。曰：常聞長史示令每爲一平畫。皆須令縱橫有象。此豈非其謂乎？長史乃笑曰：然而又問曰：直謂縱。子知之乎？曰：豈不謂直者從。不令邪曲之謂乎？曰：均謂間。子知之乎？曰：嘗蒙示以間不容光之謂乎？曰：密謂際。子知之乎？曰：豈不爲築鋒下筆。皆令宛成。不令其疎之謂乎？曰：鋒爲末。子知之乎？豈不謂以末成畫。使其鋒健之謂乎？曰：力謂骨體。子知之乎？曰：豈不謂趨筆則點畫皆有筋骨。字體自然雄媚之謂乎？曰：轉輕謂屈折。子知之乎？曰：豈不謂鉤筆轉角折鋒輕過。亦謂轉角爲闔闕過之謂乎？曰：決謂牽製。子知之乎？曰：豈不謂爲牽爲製。決意挫鋒。使不怯滯。令險峻而成。謂之決乎？曰：補謂之不足。子知之乎？曰：豈不謂結點畫。或有失趣者。則以別點畫旁救之謂乎？曰：損謂有餘。子知之乎？曰：豈不謂趣長筆短。常使意勢有餘。點畫若不足之謂乎？曰：巧謂布置。子知之乎？曰：豈不謂欲書先預想字形布置。令其平穩。或意外字體。令有異勢。是謂之巧乎？曰：稱謂大小。子知之乎？曰：豈不謂大字蹙之令小。小字展之爲大。兼令茂密。所以爲稱乎？長史曰：子言頗皆近之矣。夫書道之妙。煥乎其有旨焉。字外之奇。言所不能盡。世之書者。宗二王元常逸跡。曾不睥睨筆法之妙。遂爾雷同。獻之謂之古肥。旭謂之今瘦。古今既殊。肥瘦頗反。如自省覽。有異衆說。芝鍾巧趣。精細殆同。始自機神。肥瘦古今。豈易致意。眞跡雖少。可得而推。逸少至于學鍾。勢巧形容。及其獨運。意疎字緩。譬猶楚音習夏。不能無楚。過言不悞。未爲篤論。又子敬之不逮逸少。猶逸少之不逮元常。學子敬者畫虎也。學元常者畫龍也。余雖不習。久得其道。不問之言。必慕之歎。儻有巧思。思盈半矣。子其勉之。工精勤悉。自當妙矣。眞卿前請曰：幸

蒙長交傳授筆法。敢問工書之妙。如何得齊于古人。張公曰。妙在執筆。令其圓轉。勿使拘攣。其次諸法。須口傳手授之訣。勿使無度。所謂筆法也。其次在于布置。不慢不越。巧使合宜。其次紙筆精佳。其次諸變適懷。縱捨規矩。五者備矣。然後齊于古人矣。敢問執筆之理。頗得。長史曰。予傳授筆法之老舅彥遠曰。吾聞昔日說書。若學有工而跡不至。後聞于褚河南曰。用筆當須如印泥畫沙。思所以不悟。後于江島。遇見沙平地淨。令人意悅欲書。乃偶以利鋒畫其勁險之狀。明利媚好。乃悟用筆如錐畫沙。使其藏鋒。畫乃沈著。當其用鋒。常欲使其透過紙背。此功成之極矣。真草用筆。悉如畫沙。則其道至矣。是乃其迹可久。自然齊古人矣。但思此理。以專想工用。故其點畫不得妄動。子其書紳。余遂銘謝再拜。遂巡而退。自此得攻書之術。于茲五年。真草自知可成矣。平直均密。鋒力轉決。補損巧稱。爲十二意。

文忠集卷十五

詩

題杼山三癸亭亭陸鴻漸所創得暮字

杼山多幽絕。勝事盈跬步。前者雖登攀。淹留恨晨暮。及茲紆勝引。曾是美無度。歛構三癸亭。寔惟陸生故。高賢能勗物。疏鑿皆有趣。不越方丈間。居然雲霄遇。巍峩倚脩岫。曠望臨古渡。左右苔石攢。低昂桂枝蠹。山僧狎猿狖。巢鳥來枳椇。俯視何楛臺。傍瞻戴顓路。遲迴未能下。夕照明村樹。

謝陸處士杼山折青桂花見寄之什

羣子遊杼山。山塞桂花白。綠萸含素萼。採折自逋客。忽枉岩中詩。芳香潤金石。全高南越蠹。豈謝東堂策。會愜名山期。從君恣幽覲。

登平望橋下作

登橋試長望。望極與天平。際海兼葭色。終朝鳧鴈聲。近山猶一作全髣髴。遠水忽微明。更覽諸公作。知高題柱名。

登峴山觀李左相石樽聯句

李公登飲處。因石爲窪樽。真人事歲年改。峴山今古存。劉全 藁蕪掩前跡。苔蘚餘舊痕。裴 叔子尙遺德。山

公此迴軒張。維舟陪高興。感昔情彌敦。道士藹藹賢哲事。依依離別言。蒙嶮嶮橫道周。迢遞連山根。范

烈燿林野。衆芳揖蘭蓀。王德暉映岩足。勝賞延高原。魏遠水明匹練。因晴見吳門。王修陪遊追盛美。揆德

欣討論。顏器有成形。用功資造化。元左輔流霞本泔淡。別鶴遽翩翻。劉茂舊規傾逸賞。新興麗初噉。顏醉後

接離倒。歸時騶騎喧。楊德遲迴向遺迹。離別益傷魂。章覽事古興屬。送人歸思繁。皎然懷賢久徂謝。贈遠空

攀援。崔八座欽懿躅。高名播乾坤。史仲宣松深引閒步。葛弱供險捫。陸花氣酒中馥。雲華衣上屯。櫟森沈列

胡樹。牢落望郊園。陸士修白日半巖岫。清風滿丘樊。裴幼清旌麾間翠幄。簫鼓來朱轡。柳開路躡雲影。清心澄

水源。釋萍連浦中嶼。竹遶山下村。顏景落全溪暗。烟凝半嶺昏。顏去日往如復。換年涼代溫。顏登臨繼風

騷。義激舊府恩。李

水堂送諸文士戲贈潘丞聯句

居人未可散。上客須留著。莫唱阿鞞回。應有夜半樂。真卿奉詩教刻燭賦。酒任連盤酌。從他白眼看。終戀

青山郭。述奉林栖非姓許。寺住那名約。會異永和年。才同建安作。羽何煩問更漏。但遣催絃索。共說

長句能。皆言早歸惡。器別那知殊出處。還得同笑謔。雅韻雖慙慙。禪心肯拋卻。皎然上一宿同高會。幾人

歸下若。簾開北陸風。燭焯南枝鶴。奉潘文場苦叨竊。釣渚甘漂泊。弱質幸見容。非才誠重諾。案此下

送耿漳拾遺聯句

堯舜逢明主。嚴徐得侍臣。分行接三事。高興柏梁新。真楚國千山道。秦城萬里人。鏡中看齒髮。河上有煙

塵。漳望闕飛青翰。朝天憶紫宸。喜來歡宴洽。愁去詠歌頻。真願盼情非一。睽攜處亦頻。吳興賢太守。臨水最殷勤。漳

三言擬五雜組

五雜組。繡與錦。往復還。興又寢。不得已。病伏枕。

重擬五雜組

五雜組。甘鹹醋。往復還。烏與兔。不得已。詔光度。

月夜啜茶聯句

泛花邀坐客。代飲引情言。陸士醒酒宜華席。留僧想獨園。張不須攀月桂。何假樹庭萱。李御史秋風勁。尚書北斗尊。崔流華淨肌骨。疏淪滌心原。真不似春醪醉。何辭綠菽繁。晝素瓷傳靜夜。芳氣滿閒軒。士

夜宴詠燈聯句

桂酒牽詩興。蘭缸照客情。士詎慙珠乘朗。不讓月輪明。薦破暗光初白。浮雲色轉青。真帶花疑在樹。比瘴欲分庭。晝顧已慙微照。開簾識近汀。真

三言喜皇甫曾侍御見過南樓翫月聯句

喜嘉客。闢前軒。天月淨。水雲昏。真鴈聲苦。蟾影寒。聞裏過。滴檀欒。陸歡晏處。江湖間。皇甫卷翠幕。吟嘉句。恨清光。留不住。李高駕動。清角催。惜歸華。重徘徊。晝露欲晞。客將醉。猶宛轉。照深意。陸士

重聯句

頃持憲節推高步。獨占詩流橫素波。不是中情深惠好。誰能千里遠經過。真卿詩書宛似陪康樂。少長還同
宴永和。夜酌此時看碾玉。晨趨幾日重鳴珂。曾萬井更深空寂寞。千方霧起隱嵯峨。熒熒遠火分漁浦。歷
歷寒枝露鳥窠。韓漢朝舊學君公隱。魯國今從弟子科。只自傾心慙响喙。何曾將口恨蹉跎。羽獨賞謝吟
山照曜。共知殷歎樹婆娑。華轂空嫌雲路隔。網衣長向雪峯阿。藍案此詩原本缺下牛十二句今從村山集增入。

送李侍御聯句

吾友駐行輪。遲遲惜上春。真卿東西出餞路。惆悵獨歸人。藍歡會期他日。驅馳恨此身。真卿須知貢公望。從此
願相因。

翫初月重送聯句

春溪與岸平。初月出溪明。薦上十璧彩寒仍潔。金波夜轉清。韓孤光遠近滿。練色往來輕。真卿望望隨蘭棹。
依依出柳城。藍

重送橫飛聯句

春田草未齊。春水滿長溪。粵上十出餞風初暖。攀光月漸西。真卿歸期江上遠。別思月中迷。藍

大言聯句

高歌闐風步瀛州。藍燂鵬淪鯤餐未休。真卿四方上下無外頭。韓一啜頓涸滄溟流。藍

小言聯句

長路遙遙吞吐絲。真卿 燠螟蚊睫察難知。畫

樂語聯句

苦河既濟真僧喜。真卿 新知滿座笑相視。真卿 戍客歸來見妻子。畫 學生放假偷向市。真卿

曉語聯句

拈齏舐指不知休。真卿 欲炙侍立涎交流。真卿 過屠大嚼肯知羞。畫 食店門外強淹留。真卿

滑語聯句

雨裏下山踏榆皮。真卿 莓苔石橋步難移。畫 蕪荑醬醋喫蕪葵。白 纒靴蠟綫油漆錐。真卿 急逢龍背須且騎。李益

醉語聯句

逢糟遇麪便酩酊。全 覆車墜馬皆不醒。真卿 倒著接羅髮垂領。畫 狂心亂語無人並。羽

夜集聯句

寒花護月色。墜葉占風音。畫 茲夕無塵慮。高雲共片心。真卿

刻清遠道士詩因而繼作

不到東西寺。于今五十春。竭來從舊賞。林壑宛相親。吳子多藏日。秦皇厭聖辰。劍池穿萬仞。盤石坐千人。金氣騰爲虎。琴臺化若神。登壇仰生一。捨宅歎珣珉。中嶺分雙樹。迴巒絕四鄰。窺臨江海接。崇飾四時新。

客有神仙者。于茲雅麗陣。名高遠。清遠道士同沈恭子遊虎丘寺有作附

我本長殷周。遭罹歷秦漢。四瀆與五嶽。名山盡幽竄。及此寰區中。始有近峯翫。近峯何鬱鬱。平湖渺瀾漫。吟挽川之陰。步上山之岸。山川共澄澈。光彩交凌亂。白雲蒼欲歸。青松忽消半。客去川島靜。人來山鳥散。谷深中見日。崖幽曉非旦。聞子盛遊遨。風流足詞翰。喜茲好松石。一言常累嘆。勿謂余鬼神。忻君共幽贊。

使過瑤臺寺有懷圓寂上人并序

真卿昔以天寶元年尉醴泉。亟過瑤臺寺。圓寂上人院。秩滿遷監察御史。巡覆諸陵。而上人已離。此寺大歷十三年春二月。以刑部尙書謁拜昭陵。慨然有懷。其詞曰。

上人居此寺。不出三十年。靈法盡無染。舊集作萬法元無著一心惟趣禪。忽紆塵外軫。遠訪世間緣。舊本作區中緣及爾不復見。支提猶岌然。舊本作歸以蹟校

贈僧皎然詩

秋意西山多。別岑縈左次。繕亭歷三癸。趾趾鄰什寺。元化隱靈蹤。始君啓高致。誅榛養翹楚。鞭草理方穗。俯砌披水容。逼天掃峯翠。境新耳目換。物遠風塵異。倚石忘世情。撥雲得真意。嘉林幸勿翦。禪侶欣可庇。衛法大臣過。佐游羣英萃。龍池護清澈。虎節到深邃。徒想嶮頂期。于今沒遺記。

文忠集卷十六

補遺

唐故通議大夫行薛王友柱國贈祕書少監國子祭酒太子少保顏君廟碑銘

昔孔悝有彝鼎之銘。陸機有祠堂之頌。皆所以發揮祖德。敷演家聲。故君子之觀其銘也。既美其所稱。又美其所爲。無而稱之。是誣也。有而不述。其仁乎。論而撰之。敢不祇懼。君諱惟貞。字叔堅。其先出于顓頊之孫祝融。祝融孫安爲曹姓。其裔封邾武公。名夷甫。字顏。子友別封郕。爲小邾子。遂以顏爲氏。多仕魯。爲卿大夫。孔門達者七十二人。顏氏有八。戰國有率躅。秦有芝貞。漢有異肆安樂。其後喪亂。譜牒淪亡。魏有裴盛。盛字叔臺。青徐二州刺史。關內侯。始自魯。居子琅琊臨沂孝悌里。生廣陵太守給事中葛繹。貞子諱欽。字公若。精韓詩禮易尚書。學者宗之。生汝陰太守護軍襲葛繹子諱默。字靜伯。生晉侍中右光祿大夫西平靖侯諱含。字弘都。隨元帝過江。已下七葉葬在上元幕府山西。生侍中光祿勳西平定侯諱鼂。字君道。事具孝行傳。生州西曹騎都尉西平侯諱緜。字文和。生宣城太守御史中丞諱靖之。字茂宗。生巴陵太守度支校尉諱騰之。字弘道。善草隸。書有風格。梁武帝草書評云。顏騰之。賀道力。並便尺牘。少行于代。生輔國江夏至參軍諱炳之。字叔豹。以能書稱。生齊侍書御史兼中丞諱見遠。字見遠。和帝被弑。一慟而絕。梁武深恨之。事見梁周北齊書。生梁鎮西記室參軍諱協。字子和。感家門事義。不求聞達。元帝著懷舊詩。以

傷之撰晉仙傳五篇。日月災異圖兩卷。文集廿卷。見梁書。生北齊。給事黃門侍郎。待詔文林館。平原太守。隋東宮學士。諱之推。字介。著家訓廿篇。冤魂志三卷。證俗音字五卷。文集卅卷。事具本傳。黃門兄之儀。周御正御史中大夫。麟趾學士。隋文輔政。不署矯詔。索璽又拒之。出爲集州刺史。新野公。後朝朔望。引至御榻。曰。見危授命。臨大節而不可奪。古人所重。何以加卿。事具周書。弟之善。隋葉令。子孫見于後。黃門生皇秦王記室諱思魯。愍楚遊秦。小記室字孔歸。君之曾祖也。隋司經校書東宮學士。率子弟奉迎義旗于長春宮。招瓜州拜儀同。博學善屬文。自爲父集序。國史稱溫大雅。在隋與思魯同事東宮彥博。與愍楚直內史省。彥博又與遊秦。同典校祕閣。二家兄弟各爲一時人物之選。少時學業。顏氏爲優。其後職位。溫氏爲盛。溫氏譜亦載焉。生勤禮。字敬君之祖也。幼而朗悟。識量宏遠。工于篆籀。尤精詁訓。解褐校書郎。與兩兄弟師古相時。同時爲弘文崇賢學士。弟育德。又于司經校定經史。當代榮之。太宗嘗令師古讚崇賢學士。以兄弟。特命蕭鈞讚之曰。依仁服義。懷文守一。履道自居。下帷終日。德彰素卑。行成蘭室。鶴鑰馳譽。龍樓委質。著作郎修國史。夔府長史贈虢州刺史。生昭甫。敬仲。殆庶無恤。少連。務滋辟強。昭甫字周卿。君之父也。幼而穎悟。尤明詁訓。工篆籀草隸。書與內弟殷仲容齊名。而勁利過之。特爲伯父師古所賞重。每有註述。必令參定。嘗得古鼎廿餘字。舉朝莫識。盡令讀之。高宗侍讀曹王屬贈華州刺史。真卿表謝。肅宗批答。卿之乃祖。當爲碩儒。旣高倚相之能。遂有臧孫之後。不墜其業。在卿之門。生我伯父諱元孫。暴君伯父。聰穎絕倫。尤工文翰。舉進士。攷功郎劉奇特標榜之。由是名動海內。累遷太子舍人。玄宗監國。專掌令。嘗

和遊苑詩。批云。孔門稱齊。宋室聞賢。翰墨玄捷。莫之與先。歷滌沂濠。三州刺史。贈祕書監。君仁孝友悌。少孤。育舅殷仲容氏。蒙教筆法。家貧無紙筆。與兄以黃土掃壁。木石畫而習之。故特以草隸擅名。天授元年。糊名攷校。判入高等。以親累授衢州參軍。與盈川令楊炯。信安尉桓彥範。相得甚歡。又選授洛州溫縣永昌二尉。每選皆判入高科。侍郎蘇味道以所試示于衆。曰。選人中乃有如此書判。嗟歎久之。遂代兄爲長安尉。太子文學。以清白。五爲察訪使。魏奉古等所薦。王邸初開。盛選僚屬。拜薛王友柱國。伯姊御史大夫張知泰妻。魯郡夫人。亡將葬。數家占君不宜臨壙。君哭而拒之。曰。豈有忘手足之痛。牽拘忌而忍自絕乎。弗從。其年秋七月。才生明。遭疾而歿。教義者隱而傷焉。與會稽賀知章。陳郡殷踐猷。吳郡陸象先。上谷寇泚。河南源光裕。博陵崔瑛。友善。事具陸據所撰神道碑。累贈祕書少監。國子祭酒。太子少保。真卿表謝。肅宗批答云。卿之先人。德行優著。學精百氏。藝絕六書。頻擢甲科。屢升循政。曳裾王府。名右鄒枚。載筆春宮。道高徐沈。旣而壽乖華髮。器紆青雲。業載史臣。慶傳令子。追存盛美。褒贈崇班。且旌善于義方。俾揚名于有後。豪州生春卿。杲卿。曜卿。旭卿。茂曾。春卿。工詞翰。倜儻有吏材。蘇頲舉茂才。偃師丞。杲卿文理清峻。所居有聲。太常居攝常山太守。祿山反。擒其心手。開土門。拜衛尉卿。兼中丞。城陷。杲卿叱罵之。遂被鉤舌支解而終。贈太子太保。諡曰忠節。真卿表謝。肅宗批答云。自羯胡猖狂。入我河縣。所在官吏。多受迫脅。卿兄以人臣大節。獨制橫流。或俘其謀主。或斬其元惡。當以救兵懸絕。身陷賊庭。旁若無人。歷數其罪。手足寄于鋒刃。忠義形于顏色。古所未有。朕甚嘉之。曜卿工詩善草隸。十五以文學直崇文館。淄州司馬。旭卿善

草書。胤山令茂曾好屬文。詰訓仁厚絕衆。韃爲司馬君生闕疑。允南喬卿真長幼輿真卿。允臧闕疑仁孝有吏能。精詩傳善剖判。杭州參軍。允南仁孝有清識。工詩人多誦其佳句。善草隸。與春卿杲卿曜卿同日于銓庭爲侍郎席建侯所賞。達奚珣薦爲左補闕。真卿時爲殿中正。至三拱法座。踏舞而衣袂相接者三。故允南詩云。誰言百人會。兄弟也霑陪。歷殿中膳部司封郎中司業。金鄉男。喬卿仁和有吏幹。富平尉。真長清直。早世。幼輿方雅有醞藉。通班漢左清道兵曹真卿早孤。蒙伯兄允南親自教誨。舉進士。歷校書制舉。醴泉尉。陟清白長安尉。三院御史。四爲大夫。六爲尙書。再爲採訪節度。充禮儀使。光祿大夫。魯郡公。允臧敦質。孝悌有吏能。制舉。延昌令。監察。充朔方衣資使。殿中三爲侍御史。中允。江陵少尹。荆南行軍。豪州及君孫泉明。佐父開土門。彭州司馬。威明。邛州司馬。季明。子幹。沛。頗。誕。及外孫博野尉沈盈。盧遜。並爲逆賊所害。各蒙贈五品京官。濬好屬文。翹華正。頤慈明。都水使者。頗好五言。校書。頤仁孝方正。明經。大理司直。嶺南營田判官。執喪九日不食。頤河陽尉。頤鳳翔參軍。頗工小楷。洗馬。頤恭仁。奉禮郎。並早喪。逝紘方義主簿。泉明。觀。並沒蠻。襲明。微明。德明。未仕。通明。獲嘉尉。將明。昌明。尉。克明。崇文明。經。衛密。標榜之。顯有德行。文詞。華原主簿。準。溧水尉。觀。頗。工文。襄陽尉。觀。有文行。弘文進士。顯。仁友清白。常熟令。封金鄉男。穎。清介勤學。侍郎。蔣洌。賞其判。京兆兵曹。襲金鄉男。岫。仁純。常熟主簿。任城男。頤。浚儀尉。頤。清源尉。頂。幹辦。揚府法曹。願。長厚清白。朝邑尉。願。左率倉曹。碩。祕書正字。頤。有吏幹。歙州錄事參軍。曲阜男。頤。好爲詩。富陽尉。頤。好爲文。常州參軍。並粗有所立。君之諸祖諸父。羣從。揚庭。頤。並侍讀。強學。益期。並學士。中和至。

誠敬仲。大智溫之。激之澹之。摺挺援撰。溫泳陵。並明經。康成強學。希莊日損。隱朝鄰幾。知微舒說。順勝式宣。韶並進士。制舉有意。中和趨庭。希莊至刺史。利仁明天文。欣期元淑。景靈並校書。光庭注後漢書。嘉賓千里昇庠。斥朝怡滔。渾允濟。摺覲不器防。有文詞博古。少連恭敏。惇學行。敬仲溫之。以孝聞。潤有風義。冕鱗邈迨。以清白稱。其餘咸著官族。不獲悉數。洪惟累祖之耿光丕業。有若子泉弘都之德行。巴陵記室之書翰。特進黃門之文章。祕監華州之學識。肇自魯國。格于聖代。紛綸盛美。遂舉集于君。君能述遵前人。不敢失墜其事。以忝聿修。宜其克饗尊榮。爲清廟不祧之主。真卿幸承訓遺。叨受國恩。旣荷無疆之休。敢揚不朽之烈。銘曰。

系我宗。郝顏公子。封郕魯附庸。亞孔聖。浴沂風。刺青徐。給事中。護營柳。渡江楓。侍兄疾。感地童。鄰火斷。珥貂重。施七葉。博孝恭。武騎都尉。司從便。尺牘繼魚蟲。慟君難憤而終。咨施室。游湘東。嗟禦正。凜移忠。衆黃門。擅文雄。三韶長。事東宮。四穆叔。史牢籠。襲華州。詰訓通。小祕監。盛名鴻。惟少保。文翰工。莅叢赤。五襲崇。登望苑。友桂叢。三超贈。保儲躬。流光盛。廟貌融。永不祧。垂無窮。

碑側記

建中元年歲次庚申。秋七月癸亥朔。鑄畢。八月己未。真卿蒙恩遷太子少師。冬十月壬子。男頽封沂水縣男。頽親泰縣男。姪男頂【案】原本。縣男頽費縣男。頽鄒縣男。微軀官階勳爵。並至二品。子姪八人受封。無功而叨竊至此。子孫敬之哉。

碑額陰記

高祖記室君國初居此宅。號州君舍人君侍焉。堂今置廟地。高祖妣殷夫人居十字街西北壁第一宅。祕書監君禮部侍郎君侍焉。號州君居後堂。華州君于堂中生焉。今充神廚。少保君堂充齋堂。廳屋充亞獻終獻齋室。

政和公主碑

肅宗女代宗母妹。潼關失守。輟夫柳潭乘以濟孀妹。首云平陽與孃子之軍于司竹。襄城行匹庶之禮于宋公。【案】原本常糺匡復之師于武后。皆前代所未有也。

贈豪州刺史顏元孫墓誌

省試九河銘。高松賦。劉奇批曰。銘賦音律。既麗且新。時務五條。辭高理贍。惜其貼經通六。所以屈從常第。葬東京鶴店。今作曜字。

唐故太尉文貞宋公神道碑側記

初公任監察御史。持服于沙河縣屬。突厥寇。趙定州。河朔兇懼。邢州刺史黃文軌投艱于公。公以父母之邦。金革無避。及賊至城下。公爲曉陳禍福。其徒有素聞公威名者。乃相率而去之。開元末。安西都護趙含章。冒于貨賄。多以金帛賂遺朝廷之士。九品以上悉皆有名。其後節度范陽。事方發覺。有司具以上聞。玄宗切責名品。將加黜削。公一無所受。乃進諫焉。玄宗納之。遂御花萼樓。一切釋放。舉朝皆謝。公衣冠儼然。

獨立不拜。翌日入奏。玄宗謂公曰。古人以清白貽子孫。乃卿一人而已。公曰。含章之賄。偶不至臣門。非不受也。玄宗深嘉歎之。前碑闕焉。故略述于此。公第三子渾之。爲中丞也。方欲陳乞御製碑頌。未果而中受譴謫。旋羯胡作亂。事竟不成。真卿時忝監察殿中。爲中丞屬吏。故公孫儼泣請真卿論譟之。昭義軍節度觀察使尙書左僕射兼御史大夫平陽郡王薛公曰。嵩以文武忠義之資。爲國保障。上慕公之德業。歎尙無窮。次嘉儼之懇誠。崇豎莫致。迺命屯田郎中權邢州刺史封演。購他山之石。曳以百牛。僑刻字之。工成乎半歲。磨礱旣畢。建立斯崇。遠近嗟稱。古今榮觀。雖大賢爲德樹。善庸限于存亡。而小子何知。附驥託跡于階序。真卿刺湖州之日。因成文請儼刻其側而志之。未及鐫雕。而第六子衡謫居沙州。參佐戎幕。河隴失守。介于吐蕃。以功累拜工部郎中兼御史河西節度行軍司馬。與節度周鼎。保守燉煌。僅十餘歲。遂有中丞常侍之拜。恩命未達。而吐蕃圍城。兵盡矢窮。爲賊所陷。吐蕃素聞太尉名德。曰。唐天子我之舅也。衡之父舅賢相也。落魄如此。豈可留乎。遂贈以駝馬。送還于朝。大歷十二年十一月。以二百騎盡室護歸。士君子偉之。乃古來所無也。上欲特加超獎。且命待之于側門。十三年春二月。吏部尙書顏真卿記。

祭伯父豪州刺史文

維乾元元年。歲次戊戌。十月庚子。廿一日庚申。第十三姪男。銀青光祿大夫。使持節。饒州諸軍事。饒州刺史。上輕車都尉。丹陽縣開國侯。真卿。敢昭告于亡伯故朝議大夫。豪州刺史。府君之靈。日者羯胡祿山。俶擾河洛。生靈塗炭。兵甲靡夷。二兄杲卿。任常山郡太守。忠義憤發。首開土門。擒斬逆豎。挫其兇慝。先蓋授

衛尉卿兼御史中丞。城孤援絕。身陷賊庭。聖朝哀榮。褒贈太子太保。甥姪八人。李明、盧逖等。被賊害者。並贈五品京官。嫂及兒女。皆被拘囚。睿略昭宣。宇宙清廓。脫于賊手。並得歸京。真卿比在平原。遭罹凶逆。與杲卿同心協德。亦著微誠。二聖憫焉。授戶部侍郎。河北採訪招討使。又遷工部憲部二尚書。再兼御史大夫。出爲同蒲饒三州刺史。聖恩錫類大門。贈華州刺史。兄弟兒姪。盡蒙國恩。允南授膳部郎中。允臧授侍御史。威明試太僕丞。頰授太子洗馬。頂授協律郎。頰授祕書省校書郎。賜緋魚袋。泉明、顓、頰等。並蒙遷改。一門之內。生死哀榮。真卿時赴饒州。至東京。得申拜掃。又方遠辭違。伏增感咽。謹以清酌庶羞之奠。以伯母河南縣君元氏配。尙饗。

與李太保帖

辭後。明日至宅。奉送承已當時出。【案】原本不獲重捧袂。至今爲恨。仲春漸暄。不審太保尊體何如。真卿

粗爾。不審初到如何。佇承異績。以慰瞻仰。因中郎張淑往。謹附狀不宣。謹狀。二月十四日。刑部尚書顏真

卿狀上。李太保大夫公閣下。張淑昨艱難時。首未得力。願在麾下。有容足處。庇之幸甚。謹空。

奏事官至。蒙問增慰。馳誠冬閏初寒。伏惟太保尊體安適。真卿悲疾何言。蕃寇推退。爲憲之功。忝沐深情。俱增喜躍。前後不逢之信。遂闕修狀。何時入奏。未聞悲係無喻。謹還狀不次。謹狀。閏月十有四日。刑部尚

書顏真卿狀上。李太保大夫公閣下。謹空。

真卿粗自奉別。渴仰何勝。昨緣馬奔。遂失馳謁。想蒙情恕也。真卿十五日離家。大小俱安。洩洩病瘡少愈。

勿愛爲佳。正遠披承。益期自愛。謹勒參候不次。刑部尙書顏真卿頓首。李太保大夫公閣下。
千手贊已領訖。然尙少第二隔。恐在書府。希更根尋足。疎拙抵罪。聖慈含弘。猶佐列藩。不遠伊邇。省躬荷
德。恩貸實深。兢慄之誠。在物何喻。仲春暄甚。不審太保尊體何如。所苦當轉勝也。真卿緣驛上無馬。私乘
泡轉幾死。前進不得。今日始至藍田。即便取路。不獲執別。此情如何。珍重珍重。謹附狀不次。謹狀。二月十
一日。峽州別駕顏真卿狀上李太保大夫公閣下。

與澄師帖

真卿承聞大華嚴會已遂圖成。取來日要詣彼隨喜。如何如何。幸周副。老草不悉。真卿頓首。和南。澄師大
德侍老。十日。謹空。

與御史帖

真卿謹別上書于御史閣下。竊聞尊候平和。真卿瞻仰瞻仰。前所會廟上諸公未悟。惟御史論高百僚。振
古未有雜事可置。況朝廷自有次序。不足念乎。真卿。

守政帖

政可守不可不守。吾去歲中言事得罪。又不能逆道苟時。爲千古罪人也。雖貶居遠方。終身不齒。緒汝等
當須會吾之志。不可不守也。

廣平帖

得示問廣平碑本了來數日故當封呈真卿頓首

修書帖

賊軍夫平使僕不憤見故先修書但召諸子弟與語不具真卿

中夏帖

真卿頓首中夏以還暑氣日甚病懶益不喜所爲前欲書石當須稍涼作之也幸不以差緩過之京人來何消息嘉否

文殊帖

近作一文殊師利菩薩碑但欲發揚主上聖意蓋不近文律耳今奉呈充蓋醬之用可乎真卿白

訊後帖

真卿具前楮訊後所苦何如立斯極位雄廷江上佳山秀水在公庭戶想日有樂事甚得佳士相延公高才逸韻自有晉宋間人風坐此肆局不易處上方招致仁者如公之儔豈久在江左乎行聞迅召以快士議真卿頓首

移蔡帖

貞元元年正月五日真卿自汝移蔡天也天之昭明其可誣乎有唐之德則不朽耳十九日書

裴將軍詩

大君制六合。猛將清九垓。戰馬若龍虎。騰陵何壯哉。將軍臨八荒。烜赫耀英材。劍舞若游電。隨風縈且迴。登高望天山。白雲正崔嵬。入陣破驕虜。威名雄震雷。一射百馬倒。再射萬夫開。匈奴不敢敵。相呼歸去來。功成報天子。可以畫麟臺。

陶公棗里

張良思報漢。龔勝恥事新。狙擊苦不就。含生悲拖紳。嗚呼陶淵明。奕葉爲晉臣。自以公相後。每懷宗國屯。題詩庚子歲。自謂羲皇人。手持山海經。頭戴漉酒巾。興與孤雲遠。辨隨還鳥泯。

竹山聯句題潘書

竹山招隱處。潘子讀書堂。真卿萬卷皆成裘。千竿不作行。處士陸羽練容餐沆瀣。濯足詠滄浪。前殿中侍御史李暉守道

心自樂。下帷名益彰。前梁縣尉風來似秋興。花發勝河陽。推官會稽康造支策曉雲近。援琴春日長。評事范陽水

田聊學稼。野圃試條桑。釋皎然巾折定因雨。履穿寧爲霜。河南陸解衣垂蕙帶。拂席坐藜牀。河南房夔檐宇馴輕

翼。綈裾染衆芳。顏榮草生還近砌。藤長稍依牆。顏榮魚樂憐清淺。禽閒意頡頏。顏榮空園種桃李。遠墅下牛羊。北京

章讀易三時罷。圍棋百事忘。洛陽丞趙境幽神自王。道在器猶藏。備事同且晝歡山僧茗。宵傳野客觴。河

柳遙峯對枕席。麗藻映縑紉。永德丞顏暉偶得幽棲地。無心學鄭鄉。述上

